


RERUM
MEMORABILIVM
IN REGNO SINÆ
GESTARVM.



*Litteræ annuæ
Secretarij IESV.*

1625.





Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3458/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3458/A




Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3458/A

I
ANNVÆ IAPONIÆ
LITTERÆ
ANNI M.DC.XX.

Ad admodum Reuerendum in
Christo Patrem nostrum P. MV-
TIVM VITELLESIVM Socie-
tatis IESV Præpositum Generalem.

Admodum R^{de} in Christo Pater noster.

 EQVITVR annus millesi-
mus sexcentessimus vigesi-
mus ; non tam frequenti
Martyrum triũpho , quam
diuite animorum præda ce-
leberrimus. Tametsi nec
noua bellatorum agmina , nec illustres co-
ronæ defuerint victorum. In quo sanè no-
strorum virtus enitescit, quæ nouos quoti-
die milites armat , quibus inimicum expu-
gnet, nouas acies instruit , quibus opima
deuictis hostibus spolia referat. Eorum o-
pera mille & trecenti ad Christi signa tra-
ducti
A ducti

2 LITTERÆ ANNI M.DC.XX.SOG.IESV
ducti; Martyrij lauream consecuti sex. Plu-
res alij diuturno carceris pædore eidem
victoriæ præludent. In his P. Carolus Spi-
nola triennium & ultra in vinculis asserua-
tus, egregium religiosę fortitudinis speci-
men exhibet. Victa nimirum Tyrannis
Christianæ libertati fasces submittit, &
quos ferro, ac flammis subigere nequit,
æternis latebris, atque gurgustijs oppri-
mere, & obscurare conatur. Sed quamvis
exiguus, angustusq; circus fortissimo mi-
liti statuatur, non ideo virtutis laus minui-
tur, aut victoriæ jura mutantur, quin imo
frequentibus tropæis palmarum nume-
rus in dies magis ac magis augetur. Sed an-
tequam Sanctorum Martyrum laudes atq;
triumphos celebremus; quo tandem belli
genere, quo duce, quibus auspicijs, armis,
auxilijs vtrimque pugnatum sit, paulò dili-
gentius exequamur.

Res Christianorum in Iaponia.

IAponiæ res eodem planè loco sunt, ac
superiore anno retulimus. Idem qui an-
tea Rex, totius regni eadem pax, idem ob-
sequium.

sequium. Nullus armorum strepitus, futurę
seditionis suspicio nulla. In Christianos
eadem vis, eadem crudelitas, sed præsertim
in societatem nostram, ac reliquos Euan-
gelicę doctrinę præcones. His omnibus
Iaponiam attigisse capitale est. Frustra ta-
men in eos acuitur gladius, quorum aures
iamdudum tubę sonus circumierit. Inte-
rim Rex curas omnes intendit, ne quis-
quam ex illis intra regni fines excipiat,
atque in id ipsum publicis edictis, ac pænis
Christianos diuerberat. Verum enim verò
Christianę caritati nihil imperuium, nihil
inaccessum, vbi de animarum lucris agitur,
naturę claustra perrumpit, obuias difficul-
tates ac repagula disijcit, per intentas vn-
dique machinas, ac mucrones obstructos
Euangelij aditus aperit. Nec minor Chri-
stianorum pietas ac fortitudo. Hi enim
non modò nostros excipiant, sed etiam
opportuna ad subitarias excursiones auxi-
lia suppeditant. Atque in id ipsum plurimi
cervices deuouēt, nonnulli etiam ponunt.
Et quod magis mirēre carissima sibi capita
eidem periculo addicūt. Sed ne vana qua-
dam specie, aut superbę libertatis, aut in-

cautæ pietatis Regis iram laceffere videamur, magna â nobis cautio adhibenda est; ne scilicet modici incrementi auiditate, totius rei summa in discrimen adducatur. Triginta è nostris ibidem versantur. Ex his Sacerdotes quinque ac viginti. Quatuor votorum professi Sexdecim; quanto cum periculo ac difficultate, tacitus sibi quisque subijcere potest. Singuli tamen tulere sui laboris pretium; sed præcipuè duo, quibus idem fuit vitæ, ac laboris exitus; idemque æternæ, vti speramus beatitudinis exordium. Primus fuit P. Ioannes Fonseca quatuor votorum professus, natus Olysi pone, vir modestiâ, humilitate, patientia, caritate, & obsequendi studio admirandus, sed imprimis ad labores, & Societatis munia strenuus & indefessus. Obijt anno ætatis suæ quinquagesimo tertio; quàm venit ad societate tricesimo secundo; maturus cælo, sed multos adhuc annos, si ita libuisset numini, utilis Iaponiæ futurus. Hunc sequutus est P. Emanuel Barretus spiritualis adiutor, pariter Lusitanus ex oppido Feiræ Portuensis Episcopatus, operis assiduitate, & obedientiæ studio exempli nō vulgaris.

Venit

E REGNO IAPONIÆ.

5

Venit ad stadij sui metam anno ætatis suæ quinquagesimo sexto, cum vnum & triginta his atque alijs ornatus virtutibus vixisset in societate. Eorum loco quatuor hoc anno submissi, exiguus sanè manipulus, si regni amplitudinem spectes, si temporum conditionem, non contemnendus. Cæterum omnes egregiam operam consuetis Societatis muneribus in hominum salutem impendunt; in quo sanè nulli labori, difficultati, periculo parcunt, strenui venatores animarum, montes ac valles fide armati obeunt, amnes, maria, gurgites, traiciunt; desertas admodum solitudines noctu pererrant; auiâ mūdi parte summos mortales inquirunt. Vrbes, oppida, pagos, circumeunt, erudiunt, confirmant. Et hæc omnia tanto animi ardore sibi deposcunt, vt minùs auidè expeditiones illæ suscipiātur, quæ minimè sint huiusmodi difficultatibus obseptæ.

Nangasachij Vrbs.

H Vius Urbis Dominus idem, qui totius Iaponiæ. eius vicem regit Gon-
A 3. rocus,

6 LITTERÆ ANNI M.DC.XX.SOC.IESV
roculus cuius ingenium & naturam superioris anni litteræ testantur. Cæterum hujus Ecclesiæ nimbos ac turbines alij fufius persequentur. Mihi quidem consentiens huius anni calamitas silentium indicit, cætera brevitatem suadent. Templum Misericordiæ, quod vnum Christianæ pietatis argumētum supererat, solo æquatum. Septem Nosocomia, quibus diuini cultus suspicio suberat. Funditus everfa. Ægrorum corpora ventis, imbribus, hiberno frigori passim exposita Christiana caritas meliorem demum hospitio suscepit. Nec solum mortales exagitat, sed cum ipsis etiam manibus luctatur barbara crudelitas. Bustorū quippe sanctitas violata, pij mortuorum cineres, innoxiorum spirituum exuiæ, cara pignora pijs cœmeterijs eruta. Parū est. Ipsamet cadauera recenti adhuc funere condita, nouo crudelitatis genere extra urbem proiecta. Hic verò quis Neophytorum sensus? quis dolor? quæ lachrymæ? Alij parentum, filiorum, nepotum ossa legebant; Alij fratrum, amicorum, affiniū reliquias, nouique doloris causam. Dura tamen necessitas vrgebat; ipsaq; pietas, fides, religio.
In

In tanta tamen temporum iniquitate nostri nunquam diuinam causam deseruerunt, quin etiam contra vim tempestatis audentius contenderunt. Octo ibidem steterê. Dubites vtrum maiore fruge an periculo. Illud non semel adiit P. Prouincialis. Sed præcipuè ab illa causa.

Ad Missæ Sacrificium comparabat sese; cum ecce trepidus hospes accurrit, monet, obtestatur, inde decedat, atque vtriusque saluti consulat; eo quippe die ancillam au- fugisse, cuius fidem suspectam habebat. Interim Neophytum adit, ac rogat vti Patrem excipiat; vixq; vnus diei moram impetrat. Sed longè maius in ipsa fuga periculum; si quidem palam egredi peregrina facies, occultè vehi, lex ipsâ vetabat. Cessit tamen necessitati lex. Sellam gestatoriam conscendit, quod solis mulieribus concessum est. Sequitur index pedissequa. opportunum fæminei sexus argumentum. Qui succollabant viarum ignari, passim herere, subsistere, noui hospitis domum sciscitari. Obuius quisq; ad cancellos accedere, scrutari, curiosius introspicere. Tandem in cuiusdam viduæ domum appellant. Illa penè

8 LITTERÆ ANNI M.DC.XX.SOC.IESV
exanimis errorem obijcere, baiulos, igna-
ros, rudes, incautos nominare. Inter hæc
ancilla superuenit, lōgius prouectos regre-
di iubet, ac domum ostendit. Sed non hoc
postremum periculorum fuit. Neophytus
qui tunc forte P. Prouinciali operam da-
bat, alta iam nocte deprehēsus ad quæstio-
nem abripitur, mox etiam Gubernatoris
iussu adhibetur; sed cum nihil assequeretur
iubet explorari vicum, tecta, domos; ratus
ibidem spem suam delitescere. Illud argu-
mento erat, nocturnæ vigiliæ ad exitus via-
rum dispositæ, quæ transitum prohibebant.
Nec inanis erat suspicio; si quidem P. Pro-
uincialis ibidem latebat, è regione illius P.
Ioannes Baptista Baïessa. Sed planè diuini-
tus accidit, ut is postea consilium mutaret.
Interim nocturnas, diuinasque custodias
circa domos apponit, ac Neophytū com-
prehēdi iubet, qui super ea re interrogatus
mira arte atque constantia Gubernatorem
eludit, iamque torquendus erat, ni trium
Neophytorum preces obstitissent; id verò
vulgi querelas excitat, ipsiq; Patres in sin-
gula penè momenta vincula exspectabant.
Septimo tandem post die P. Prouincialis
elabitur,

elabatur, nec ita multò post P. Ioannes Baptista Baieffa.

In laico ex Franciscana familia idem periculum. Is cū certa nec iusta de causa sublustri nocte per urbem incederet, quo tempore viarum portæ clausæ erant; Bonzius præteriens illum intuitus, eius vestigia sequitur, ad hospitis domum latenter observat. Sed vicissim hospes Bonzium exploratorem ratus, hominem occultè dimittit. Ut primum diluxit, adsunt apparitores, domum irrumpunt, explorant, evertunt. Mox vicinorum sed præcipuè vnius, à quo pridie noster Sacerdos discesserat: Indè ad priorem hospitis domum redeunt; ac pium fortè libellum offendunt Iaponico quidem idiomate, sed Europæis notis conscriptum. Vincetus Aloysius (id hospitis nomen erat) adducitur ad Gubernatorē. Is nescio quem aduenam domum suam diuertisse non inficiatur; sed statim abiisse; quonam, nescire se; varijs deinde cruciatibus laceffit, eandem omnino constantiam præstitit. Vago interim rumore per urbem spargitur prodita Patrum hospitia, multosque utiq; mortalium in summo discrimine versari; sed

10 LITTERÆ ANNI M.DC.XX. SOC. IESV
explorata tandem Aloysij virtus, omnem
pariter timorem, ac dubitationem dispulit.

Illustris etiam fuit alterius Neophyti vir-
tus, quem idem Gonrocius anno superiore
in carcerem dedit; quod pia librorum le-
ctione Christianos reficeret. Hunc igitur
aduocat, seque eum luci ac libertati reddi-
turum pollicetur, modo in posterum ab eo
munere abſtineat. prorsus, datoque in idip-
sum Chirographo fidem suam obliget. Ad
hæc Neophytus. Egone, inquit, calamum
ac chartam hoc crimine cōmaculem? nō
tanti corporis libertatem facio, vt eam ani-
mi iacturâ redimam, aut proximorum vti-
litati præferam. Agnosco tamen beneficiū,
sed quia huic eidem scelus coniunctum,
nō vtor. Melior est enim indignus carcer,
quam indigna libertas. Itaq; tenebris red-
ditus æternæ lucis splendorem, veramque
animi libertatem præstolatur. Eosdem pla-
nè Spiritus præ se ferunt Dogici quatuor
eidem squalori, iisdem vinculis mancipati.

Liceat nunc diuinæ benignitatis exem-
pla intueri. Neophytus quidam grauiter
ægrotabat; hunc diu, noctuque domestici
importunis precibus fatigabant, vt, abiur-
rata

rata Christianâ religione ethnico more fibi iusta persolui pateretur. Is cum animi non minus quàm corporis interitum timeret: clam inscijs omnibus è regno Fingo nullo comite Nangasacum deuchitur. Amicum adit hospitij fidem expetit, sed linguæ impos, mentis vix compos: Somnus eum occupat, & dormit. Per quietem vidit augusta forma fæminam, quæ pristinum sermonem; ac valetudinem pollicebatur. Inter hæc expergiscitur, vox redit, oblata in cibum & potum libat: Sacerdotem acciri iubet, peccata aperit, conualefcit. Cæterum quàm grata Deo sit Christianorum pietas & fortitudo in excipiendis nostris hominibus, vel ex eo maximè declaratur. Eiusdem vrbis Neophytus sacerdotem domi habebat, cui etiam oleum ad consuetas lucubrationes abundè suppeditabat. Exhausta penitus olla cū illam, præsentī pecunia opplere decreuisset, grauem primò, mox etiam pingui oleo fluentem, ac penè redundantem videt. Filios, vxorem, seruos, domesticos omnes interrogat, Totidem eius rei testes reperit.

Misto

Missio Omurensis.

EX vrbe Nangasachi brevis est, atque
 Eadeò facilis in hanc oram traiectus. Ea
 nobis oppurtunitas ad noua subindè au-
 xilia Christianis ferenda. Duo hoc anno sa-
 cerdotes; interdum etiam fratres, sepè ve-
 rò Dogici in id ipsum missi nō urbem mo-
 dō, sed etiam pagos & oppida lustrarunt.
 Nonnulli qui se minus firmos atque con-
 stantes aduersus desertoris illius Dynastæ
 minas ostenderant infelici atque immatu-
 ra morte eiusdem perculsi ita confirmati
 sunt, vt quidvis perpeffuros se esse confir-
 ment, quàm vt vllis minis aut terroribus
 abduci se in posterum patiantur. In his ali-
 quot eius carceris custodes, in quo P. Ca-
 rolus Spinola & alij Sacerdotes tenentur,
 iam diu. Longè dissimilis fuit aliorum vir-
 tus; Sed præcipuè eiusdem Dynastæ, no-
 vercæ, amiræ & sororū quatuor. Hæ enim
 non modo constanter in suscepta religio-
 ne permanent; Sed etiam suo ad virtutem
 exemplo, alias item nobiles matronas pro-
 vocant. Tenui fortuna piscator ibidem a-
 gebat;

gebat; qai non tam dulces piscibus infidias parare, quam salutare hominibus plagas tendere consueuerat. Sæpè monitus à Gubernatoribus, vt sibi, ac retibus suis consuleret; cum ille in instituto perseueraret, vnà cum vxore pari pietate fæmina in exilium agitur; quod ille velut optatissimum vitæ tranquillæ secessum libentissimè suscepit.

Omnem verò virtutis laudem exhaurit alius oppido diues ac nobilis, sed præcipuè annuo eiusdem Dynastæ stipendio coonestatus, Paulo illi nomen: Is non tam vela pandit ad eam partem, vbi terrenæ felicitatis aura blanditur, quàm contra tumentes fluctus inexpugnabilem fidei proram obuertit. Eius domus religiosi hospitibus maximè patet. Rei familiaris iacturam, vitæ discrimen ridet; sæpè de rebus diuinis loquitur; durus & asper in corpus suum; rerum cælestium contemplationi maximè deditus. Et hæc obiter, nam ad alia imus.

Missio ad Christianos Firandi.

Alius item Sacerdos Firandi ditio-
nem, insulasque & oppida finitima o-
biuit,

14 LITTERÆ ANNI M.DC.XX. Soc. IESV
biuit. Is fuit Pater Christophorus Ferre-
rius Lusitanus; multis sanè Dei ac naturæ
donis ornatus, nec sine explorato vitæ dis-
crimine, tum ab irato mari, inaccessoque
littore, vbi Christiani degunt, tum ab ipsis
Ethnicis Christianæ religioni maximè in-
festis. Et quoniam nemo è nostris multis
abhinc annis ea loca peragrauerat, excep-
tus est auidissimis omnium animis. Pecca-
ta sua cum gemitu retractarunt mille tre-
centi; pronas omnibus aures dedit Sacer-
dos in littore maris alta iam nocte; ne scili-
cet Ethnici qui inter Neophytos promif-
cuè degunt, ea pietatis munia interpella-
rent, vel certè turbas ac tragedias excita-
rent de more. Eius Dynastæ mater nomi-
ne Mucia Patris Bartholomæi Omurensis
quondam Domini studium ac institutum
sequitur. In eius fide & patrocinio Neo-
phyti certum habent in suis miserijs, & ca-
lamitatibus refugium.

Sed enim Insulanis non defuit exercen-
dæ virtutis occasio. Deereuerat eius To-
parchiæ Dominus Christianos omnes ad
defectionem impellere. Id cum rescissent
Neophyti; sexaginta agmine facto ex in-
sulâ

sula Ichitzuchi gubernatorem adeunt; atq;
in ea verba compellāt; nos, inquit, Chri-
stianam religionem â teneris profitemur:
Cum ea nobis aut viuendum, aut pro ea
moriendum; quo circa faceffant preces,
vincula, minæ, acuantur gladij, ignes exci-
tentur, corpora comminuantur. Ea prop-
ter adsumus; neque verò impetu, aut ca-
lore dictum putes. Hoc nobis fixum, desti-
natumq; in animo est. Inter hæc alij cerui-
ces offerunt, alij nudum latus ostendunt: â
se ipsis initium cædis faciat enixè postulāt.
Mox filios & vxores sequuturas. Tantæ
virtutis admiratio primo quidem Guber-
natorem defixit: Mox etiam Tonum ab eo
scelere prorsus auertit.

Regna Satzuma & Osumi.

L Vstrata vtraque regna â Patre Xysto
Iaponio magno peregrinationis labo-
re, & incolarum bono. Vbique ardens illa-
tū Martyrij desiderium. Reliqua societatis
munia de more præstita; quæ quoniam ni-
hil præcipuè cōtinent, attingenda potius,
quàm commemoranda fuerunt. Nobis
enim

16 LITTERÆ ANNI M.DC.XX. SOC. IESV
enim propositum est, quæ eminent ea
duntaxat afferre.

Neophytus Martyrio coronatur.

HActenus illustres Neophytorum pu-
gnas exhibuimus; nunc cruentas eo-
rūdem victorias breviter indicabimus. Pri-
mus sese offert Matthias cuius inexpugna-
bilis virtus principem iure merito locum
ac laudem sibi vindicat. Erat is fortunę qui-
dem modicus; sed tamen pijs atq; honestis
parentibus natus. Patria illi Canrusangoco
tenuis Arimæ pagus. A primis annis adeo
se pietatis studiis & caritatis addixit, ut
cum ipsa ætate pari gradu virtus adolesce-
re videretur. Illucescente Deo nuncium
rebus humanis remittere, vitamque suam
in Christi famulatu, ac Societatis obsequio
transigere decreuerit. Et quoniam P. Pro-
vincialis eius fidem, & ingenuitatem opti-
mè norat, non alium sibi in suis periculis,
& excursionibus Achatem delegit. Nec is
servile nomen exhorruit, quin imò trien-
nium in eo munere magna animi constan-
tiâ perstitit. Communis erat fugæ labor,
com-

commune recti discrimen, studium, ac voluntas omnino eadem. Sed nimirum tantæ virtuti sola Martyrij laus deerat; nec diu desiderata. Cōsueuerat is alta iam nocte Neophytorum domos obire; idque P. Prouincialis nomine qui eius opera utebatur. Egreditur de more nam ita res exigebat. Fidissima mortis hora deligitur, tertia nimirum ab occasu solis. Amicum adit, alloquitur, abit. Mox alium conuenit & vestem quandam P. Prouincialis accipit Europeo more consutam. Dum redit obvios habet lictores. Euestigio, quis tu es? vnde, quo te pedes, inquit? Quid illud sub axilla? furto nimirum abstulisti; nihil tibi nox proderit. Nec mora. Ad vigilem eius vici laternam deducunt, linteum volumen extorquent, explorant, agnoscunt. Manibus post tergum reuinctis trahitur in curiam. Qui sit, vnde veniat, quidue noctu vagetur, interrogatus nullum præfidi verbum reddidit. Cuius, inquit, illa vestis quam ferebas? quem alloquor ego? nimirum latet anguis sub hoc muto lapide. Atqui faciam te cymbalo loquaciorem.

Interim Neophyti tres P. Prouincialem

B

admo-

admonent, suamque in id operam pollicentur. Nulla interposita mora eundem Præfidentem adeunt, ac rogant; si qua pietas manserit, si qua fides, si qua pristinae religionis memoria, hominem dimittat, vel certe nullam omnino rationem habendam de iis putet, quæ siue metus, siue dolor expresserit etiam ab inuito. Ad hæc Christi desertor: Maiora, inquit, agito. Vos interim apud me eritis, quoad usque fiat abeundi potestas. Interim Suchedaium urbis Præfectum monet Neophytorum domos inquirat; tempore utatur; non inutilem irruptionem futuram: magnam utique sibi lucem obortam. At is licet Ethnicus: ingenio tamen minus abrupto, præproperam celeritatem sibi videri respondet. Viarum portas occlusas, & verò etiam custode munitas. Si quis fortè lateat, à fronte, à tergo, à lateribus teneri. Ne quis fortè motus existat, lucem operiatur. Eo nuncio perculsus Gubernator iram dissimulat, Neophytos dimittit; vinctum aggreditur: Et tu, inquit, scelestè velis nolis hunc linguæ nodum solves. Hic confestim li-
 ctorum turba in eum manus iniicit, pugnis, calcibusque barbarum in modum de-
 scavit.

æuit. Oculos feriunt, faciem depalmant,
ora contundunt, idem Gubernator minas
addit, spem miscet. Perstat ille in senten-
tia, seque in fidis silentii castris continet.
Vibratum per aëra mucronem intendit
Carnifex; expediuntur tormenta; explo-
rant iterum, sciscitantur. At is non vocem,
non halitum, non suspirium. Sed neque
dolor, neque artes constantis pietatis op-
pugnandæ quievere. Connexis de more
crabibus decussatim alligatur, ac sternitur.
Ingens aquæ vis in os infunditur, donec
alvus plenior in orbem tumescat. Plu-
rima in id ipsum hydriæ hauriuntur. Rur-
sus eadem aqua (pedibus & baculis id fe-
cère) per os, aures, oculos, nares, aliasque
corporis partes si qua patet aditus, explo-
ditur; nec sine immani cruciatu; cum is in
omni poëna nullum ederet gemitum, quo
semet miseraretur, quasi ea supplicia in a-
lieno corpore exercerentur. Sed cum in
irritam spem tempus, & operam teri Præ-
fectus animaduertere, seminecem mittit
ad Suchedaium, qui eum ad multam no-
ctem expectabat, & fortè transeundum e-
rat per eundem vicum, in quo captus fue-

20 LITTERÆ ANNI M.DC.XX. SOC. IES
rat, & ubi P. Prouincialis latebat: redit
ad minas, reditur ad acerbitem, aqua
iterum ingeritur, & egeritur pari crude
tate. Tum sero inducias doloris implora
spemque facit veritatis promendæ; nec i
difficile impetrat. Respirat Christi bell
tor; nec se tantum recreat, sed hostis etia
insultat imbecillitati. In Insulis, inquit, E
randi moratur Sacerdos. Quis iste Sacer
dos Præfectus interrogat: Presbyter, in
quit, Petrus Christianæ fidei desertor. Bl
lis huic in naribus; & ô improbum capu
ait, sales etiam loqueris & lepores? Audi
autem: nî vestis illius dominum ostenda
peristi. Maiori dein iracundiâ rapitur, tor
quetur, diuellitur inter omnia mala co v
tu, vt renidentis etiam speciem præbere
paulò post ceruices flectere & labi spiri
tus. Exertam modicè linguam carnifex
nimaduertens immani pugno mentum fa
riens inter vtrumque dentem cecidit. Ne
plura locutus cum primum diluxit inu
ætum procreatori suo spiritum reddidit
anno post Christum natum millesimo sex
centesimo vicesimo; ætatis suæ quadrage
fimo nono. Ac ne tum quidem fitis crude
deli

litatis extincta est. Eius cadauer ad sup-
cia raptatur; sacrum interea cruorem,
i ex ore manabat, piè legentibus Neo-
ytis: iidem iussi vti Martyris caput am-
tarēt: Prius, inquit, nobis ceruices reci-
ndæ sunt; tum demum iussa faciemus.
Caput denique auulsum, ac prælongo in-
u hastili, appositâ necis causa, quæ spre-
m Imperatoris edictum trabalibus literis
clarabat. Et ne Christiana pietas eo pi-
nore frueretur, vnà cum reliquo corpore
mare proiectum. Tertio tandem post
e funibus ac retibus extractum à Neo-
ytis P. Prouinciali dono mittitur. Atque
c fuit sc̃elix Matthiæ obitus; qui non tan-
m Deo, sed etiam hominibus fidem op-
mam præstitit: sed imprimis P. Prouin-
ali, apud quem dulcem reliquit sui me-
oriam non sine sensu doloris. Infractum
ipsis cruciatibus animum immobilemq;
onstantiam, & hilaritatem, vel ipsi torto-
es admirari sunt; vt interim omittam cari-
tis ac pœnitentiæ studium, perpetuamq;
er assiduam precationem cum Deo fami-
aritatem; & sanè rebus diuinis adeò in-
iabat, vt quamuis multa de P. Prouinciali

sæpius audiret, neophytorum domos obiret, ac piè librorum Spiritualium lectioni magno animi sensu interesset. Semel ea de causa à lictoribus interceptus eam oris grauitatem, ac modestiam præ se tulit, vt pro religioso homine haberetur. Eam dubitationem ademere neophyti, qui de grege hominem esse testati sunt. Accedebat ad egregiam illius pietatem vnà cum summa lenitate comitas tanta, & tam grata humanitas, vt omnium animos, quibuscum ageret, arctissimis sibi beneuolentiæ vinculis astringeret. Quatuordecim annos operam dedit Societati; ex his aliquot, vt erat sollicitæ, ac bene temperatę mentis, obsonatorem egit in seminario, tanta alumnorum voluntate, atque approbatione, vt ab omnibus tanquam parens coleretur. Eos Amacaum vsque profecutus est, cum è Iaponiâ pellerentur, integrumq; biennium ibidem constitit. Sæpè à Patre Prouinciali interrogatus; an secum vnà pro Christo mori peroptaret, nil aliud in votis habere se asserebat: Nonnunquam P. Prouincialis si te, inquit, lictores caperent, atque vt Patrum hospitia proderes diris cruciatibus affice-

afficerent, quid ageres, quid consilii caperes? Quamuis, aiebat is, membratim discerpar, frustratimque concidar, hoc ego me scelere nunquam obstringam. Atque ea ipsa de re tribus ante horis appellatus, insolito pietatis ardore, quæ vel ex ipsa fronte, atque oculis emicabat, adamantinum illud in animo suo decretum esse respondit. Nec plura dixit, quàm præstitit; pugnam quam sponpondit, exhibuit, & palmam, quam meruit, in fide stabilis, in dolore patiens, in quæstione victor accepit.

Arima cum insulis adiacentibus.

QUAMUIS nondum planè vetus huius Ecclesiæ procella deferbuit, magna tamen ex parte remisit. Quinque è nostris rem Christianam promouere pergunt. Eius loci Dynasta non modo Christianam religionem non odit, sed etiam iudicio suo comprobatur; utpote rationi cōsentaneam. Ipsos verò neophytos arbitrato suo viuere permittit, modo tamen caute & prudenter id agant, neque sibi pernicies oriatur. Interim in eius lenitate ac studio respirat Ecclesia,

24 LITTERÆ ANNI M.DC.XX. SOC. IESV
clesia, & tanquam ex luctu caput attollit.
Porro nostrorum opera non inutiliter col-
locata. Alii in fide confirmati, alii ad pœni-
tentiam adducti, nonnulli veram docti, alii
falsam dedocti religionem. Præcipuus la-
bor in ægrorum confessionibus audiendis:
noctes in id ipsum assumuntur. sæpè etiam
insumuntur, cælo siue nitido, siue imbribus
fædo. Nec minor è vicinis insulis fructus
allatus. In iis multos reperias, qui sacramen-
torum beneficio careât. Septuaginta, quo-
rū ætas adoleuerat, baptismo initiati. Lu-
strata denique regna Fingo & Satzumæ.
Nonnulli sacro fonte renati. In his vnus
opibus, & genere perhonestus, vt primum
Christianæ religionis mysteria didicit, ad
studium pietatis adeò exarsit, vt eandem
in singulos dies, adhuc cathecumenus ma-
gno animi sensu commentaretur cœpitq;
ex eo tempore Christiani hominis officia
colere non sine capitis ac fortunarum dis-
crimine. Alius item antequam salutaribus
aquis immergeretur, quo tempore Neo-
phyti ad necem quærebantur, vltro semet
illis adiunxit, Gubernatorem adiit; pro fide
ac

ac religione caput ac vitam obtulit. Confirmati præterea qui lababant in fide, non nulli etiam, qui ab auitâ religione defece-
rant, ad eandem revocati. Vir erat in magna scelerum conscientia, sed præsertim proditæ religionis crimine notatus; acer eum morbus inuadit; sed qui prostrato corpore erigeret animum: iamq; febris quotidie magis hominem vrebat; cum is periculum in consilium vertit: Itaq; Sacerdotem advocat; multasq; fudit lachrymas pœnitentiæ testes. aderat eius frater eodem scelere contaminatus. is pariter anteaactæ vitæ dolore faucius, ad Sacerdotis pedes humi procumbit in sua terga desæuit, multisque lachrymis, errorem suum detestatus, publicæ offensionis veniam deprecatur. Tertius addi posset, sed exemplorum paritatem fugio, atque ex eâ tædium.

Iam verò proximorum caritas in multis elucet. atque vt interim alij omittantur; duo ibidem coniuges pari Christianæ pietatis studio degunt, quorum domus diu noctuque pauperibus Neophytis patet; iisdem eleëmofynas sua manu distribuunt: hospitio donant; nec solum egentes & mi-

26 LITTERÆ ANNI M.DC.XX. SOC. IESV
feros sed etiam quos foeda lues vlceribus
perforat, aut lepra respergit, benignè sus-
cipiunt, pecuniæ subsidia, cibum, comme-
arum abundè suppeditant.

Eadem pietatis studia colit mulier æta-
te, sed caritatis amore lacertoque iuuenis;
hæc enim ægros inuisit, subsidio fouet, sti-
pem, quam in alios pauperes dispertiat, o-
stiatim quæritat; quæ sanè res vel tenuissimi
cuiusq; studium ac liberalitatem exercuit.

Regna Cicungo & Bugen.

NEc defuere quamdiu licuit ad extre-
ma loca excursions. Adita regna
Cicungo & Bugen P. Iuliani Nacauræ Ia-
ponij opera. Consueta societatis munia
magna ubiq; diligentia administrata. Mul-
tos ibidem ob Christianam religionem ex-
torres reperit: sed inter alios Didaci Can-
gajamæ Martyris generum, quem Nanga-
uoca Ietciundonus vnà cum vxore & Fi-
lijs in rusticam solitudinem inter ignobi-
les colonos, ac regni quisquillas ablegauit.
Cernere erat virum olim diuitijs, auctori-
tateque domi suæ facilè Principem, veste,
comitatu

comitatu, ipso corpore spectabilem; nunc pannosum, sordidum, neglectum, scrutis obuolutum, inter gregarios opifices, atque olentes rusticulos victum suum sibi quærere manibus, lordida quæuis munia obire, ac si medias tinus aliquis, ac vnus è plebe fuisset. Hunc igitur Sacerdos noster ita obfirmato ad religionem tuendam studio, reperit vt potius malit in eo exilio, quamuis asperam pati fortunam, quàm in patrio solo quantauis rerum copiâ abundare.

Sed vocat me aut potius rapit insignis vnus atque alterius Puellæ virtus ac fortitudo, quas idem Ietciundonus, domo, patriâ, parente orbauit. Is fuit Didacus Martyr quem iterum honoris causa nomino. Exilij causa Christi fides has igitur vtpote dignam tali stirpe prolem alio in oppido Sacerdos noster inuisit, nec sine præcipuo animi sensu. Dolebat vtique natu maior Aloysia eo se loci compulsam, vbi fundendi pro Christo sanguinis spes omnis exciderat; Sed illud in sorore nondum decenni longe admirabilius: Anna illi nomen. Hæc in palatium euocatam ethnicæ Mulieres aggrediuntur. quærunt ex eâ velit ne Christo

sto deserto ethnica fieri. Ego vero nequaquam ait, Puella, Precibus mixtæ minæ, & acres obiurgationes blandis cohortationibus temperatæ; eæque adhibitæ machinæ, quæ vel durissimi pectoris hominem percellerent. Non plus proficitur, quam cum Alpes ventorum flatu pelluntur. Atqui, inquiunt, confestim Tonus aderit, qui te lancea pungat, ac fodiat. At illa. Egomet, ait, si veniat, occurrā; ego vulneribus locum ostendam: mirari omnes, & laudes dicere. Itaq; victricem puellam dimittunt, & quam deterreri potuisse putant, multo magis in suscepto consilio confirmant. Tredecēnis item puella, in morbum inciderat; nec procul aberat à periculo; hæc intimis sensibus angebatur, quod peccata diluere per confessionem minimè posset. Verum cum in eodem pago Sacerdotem occultè versari cognouisset, illum accersit morbiq; vis remittit. Explicatis confessione peccatis pristinam valetudinem sibi à Patre exorata exclamat, fidem fecit subitus è cubili discessus.

Adolescens nobilis & claro in primis genere natus vna cum ethnico dynasta in curiam

riam profectus triennium ibidem inter au-
licos fluctus, ac voluptatum illecebras ver-
satus, ea virtutis documenta dedit, ut à re-
ligiosis hominibus illustriora non flagites.
Erat is ingenii peracuti, altæque mentis,
nostræque fidei mysteria apprimè callebat.
Quodam die cum ethnico primario ho-
mine cōgressus magno pietatis ardore fal-
sam & commenticiam Xacæ doctrinam a-
crius perstringere, ac prodigiosos illius er-
rores profligare cæpit, quippè quæ lucem
perosa tenebris se addiceret, nulloq; alio,
præterquam fraudis, ac mendacii patroci-
nio niteretur. Sed cum Ethnicus impia
quædam scommata in sanctissimum Chri-
sti nomen polluto ore despuerat, irâ perci-
tus adolescens gladium corripit, ac dubio
procul ab impuro dæmonis mancipio vio-
lati numinis pænas exegisset, ni generosi
pectoris impetum adstantes cohibuissent.

*Cocura neophyti quinque ob Christi fidem
totidem crucibus appenduntur.*

HI fuere quiota Bocusai Simon, qui in
eadem vrbe hypodidascali munus o-
bibat,

30 LITTERÆ ANNI M.DC.XX.SOC.IESV
bibat, (Is Patrio sermone Cambo dicitur)
Magdalena eius vxor: Guengorò Thomas
& Maria coniuges: Iacobus puer vtriusque
filius. Eius necis autor Nangaoca Ietciun-
donus regni Bugem dynasta. hic cum sæ-
pius Simoni edixisset, vt eo se munere ab-
dicaret, ac Christianæ religioni nuncium
remitteret: neque tamen is imperata face-
ret, vnâ cum vxore & seruis eundem neca-
ri iussit. Cum igitur Simon domesticâ in-
clusus custodiâteneretur, 19. Kalend. Sep-
tembris â Gubernatore submonetur, vt in
omnem se firmaret euentum: se enim rectè
ad Tonum proficisci, vt eius causam refer-
ret. Eo nuncio lætus Simon adstantium
fidei vxorem committit, eidemque supre-
ma salutis monita tradit. Ad hæc vxor sexu
suo fortior, nihil, inquit, diuidet, nullus do-
lor, aut carnifex vocem defectionis ex ore
isto extorquebit; adeo non defugio, sed de-
posco hoc certamen, in quo tibi ac Christo
fidem meam probem. Mortem aliquis im-
pediat, aut neget? Emori, inquit, pro Chri-
sto possum, & tecum etiam possum. Mox
ad eosdem conversa; Mei quidem nulla vos
cura sollicitet: hunc tamen puerulum (Ia-
cobum

cobum innuebat) vobis commendo. Interim à Governatore certior factus dynasta, quādoquidem Simon nullā omnino Christianæ religionis spem faceret deferendæ, iubet vxoris ac seruorum fidem explorari. Nec mora: vocantur in Curiam à Governatore. Quod cum Magdalenæ nunciatum esset; quid ego, inquit, illum adeam? longè fallitur Governator, si me aliam domi ac in iudicio, aut quæstione futuram existimet: quod hîc profiteor, idem coram ipso testabor. Ego Christianam religionem colo; hanc vt deseram nullus metus, mors, cruciatus adiget. Quocirca hanc meam protectionem superuacaneam arbitror. Hoc ipsum dato ad eum chirographo suâ manu confirmat. Sistuntur tamen famuli ante Governatorem; ac primo quidem parentes aggrediuntur, quos vt in suscepto consilio perstare ministri animadvertunt, puerum seorsim compellant atque vt vel vnum tantum verbum proferat, quo se in eorum potestate atque arbitrio futurum significet, enixè rogant, mox etiam pugnis & calcibus hoc ipsum extorquere contendunt. At enim puer: quæ est ista,

ista, inquit, iocularis stultitia? luditis opinor, egone is sum, quem pueriles hæminæ commoueant. non ita inglorii cadimus. quid me plebeo verberare tunditis? quid ignobiles plagas imponitis? en caput, en latus, quin ferrum acuitis? cædite: quid cūctamini? Cætera puer sim, non animo, aut fide. Mox admiratio in locum iræ succescit. Itaque læti domum redeunt, sui que consilii chirographum apud Gubernatorem relinquunt. In sequenti die optatus Martyrii nuntius affertur, quo statim accepto Simon ad P. Prouincialem scripsit in hæc verba. Omni animi demissione calamum sumo. Hodie Tonus mortis in me sententiam dixit: Tandem aliquando Deus votis meis annuit. Sed adhuc vereor, ne mea mihi crimina hanc ipsam fœlicitatem eripiant. Quod reliquum est animum & vires à Deo nobis imploret R. V. Eâdem animi demissione epistolam claudō. Huc vsque Simon. Igitur omnes procumbunt in genua, Deo gratias agunt, seque mutuo ad eam luctam fortiter obeundam cohortantur. Inter eam supplicationem à Gubernatore rursus monentur in posterum diem

diem suam necem differri; quod cum Simon inaudisset; fleuit, ac indoluit, ac ne id fortè vitio aut timori verteretur, doloris causam aperuit, quod scilicet dies necis extraheretur, vitæque spatia sibi producerentur. Is igitur dies cum primum diluxit, ac si ad festas dapes properarent, pretiosa veste se in suum funus exornant: Neque tamen internum animi cultum deserunt, sed ante I E S V Christi pendentis imaginem anxias tendere ad Deum manus, ne se doloris magnitudine, ipsoque mortis horrore superari pateretur. Sperabatur iam iamque carnifex, qui deuotas sanctissimæ morti victimas alligaret: quocirca Simō; donec, inquit, tempus suppetit, supremæ salutationis officia invicem persolvamus, nam postea Deo vacandum erit. Inter hæc lictores ingrediuntur, vinctosque ad supplicii locum pertrahunt. Ibat comes militum turba, qui distributis in orbem vigiliis funestas ad eorum cruces excubias agerent. Et quoniam Simon ad Societatem aliquo modo pertinere videbatur; quod scilicet in animarum procuratione versaretur, hunc illi honorem haberi iussit dynasta, vt in anti-

C

quo

quo Cœmeterii loco necaretur; sed cum ille renueret, quod eo se beneficio minime dignum iudicaret, vnà cum aliis ad patibulum truditur. Processit is animo sublimi, & erecto, hilaritatem præferens vultu, corde fidem atque constantiam. Pari ac simili calore virtutis sequebantur vxor, ac famuli, quos agmine glorioso eadem fides armabat. Cum ad supplicii locum peruenissent, omnes in genua procumbunt, oculisque in cœlum defixis diuini numinis opem implorant. Ab ea supplicatione Simon oculos attollit, ac fortè tabellam videt, in qua ea potissimum verba legebantur: Iubet Tonus quinque istos occidi, quod Patrum religionem sequantur, nec ab ea discedere velint. Cocuræ 18 septimæ Lunæ. Quam sanè tabellam statim ac legit Simon, subrisit internum animi gaudium vel ipsa oris hilaritate contestans. Tunc ad ministros cōuersus non tantum suo sed etiam sociorum nomine gratias agit, quod nimirum sua causa eiusmodi laborem susciperent. Verum multo maiores habere se Nangao-cæ letciundo, quod scilicet is quatuor annorū spatio necem eam distulisset: quod ille

ille beneficii loco reponebat, quandoquidem eo tempore multo commodius ad eum agonem instruxerat sese. Inter hæc capite in terram obuerso crucibus appenduntur 17. Kalend. Septembris secunda ferè post solis ortū hora; sed non idem dies, neque eadem obitus hora fuit; nam Simon & Magdalena postero die vnà cum ipso sole occiderūt. Guengoro Thomas & eius filius Bunzo Iacobus in tertiam diem spiritum extraxerūt, vltèrius victuri, nì lanceis inter sanctissima Iesu & Mariæ nomina cōfossi fuissent; At verò quanam hora Maria obierit, quidue Sancti Martyres è crucibus dixerint, non satis exploratum est, idque propter appositas custodias, quæ inde neophytos arcebant. Eorum corpora ignibus tradita, cineres mari, ne scilicet à neophytis colerentur, sed illud in primis ipsis quoque ethnicis admirationi fuit; nam quo tempore Simonis & Magdalænæ corpora conflagrabant, geminæ eiusdem ferè coloris irides effulsere, quæ se mutuò conuexa arcus parte tangebant, altera elatis in cœlum cornibus, altera verò ad terram di-

missis hoc ferè modo eēdem pariter in

36 LITTERÆ ANNI M.DC.XX. SOC. IESV
sequenti die, quo tempore cineres in mare
proiiciebantur, non sine omnium admira-
tione inspectæ sunt.

Atque huc Simonem sexagenarium iam
sua virtus prouexit, id quod tanto animi
ardore semper expetiit; nihil enim tam
querebatur cum alumnos suos passim pro
fide mori videret, quàm quod in mediis ho-
stibus nunquam sibi fors similis obtigisset.
Erat is è Regno Bungi oriundus, & quæ
erat generis, animique nobilitate, rem mili-
tarem iam tum ab adolescentia maiorum
exemplo perdidicit, diuturnoque usu ca-
strorū bellica etiam laude floruit; sed quo
tempore Bungi Rex auitâ regni passione
pellebatur, dum secum attētè reputat, quo
tandem rerum humanarum fastigia reci-
dant, superioris vitæ rationem in obsequiū
Dei commutare, nouumque militiæ genus
auspicari decreuit, in quo sanè tantum bre-
ui profecit, vt acerrimus Christianæ reli-
gionis propugnator euaserit, ipsique dæ-
mones, qui humana corpora obsidebant,
eius fidem atque constantiam perhorre-
scerent. Cum ad eiusmodi munus legare-
tur, in quo maxima martyrii spes ostende-
batur,

natur, cœpit vitam quandam cœlestem in-
stituere religiosæ vitæ propiorem, quam
seculari, nec ullis postea minis aut preci-
ous adduci potuit vt alienę salutis tuendæ
munus illud defereret, adiungendis ad
Christum Ethnicis, neophytisque in fide
confirmandis acriter insistens. Neque ve-
rò Cangaia mæ faito Didaci testimonium
prætermiserim, qui illum præ cæteris Co-
curæ neophytis miris laudibus ornare cõ-
ueuerat. Et quoniam acres apud homines
aculeos habent alienæ virtutis exempla,
ipsaque virtus coniunctissimum quemque
maximè solet afficere idem pietatis stu-
dium, non tantum vxor, sed etiam serui, ac
domestici facile didicerunt; qui sanè om-
nes eodem tramite, iisdemque vestigiis in-
sistentes, eandem Martyrii Coronam. pari
virtutis ac fortitudinis laude, consecuti
sunt.

Bungi Regnum.

EA temporum impendit conditio, vt
inde maior oriatur calamitas, vbi feli-
cius olim Christiana religio floruit. ita mi-

lites suos Imperator celestis exercet, rebusque prosperis aduersas interdum miscere consuevit. Inter alios huius regni dynastas non exiguam partem sibi vindicauit. Nacangaua Naigen Ocatæ dominus, Isacum Miacorediret, vbi multorum Neophytorum rogos viderat, vt nimirum se ipsosque facilius tueretur, atque adeo maiorem apud Xongunum gratiam iniret, autam superstitionem obtrudere, Christi que nomen è sua ditione prorsus exterminare decreuit: nec mora; vagi apparitores vrbes, oppida, domos circumuolant, re familiaris iacturam, vicorum excidia, filiorum necem denunciant. Adhæc probra dedecus, vincula, cruces, & id genus alia minitantur; nec desinunt perditim perdere multosque sibi ad pœnam socios adiungere. Eo turbine perculsi nonnulli (quæ humana fragilitas est) cecidere; non tamen iacere: sed multò plures admotas ad emolliendum animum machinas constanter repulêre. Ex his vnus, omnia, inquit, deferam, filios, vxorem, patriam, parentes fidem ac religionem, nec si cœlum ruat. Prius, inquit, alius in minutissima frustra

con

concidar,quàm proditor religionis Chirographum exhibeam. At verò alius cum se in album desertorum officioso mendacio relatum intelligeret, catalogum postulat; mox suum & parentis nomen inter ignobilem illam proditorum cateruam interlegens, calamum stringit, nomina delet, atque ad lictores conuersus: Ite, inquit, & meum, & parentis nomen hisce lineis atque coloribus adumbratum ipsimet Tono, si me, si vos amatis, ostendite. Tædium iure vereor in paribus exemplis: sed nobilem illum, fortemq; Titum, cuius virtutem ac fortitudinem superior annus vidit, & audiuit, tacitus præterire non possum. Huius nimirum fidem atque constanciam eius loci Tonus ac dominus labefactandam suscepit, atque vt hoc ipsum facilius impetraret, personam sumit, & agit; nunc generis & familiæ splendorem commemorat, nunc præclaras animi dotes, quibus ad aliorum inuidiam præditus erat, nunc opes ac diuitias, quibus etiam augeri quotidie possit in mentem reuocat, modò nomen suum vnâ cum aliis ascribi patiatur. Ni velit, exilia, carceres, cruciatus, ma-

40 LITTERÆ ANNI M.DC.XX. SOC. IESV
lorum omnium myriades ominatur. Ad
hæc Titus; Egone, inquit, sanctissimum
Christianæ religionis nomen hoc crimine
polluam? Prius vita me deficiet, quam ego
Christi fidem deseram. Quod si quis inui-
to me nomen meum adscripserit, ego idem
ibo, sistamque me Ocatæ Domino ac dy-
nastæ, eidemque fucum, ac fraudem indi-
cabo. Ad hæc Tonus maiora comminari;
se tanquam catenatum mancipium in po-
sterum habiturum illum. Quod is liben-
tissimè se pro Christi nomine laturum re-
spondit. Itaque primis præliis eiusmodi vi-
ctoria terminatis grauiora cœpit inire cer-
tamina, ut quod est omnium difficillimum
gloriosum etiam agat de se ipso triumphū,
si quidem abhinc annum domestica custo-
dia ac famulatu apud eundem Tonum de-
tinetur, quam ille seruitutem non modò
sapienter, & moderatè fert, sed alios etiam
ad eandem æquitatem, atque constantiam
hortari non desinit. Nec defuere etiam si-
gna atque prodigia ad confirmandam, il-
lustrandamque huius Christiani militis fi-
dem, nam quo tempore Titus egregiè di-
micabat, aliquot facibus vxoris cubiculum
illuni

illuni nocte refulsit, quas postea serui diluculo supra tectum discurrere conspicati sunt.

Dum hæc agerentur P. Franciscus Boldrinus, nullo modo deferendos ratus, quos tanta tempestas oppresserat, suam in id operam, atque periculum obtulit, cum illis, ac pro illis mori paratus si necesse fuisset. Et ne præsentia suâ illorum periculum augeret, occultas sylvarum latebras, ac montium cauernas in hospitium sibi delegerat; sed ne suam calamitatem irritarent Christiani, non nisi delapsa procella, fluctibusque cohibitis id fieri posse respondet. Et sanè difficillima sunt tempora, bonis inimica, religioni maximè infesta: & tamen quasi augeretur animus inter aduersa ad vicinos pagos se contulit, indeque literis ac hortationibus Christianorum animos erigebat; & si nullus ausus est eum intra limen admittere præter Ioannem Didacum, qui eo in oppido rempublicam administrabat. Eius domi Pater Boldrinus aliquot dies substitit, fructu minimè contemnendo. Decreuerat is stationem non deserere, ne infirmos neophytos non ita pridem ad

42 LITTERÆ ANNIM DC.XX. SOC.IESV
fidem conuersos in aperto salutis discrimi-
ne relinqueret; sed nimirum eorum preci-
bus obtemperandum fuit; sæpius tamen
eodem rediit, atq; adeò commodius Chri-
stianos instruxit, vt iam pro Christo mor-
tem non dubitarent oppetere. Si qui verò
desciuerant à fide, eiusdem opera ad pristi-
na religionis officia reuocati; post hæc alia
etiam Christianorum loca ab eodem adi-
ta, quæ vel audita prima inquisitionis sylla-
ba expalluerant; porrò omnes ita confir-
mati sunt, vt pro fidei defensione extrema
quælibet se passuros profiteantur. In his
mulier quædam cum esset remissior in per-
soluendis precibus, tantus ei torpor in ipsa
quiete corpus occupabat, vt nec vocem
vllam edere, nec signum crucis sibi met
posset imprimere; cumque sæpius hoc illi
accidisset, matris consilio priorem indili-
gentiam quotidiana persolutione, curaq;
attentiore compensauit, atq; adeò eo mor-
bo atque periculo liberata est.

Alius Neophytus, cum ægritudinis mo-
lestias ferre non posset, impatientia victus
ferro sibi mortem consciscere cogitabat.
Inter hæc somnus obrepit, mox Sacerdo-
tem

tem nostrum amplissimo quodam in loco
sacris operantem sibi videre visus est, seq;
inter ea mysteria pristinae valetudini reddi.
Fidem ei rei fecit. experfecto corporis &
animi salus reddita.

Pari modo, sed inopia longè maiore pre-
mebatur alius; hic dum se omni medicinæ
beneficio destitutum videt, diuinam opem
impensius exorabat, iamque morbi vis vsq;
ad supremum discrimen inualuerat, cum
quatuor Sacerdotes è nostra Societate in
antiquo illo & augusto Bungi templo inter
Missarum solemnia magnifico apparatu,
ac pretiosa veste trabeatos in somnis videt;
quorum vnus, cum ad eum propius acces-
sisset, manuque verticem tangens Euange-
lium recitasset, pristinae valetudini reddi-
tus expergiscitur.

Ciungocu, & Xicocu regna.

DVodecim fermè regna Ciungocu e-
numerat; quatuor Xicocu; hæc om-
nia P. Ioannes Baptista porrus virtute, stu-
dioque humanæ salutis insignis magno
Christianorum fructu peragrauit. Atque

vt

44 LITTERÆ ANNIM, DC. XX. SOC. IESV
ut à Regno Farimæ ordiamur; non defue-
re qui præclaris eius studiis, atque conati-
bus se opposerent. Tentata neophytorum
constantia; nonnulli etiam in vincula con-
iecti, ad alios nimirum deterrendos. Atta-
men prospera eorum fide ac religione non
sine magna virtutis ac fortitudinis laude
dimissi.

Eandem omnino constantiam præ se
tulere Matzungatæ Neophyti, qui licet
noui ac recentes in fide, veterani tamē ro-
boris ac fortitudinis specimen exhibent.
Centum ibidem baptismo lustrati, cum ta-
men ante præsentem procellam, ne ipsum
quidem Christianæ religionis nomen in-
notesceret; ut vel ipse Satanas, qui vicino
in oppido mulieris corpus occupauerat,
tantę sæcunditati inuideret, seque in illud
oppidum nihil posse testaretur. Et sanè
Deo agendæ sunt gratiæ, qui pulsas tene-
bris, veritatis in ea regione lucem paulatim
reuocat. Si quidem Christiana religio im-
proborum scelere agitata, dum novas late-
bras, & exilia quærit, novas quotidie terras
sua luce collustrat, quæ sanè res multò
maiores laboris ac patientiæ segetem So-
cietati

cietati nostræ suppeditat. Porro Sacerdotis nostri opera in iis erudiendis ac confirmandis extitit egregia.

Puella nouennis ad mortem ægrotabat; hæc matrem vtique Christianam; sed auum ethnicum habebat, cuius etiam domi educabatur, is igitur neptis periculum animaduertens, passim ea nomina suggerbat Nammu Amidabut, in quorum nominum inuocatione certissimum æternæ salutis fiduciam ethnici reponunt. Ad hæc puella subirascitur, atque ad illum conuersa, hæc, inquit, verborum monstra, atque portenta horreo, detestor, execror: in ea religione mori volo, quam mater (quæ tum aberat) mea profitetur: Cumque baptismum obnixè postularet, nec vllum faceret precibus aut lachrimis modum; tandem voti compos effecta elutum baptismali lactice spiritum edidit.

Rebus ita constitutis inde discedens Sacerdos Ocayamum Bigensis, regni metropolim petiit, vbi parem neophytorum constantiam, sed longè maiores fluctus reperit. Publico enim edicto iussi neophyti Christiana sacra reiicere, vel certè domo, laribus,

46 LITTERÆ ANNI M.DC.XX. SOC. IESV
bus, oppidis, regnoque faceſſere; quod illi
magna alacritate, nec minori ethnicorum
admiratione præſtiterunt. Cernere erat vi-
ros, ac mulieres ſua quemque prole ſuc-
cinctos deuictis hoſtibus glorioſo agmine
ferri, nudos illos quidem & pauperes; ſed
tamen cæleſtibus donis, atque virtutibus
longè ditiffimos; ea tamen exilii pœna mi-
litibus cōdonata, tametiſi in omnem aleam
hi quoque parati erant. Ex his vnus lin-
trem emerat, vt ſi minus terram premere,
certè in ipſo mari ac fluctibus, cum vxore
& filiis vitam traducere poſſet. Matrōna
quædam nobilis, coniugis timorem ac im-
becillitatem animaduertens, verita ne fi-
dem ac religionem ſuam Gubernatori ce-
laret, illum acriter monuit, ne ſibi eam la-
bem aſpergeret. Secus, ego, inquit, ibo, &
Chriſtianam religionem ante illum diſer-
tè reſtabor.

Ethnica mulier laborabat difficultate
partus, certumque ſuum & foetus exitium
non tam timebat, quàm expectabat. Vo-
uet ſi dolores remitterent Chriſtiana ſacra
ſuſcepturam: vix vota fecerat, cum dolor
omnis recedit, ac filium peperit; nec ita
multò

multò post cum vniuersa familia baptizata est. Mensem totum substitit Sacerdos in eo tractu. vtilitas eadem: adiuti neophyti, monitaq; tradita ad Christianam religionem fortiter retinendam, hanc suscepere nonnulli. Plures alii claro imprimis genere nati suscipere meditantur, sed mitiora tempora præstolantur; interea teneram prolem veluti fidei suæ obsidem Ecclesiæ dedere; nec dubia spes est religionis in eo loco propagandæ.

E regno Bigen Firoximam Achi regni principem urbem iter convertit, vbi Christiana religio altas olim radices egerat. Magnus adhuc Christianorum indigenarum numerus; aduenarum quotidie maior. Præter vsitatos fructus Ecclesiæ reconciliati nonnulli, sed prius ad dolorem admissi facinoris publica pœnitentia iniuncta, alii etiam ad fidem conuersi. In his vir primarius splendore nobilitatis clarus Christianam religionem à tribus annis maximè expetebat; sed enim eius fastigium ac nobilitatem veriti neophyti eiusdem vota comperendinabant. Nostri tandem Sacerdotis aduentus timores illos discussit, nouum-
que

que militem sacro fidei vmbone protexit. Mimasachæ regni neophytos eadem calamitas tetigit; sed ij nequaquam pericula veriti in studio pietatis perstiterunt. Hîc vero cum alia multa in hominum salutem gesta sunt, tum ethnici multi sacro baptismo consecrati.

Excursum eâdem peregrinatione ad interiora regna, Fochi, Inzumo, Inaba, quo nullus è nostris ad eam diem peruaserat. Fochi regnum Idolatriæ, si quod aliud, ad amentiam penè addictum est. Mons ibi totâ Iaponiâ celeberrimus perpetuis niuibusc rigens, ac spectrorum frequentia metuendus. Ibidem Dæmon sæuam exercet tyrannidem; sæpe præsentiam suam declarat, ac diuinos exigit honores. Ad eius radicem cœnobia permulta; Bonziorum greges innumeri; qui popularibus fucum faciunt, ac imperitiæ multitudinis superstitioni blandiuntur.

Ne hoc quidem exilium defugere neophyti; quorum exemplo, & consuetudine est spes fore, ut eæ quoque gentes errorum depulsa caligine splendidissimum veritatis lumen aspiciant, omnisq; illius regionis tartarea

tarea dominatio venerandæ crucis imperio dura colla submittat. Aduentantem Sacerdotem obuiam effusi neophyti omni officiorum genere prosequuti sunt. Pari quoque studio & diligentia in eorum salute elaboratum.

Huic regno aliud affine, quod Inzumo dicitur; plures ibi fideles, qui è variis regnis, atq; prouinciis acti eo confluxerunt. Cæterum præstita de more, quæ etiam tacente me ab omnibus intelligi possunt. Sequitur Inaba, cuius iter in ipso litore maris longè difficillimum est; idque propter aggestas arenas, quæ incedentium vestigia obruunt, gressumque remorantur. Hoc idem iter Sacerdos noster emensus, non sine magna difficultate Tottori principem urbem peruenit ubi Dominicæ Ascensionis festum pari fructu ac lætitiâ celebratum est. Inde in Insulam Auagi transmisit, quæ quoniam prima inter alias culta fuit, reliquarum parens vulgo appellatur. Ab ea Camis genus suum deducunt. Horum cultui dediti Insulani Euangelicæ veritatis lumen nunquam admiserunt; sed eam tandem invexere neophyti, quos Christiana
D religio

50 LITTERÆ ANNI M.DC.XX.SOC.IESV
religio fecit extorres. Horum exemplo
multos ibidem è cæcis perfidiæ tenebris,
ac errorum inanitate eductum iri spera-
mus. Eodem fructu & labore regnum Aua-
lustravit. Eius Dynastæ parens iam diu A-
cheronti debitus ex hac vita migravit: Is
Christianam religionem aliquando pro-
fessus ne præsentis vitæ regnum amitte-
ret, vna cum ipsa fide æternæ fælicitatis
spem omnem amisit; nequicquam adhibi-
tæ Bonziorum deprecationes, quos ex A-
uagi regno filius aduocauerat; quæ sanè res
ita illorum auctoritatem imminuit; vt ple-
rique ad Christianam religionem animum
adiecerint. Quocirca vberem in ea vrbe
messam speramus. Baptismo lustrati de-
cem, quorū inexpugnabilis virtus tam du-
ris temporibus futura videbatur. Det Deus
incrementa qui tam præclara dedit exor-
dia.

*Res Christianorum in Gochinai, Chinotuni,
& alijs regnis proximis.*

IN ea parte Iaponiæ quatuor è nostris
sanè quam vtiliter commorati sunt. Iti-
nerum

nerum labores ac difficultates, hospitiorum pericula, Christianorum constantia omnino eadem. Ingens confitentium, & communicantium numerus fuit, qui se ad futurum certamen iis præcipue armis ac præsidiis instruxerunt. Quingenti quinquaginta ab vno tantum è nostris cœlesti pabulo recreati, nonnulli etiam è remotioribus regnis ea de causa venêre. In his mulier sexagenaria trium dierum iter confecit; duplò longius nobilis alius vir opilionis habitu. His atq; id genus præsidiis plerique ad Martyrium instructi. Eius cupiditatem præ se tulere Elephantiaci quatuor nosocomiis, nec non Itunocuni, Tamba, Vacasa, Chinocuni neophyti quatuor regnis distributi, quos omnes vnus è nostris inuifit.

Neque verò Oracæ & Sacai in eo se superari patiuntur. hi enim, cum audissent, in vrbe Nangasachio nonnullos ob Patrum hospitia Martyrii lauream consecutos, plerique domos suas non sine suo, ac filiorum discrimine obtulerunt; in his vnus Christiano remige instructum nauigium sexaginta leucarum itinere misit; vt Sacerdo-

D 2

tem

52 LITTERÆ ANNI M.DC.XX.SOC.IESV
tem nostrum domum suam adueheret. In
summo capitis periculo versabatur alius;
sed tamen nullis, neque Christianorum,
neque Ethnicorum precibus adduci po-
tuit, vt Sacerdotem nostrum dimitteret,
quin imò nihil sibi optabilius esse respon-
dit, quam si viuis ea de causa cremaretur.
Alius adhuc catechumenus summis **preci-**
bus à Patre contendit, vt domum suam
diuerteret, simulque pollicitus est fore, vt
in speciem medicum ageret, vxorem ac fi-
lios alio dimitteret, quò facilius Christia-
ni eius domum venirent. Pictam Beatæ
virginis tabellam, quam domi habebat e-
legantissimè ornatam ostēdit alius, suamq;
& vxoris fidem quam in aduersa tabellæ
parte scripto obligauerat se prius vitam,
quam Christianam religionem amissuram,
eidem indicauit, eo nimirum consilio, vt
pia illecebra facilius domum suam allice-
ret. Sed enim lepidum vnus inuentum,
quod inter Christianos celebratum est,
hoc loco præterire non possum. Is Sacer-
dotem nostrum rheumaticum ac pitui-
osum hominem domi habebat, qui assiduo
screatu totius vicinix aures diuerberabat.

Veritus

Veritus neophytus ne peregrina tussis hospitium proderet, seruum aduocat: commune periculum aperit: iubet tamdiu se exerceat, quo ad Europeanam tussim simulato pectoris morbo ex arte referat; biduū in eo studio, atque imitatione traductum. Interim hospes Patrem monet, ad tempus secedat; mox vicinos Ethnicos ad epulas inuitat. Proximus dies conuiuio dicitur.

Adsunt conuiuæ, mutuam sibi salutationem dicunt, hospitis studium ac beneuolentiam, abundè commendant. Interim seruus ex angulo domus tussim laceffere, fauces asperare, inuita rheumata trahere. Mirantur conuiuæ, morbi genus interrogant, varia de more cataplasmata suggerunt, at is vehementius expuit, excreat, tussit, vix tamen lienem comprimit. Quid plura? fidem ac miserationem invenit, suspicionem auertit, periculum amolitur. Postridiè Sacerdos redit, hominem laudat, commenticiæ tussis beneficio fruitur.

Neque verò defuere, qui præter domum, operam etiam suam animorum utilitati consecrarent. Vnum aut alterum at-
texo. Optabat Sacerdos in speciem me-

54 LITTERÆ ANNI M.DC.XX. SOC. IESV
dici insulas ac regna sibi commissa lustra-
re. Deerat famulus qui fidem & autorita-
tem faceret, hoc munus sibi delegit neo-
phytus, quem genus & ætas commenda-
bant; is relicta domo, vxore, filiis, octo men-
sium spatio, terra, marique Sacerdotem
sequutus, pedisequum egit, eidemque in
omnibus præsto fuit.

Idem benemerendi de animis institu-
tum tenuit matrona quædam nobilis; hæc
statis temporibus, Christianas mulieres,
quibus ethnici viri, aut parentes impedi-
mento erant, domum suam vocabat, qui-
bus in vnum coactis aderat Sacerdos, qui
post salutarem criminum detestationem,
cœlesti eas pabulo recreabat.

Tam copiosis exercitiorum fructibus
Satanas inuidebat, ac neophytos vexare,
quibus solet artibus conabatur. Ædes e-
rant cuidam Christiano, siue malo Demo-
ne, siue hominum præstigiis infestæ: te-
ctum sæpè vulpem simulans occupabat,
cuius immani gannitu, ac strepitu tota do-
mus personabat. Fores adeò strenuè vapu-
labant, vt ad earum crepitum frequens
ethnicorum turba cogeretur; hi sæpius ho-
minem

minem monent Christianam religionem eliminat, fore ut ea ratione pristina domus quies redeat. At is repudiatis ethnicorum consiliis Sacerdotem nostrum adit, commemoratisque, quas pateretur, iniuriis auxilium postulat. Ea re cognita reliquiariam crucem homini dat, qua statim illatâ domus quieuit, ac siluit. Iustiore Dæmonis obsidione ethnicus tenebatur, iisque intemperiiis agebatur, ut ferro ac vinculis coercendus esset, ne quò præceps rueret, vel in aliquem irrueret. Ardebant oculi, ac toruos figere in obuium quemque videbatur obtutus. Porro lapides ac ligna quæ fortè Dæmon suggerebat, ex ipso ergastulo iaciebat tanto conatu, ut ne ipsi quidem parentes propius accedere auderēt. Hunc igitur cum vidissent neophyti duo, qui de tonso vertice vitam segregem agebant, ad eum propius accedunt, funibus alligant, mox etiam virgas expediunt; at ille diuinam procul dubio virtutem in illis agnoscens, eorum pedibus allabatur, iram, ac furorem deponit, & quamvis flagris concisus, ac vibicibus notatus; mira paciētia perstitit: quæ sanè res magnam apud ethnicos

56 LITTERÆ ANNI M.DC.XX.SOC.IESV
Christianæ religionis opinionem conciliauit. Bonzii filius Christianam religionem suscepit. Huius conuersatione mater ethnicæ prauitati peruiacissima addita ita furere cœpit, ut eum diris omnibus deuoueret, malleque se diceret non genuisse, quàm Christianum aspicere; tam altè errorum effusa caligo stultorum mentibus insedit. Ea de causa septem ipsos annos ab eius congressu prorsus abstinuit. quo tempore nulla inter eos commercii, cibiue, ne sermonis quidem communicatio fuit. Tandem mulier filii constantiam admirata, quippè qui debitum alioqui parentibus obsequium Christianæ legi posthaberet, catechistam adit, ac rogat, ut sibi religionis capita breuiter exponat; fecit is quod mulier postulauerat. Cum ad Christi mortem & passionem ventum est, eisdemque ad cœlos ascensum, madentibus vberi fletu genis diuturnæ cæcitati suæ ingemuit, omnem peruiaciam exuit, sensimque in se probauit, quod antea damnaverat in filio. Quocirca baptismo expiata Annæ nomen accepit. Id verò alius eiusdem filius ita indignè tulit, ut eadem omnino

nino matri comminaretur, quæ ipsa in filiū peccauerat. At illa nihili se eius minas facere respondit. quæcunque maneat fortuna, a Christiana religione nunquam discessuram; etiamsi fame sibi pereūdum sit. Et sanè quo se præbuit antè in amplectenda veritate durior, eo nūc est in eādē fouenda, ac retinenda constantior.

Illustris etiam fuit vnus Bonzii conuersio, qui ob insignem doctrinam, ac Iaponicarum legum peritiam, eam doctrinæ laudem adeptus est, vt nemo ex iis qui Cioro insignibus, ac titulis cohonestati sunt. in iis rebus quæ ad Iaponicam philosophiam pertinent, coram eo mussitare auderet. Hunc igitur, cum è graui morbo iam propè animam ageret, Christianus eius Nepos interrogauit, quodnam esset id temporis eius de æternâ salute iudicium? At is post multorum annorum meditationem apertè confessus est in Iaponia Philosophia nihil constans, nihil solidum reperiri: si hoc ita est, inquit nepos, igitur Christiana religio verum salutis iter ostendit. Ad hæc Bōzius; scire, inquit, velim quid Christiana religio doceat. Itaque vocatus in id
D 5 ipsum

58 LITTERÆ ANNI M.DC.XX. SOC. IESV
ipsum Doiucus (Catechistæ nomen est)
præcipua illius mysteria declarauit; quæ
cum audisset miser, resumpto Spiritu mul-
tis cum lachrymis quasi de cœlo missum
intuetur, tantaque ei lux veritatis oborta
est, vt, abiectis ethnicorum globulis, quos
præ manibus habebat, auitam superstitionem
eiurauerit, sibi que Christianam religionem
necessariam esse intellexerit, Itaque
summa omniū admiratione baptizatus
Iesu ac Mariæ nomē ingeminans haud
ita multò post ex hac vita discessit. Decen-
nis filius ditissimo cuidam neophyto erat,
quem vnicum vnice diligebat. Is cum in
morbum incidisset, statim parētes monuit
ac domesticos, non tam corpori, quam ani-
mo medicinam facerent; cumque medici,
qui illum inuisebant, constantem, certam-
que spem facerent reparandæ valetudinis;
ipse tamen in suam spem cōtra spem cre-
dens, semper pro certò affirmauit sibi esse
moriendum. Itaque expiatis confessione
peccatis quarto ægritudinis die, vt ipse
prædixerat, inter pios de Deo, ac cum Deo
sermones emoritur.

Non minori admirationi fuit trimulus
puer,

puer, ac penè infans, is cum in extremis
ageretaquam lustralem petiit, eademque
sibi crucis signum impressit. Mox B. Virgi-
nis Iconem in ea ætatula magna pietatis
significatione inter vlnas accepit, ac ho-
noris causa supra caput extulit. cumque
eius avus sanctissima Iesu & Mariæ nomi-
na suggereret, nec iam lingua explicare pos-
set, capite bis annuit, simulque expiravit.
Magna etiam aut fortasse maior apparuit
Dei benignitas erga Christianum homi-
nem. Is cum nostrum Sacerdotem quo-
dam in oppido versari intelligeret, bidui
iter emensus eundem adiit, ac peccata per
confessionem aperuit. Idem domum re-
uersus grauissimo implicitus morbo natu-
ræ concessit; sed hæc hominis fælicitas, vel
vt melius dicam, diuinæ bonitatis argumẽ-
tum. At illud virtutis ac pudicitiae nobile
testimonium, & quidem in nobili puella;
quæ cum virginitatem suam Deo vovisset,
multa honesta delata connubia cognatis
reclamantibus forti animo repudiavit; &
quãuis seruilibus ministeriis addicta, maluit
ollas, ac cacabos terere, quã animi sui cãdo-
rem, voti; religionẽ ac sanctitatẽ polluere.

Miaci

*Miaci nova contra Christianos procella
commouetur.*

VOlens, nolens Miacum reuertor, vbi
 grauem Christiani sustinuere tem-
 pestatem. Et sanè non possunt iam sine
 maiore huius Ecclesiæ calamitates refer-
 ri. Vix enim è superiore procella, neophy-
 torū pietas recreari cœperat, cū nouus in-
 tercurrit turbo, & veluti cœlum inuoluēs
 nebula, quæ omnē siue perceptæ siue spe-
 ratæ segetis lætitiā ademit. Ita aliæ alias
 calamitates semper excipiūt, ac noua sem-
 per doloris ac tristitiæ causa aperitur. Cū
 enim perditī ac sceleratī aliquot homines
 ignem huic vrbi inieciissent (qui longè la-
 teq; vagatus magnum eius partem absum-
 psit) neque verò eius incendiī author ita
 facilè appareret, inde ansam arripientes
 ethnici ingentis flagitiī scenam parant,
 ignemque illum à Christianis immissum
 criminantur; vt nimirum Martyrum suo-
 rum, siue manes expiarent, siue etiam ne-
 cem vlciscerentur, id quod illi in amico-
 rum funeribus præstare consueuerūt. Fre-
 mere

inere vulgus & acceptam in re domestica
cladem quiritari; partim etiam conuiciari,
& minari apertè. Hi exterminandos neo-
phytos, alii agendos in patibulum, igni cre-
mandos alii dictitabant, postridiè manè
plebs collecta vesano fremitu appellare,
interpellare Principes viros, incensum à
Christianis oppidum vociferari. It popu-
lus furens ad Gubernatorem, conuiciis ac
querelis ipsius aures onerāt, ac præter op-
pidanos, Nangasachii neophytos, ac Iapo-
nicum nauarchum, qui Amacao venerat,
ibidem pecunia corruptum insimularet.
At is populatē leuitatem comprimen-
dam ratus, longè aliud Christianorum in-
stitutum esse respondit. quippè qui ob æ-
ternam salutem extrema omnia pateren-
tur, nec ulli mortalium ea de causa dam-
num aliquod inferrent. Verum cum inci-
tatus populi furor minimè acquiesceret,
cessit Gubernator iratorum amentia, ius-
sitque publico edicto neophytorum no-
mina in album referri, tum eorū qui Chri-
stianam religionem à tribus annis abiura-
uerant, tum illorum qui ab illius studio ac
confessione dimoueri minimè poterant.

Per

Per urbem volitare Satanæ satellites, atq;
 è grege Euāgelico prædas abigere; Ac pri-
 mō quidem nauarchus in carcerem trudi-
 tur, mox etiam domus sus deque vertitur:
 sed cum nullum impositi facinoris argu-
 mentum appareret, eiusdem Gubernato-
 ris iussu liber dimittitur. Hinc Ethnicis
 permixti lictores ad neophytorum domos
 discurrunt, ni Christianam religionem de-
 serant, fore ut eos tanquam reos eius cri-
 minis ad Gubernatorem deferant iisdem
 comminantur. Nec defuere qui ut eorum
 amentia, ac furori se subtraherent, nō tam
 Christianam religionem defererent, quā
 deferere se comminiscerentur, cumq; iu-
 berentur aliam sectam deligere, simulque
 ad Bonzios raperentur, ut iisdem nomina
 darent, hoc illi se facere profitebātur; non
 quod eiusmodi sectam ex animo colerent,
 aut veram existimarent, sed ut eius incēdii
 calumniam subterfugerent. Sed illud im-
 primis eorum miseriam ac dolorem incen-
 dit, affixæ scilicet pro toribus ædium pa-
 gellæ, quæ & crimen detegebant, & eius-
 dem ignominiam propagabant; sed ea la-
 bes & macula paucis admodum adspersa,
 nam

nam plerique Christianorum in sententia
perstiterunt, ac ne Christum desererent, ipsius
exilii ærumnas patriæ commodis prætulerunt.

Horum exemplum secuti sunt Fuximi
Neophyti, quæ vrbs duabus in de leucis di-
stat; hi ferè omnes ob Christianam religio-
nem profugi conductis ædibus habitabāt,
cumque earum domini fugam suaderent,
donec ea tempestas remitteret; id verò illi
Christiano nomine indignum asseruerunt,
malleque se omnes ad vnum occidi, quam
eiusmodi notam Christianæ religioni im-
primere. Ad eandem pugnam Cracæ neo-
phyti se comparabant, indicta in id ipsum
40. horarum supplicatione; sed immunes
ab ea clade fuerunt.

In regno tamen Farimæ, ac Bigen alii
in vincula, alii in exilia coniecti. Dum hæc
agerentur Gubernatoris filius ex curia re-
diit, qui iam antè ob parentis senectutem
in eius locum suffectus erat. Is acriter Pa-
trem ac ministros reprehendit, quod eius-
modi edictum promulgassent; quippè qui
illatam pro religione necem non modo
non vlscerentur, sed etiam libentissimè
fulci-

64 LITTERÆ ANNI M.DC.XX. SOC. IESV
susciperent; ac proinde premendos fuisse
vulgi rumores, non augendos & amplifi-
candos. Ad hæc insignem sibi à deliro pa-
rente initio regiminis notam inustam que-
stus est; nec immerito, si quidem patefacta
deniq; turpiū mendaciorum scena ignem
illum ab ipsismet ethnicis immisum fuisse
compertum est, ut in patriæ direptione &
exitio, aliqua ad ipsos prædæ portio perue-
niret; ita in optima causa Dei tandem be-
neficio triumphatum est; nam & ij, quos
pænæ timor mentiri coëgerat, ad Ecclesiæ
gremium venire, & qui constantes in fide
fuerunt, magnum cepere fructum suæ for-
titudinis.

*Missio ad regiam urbem Iendo in regno Illu-
saxi, & ad alia regna Quantô.*

IEndi ciuitas, quæ Xonguni regia est,
Miaco distat in orientem leucas circi-
ter octoginta; multi ibidem Christiani
nominis cultores, partim indigenæ, par-
tim etiam aduenæ, qui ex omnibus lapo-
niæ regnis illuc confluunt. Hos igitur P.
Benedictus Fernandus Lusitanus inuisit,
ac

ac opportunis sacramentorum præfidiis contra communem hostium oppugnationem instruxit. Sed primo Omi, Mino, Oari regna lustravit, in quibus aliqui Christiani degunt, quos in singulos annos nostri adire consueuerant. Hi omnes ita se gerunt; ut non modò constanter in suscepta religione perseverent, sed etiam suo ad virtutem exemplo ceteros prouocent. Et quidem Icinomiæ neophytos operarios tantum diuinarum rerum studium cepit, ut certum in locum sæpè se conferant, ubi de cultu diuino differunt, admonentque inuicem sese, & ad religionem hortantur; quin imò cum eius loci dominus ad auitas superstitiones illos compellere decreuisset, sese omnes ad mortem obeundam egregiè compararunt; quod cum dynasta rescisset, ne tot hominum iacturam faceret, consilium postea mutauit. Horum exemplo ethnici nonnulli Christiana sacra suscipiunt. Cæterum illius aduentu neophyti confirmati, & opportuno Sacramentorum præsidio muniti. Inde profectus Sacerdos alia tria regna obiuit, Ixe, Micaua, Totomi, ubi fuit mirum quantum sibi Christiano-

E

rum

66 LITTERÆ ANNIM.DC.XX.SOC.IESV
rum animos adiūxerit; atque vt alios omit-
tamus Elephantiacum adiit, qui solus in eo
oppido Christianam religionem suscepē-
rat, nec dum peccata per confessionem a-
peruerat, sed vt eius domesticos, ac pro-
pinquos falleret, qui Ethnici erant, medici
nomen ac munus assumpsit. Porro, quæ
fuerit ægri voluptas, per se quisque conii-
cere potest; in digressu maximas ipsi quoq;
domestici gratias eidem retulerunt, nec
vllum faciebant medici laudandi finem,
quippe qui ægrum nunquam antea visum
eo officii genere sibi obstrinxisset.

Multos Surunga (vrbis ac regni nomen
est) Christianos enumerat. Cepit & hic Sa-
cerdos ex suis laboribus satis vberes fru-
ctus. Triduum apud illos traductum, quo
tempore Elephantiacos neophytos, qui
extra urbem morātur inuifit. Horum præ-
cipuè curam gerunt Ill^{mi} Christi confesso-
res duo, quibus olim pedum, ac manuum
digitos, ipsosque poplites Daiphus recidi
iussit. Hi optima vtuntur valetudine, ac
eius vrbis neophytos confirmant, monita-
que tradunt ad Christianam religionem
fortiter retinendam, ac vicissim ab illis, ob
egre,

egregiam eorum fidem, atq; constantiam;
magno in honore ac veneratione habentur. Surungæ ditionem excipiunt regna
Quanto, e quibus Idzu primum occurrit.
Præcipuum illius oppidum Mixima, quod
frequētibus vicis habitatur. Christiani ibi-
dem triginta. Hos omnes confessione re-
purgatos sacrâ Eucharistiâ refecit; multi
non solum in eo oppido, sed etiam in aliis
circa positis Baptismi desiderio tenentur.
Ipsi verò Christiani liberè agunt, nec vllam
in rebus fidei, ac religionis patiuntur mo-
lestiam. Post hæc Sacerdos Sangami re-
gnum pari Christianorum vtilitate lustra-
uit; ac tandem Iendum. vrbem Xonguni
regiam; ac Musaxi regni caput peruenit.
Non numerauerim in edias, vigilias. labo-
res, & pericula, hæc enim omnia inter vfi-
tata recensentur. Et quoniam multi in ea
vrbe Christiani sunt; quinquaginta dies
ibidem commoratus est, priuatis collo-
quiis, nocturna Sacramentorum admini-
stratione, neophytorum instructione eas-
dem peperit vtilitates. Aliquæ etiam Chri-
stianæ mulieres, quæ in aula regia Xongu-
no deseruiunt, mira arte atque industria

Patrem adiēre, atque ab eodem pœniten-
tiæ Sacramento expiatæ cœlesti pabulo re-
creatæ sunt. Mulier ibidem degebat, quæ
Christianis parētibus orta octauo post die
baptizata fuerat, sed inter ethnicos educa-
ta suscepti baptismatis ignara, ethnicos ri-
tus ac superstitiones sequebatur; hæc tan-
dem neophyto nupsit; is vtique ratus vxo-
rem ethnicam, pari inscitia mulierem,
Christianis Sacramentis initiari curauit;
sed cum in rebus diuinis quotidie remis-
sior appareret, Sacerdotem nostrum ad-
monuit, qui cum ab eadem muliere genus,
patriam, parentes interrogasset; bis sacro
fonti admotam reperit. Tum demum eius
cōsilio generalis vitæ confessionem insti-
tuit, Missæ sacrificio interfuit, quod trigin-
ta annorum spatio (totidem enim agebat)
nunquam audierat, ac tandem pietatis of-
ficia colere cœpit.

Alii item à multis annis confessione in-
termissa in summa religionis negligentia
ac peccandi licentia viventes enormem
vitæ consuetudinem correxēre. Sed inter-
alios iuuenis tam locuples auro, quàm in-
ops apud Deum meritis, qui publicum
munus

munus in curia gerebat. Is mōitus à Patre nostro, vt, abdicatis illecebris, æternæ salutis consuleret, repetitâ ab ineunte ætate peccata per confessionem aperuit: mox etiam pia librorum lectio in illo æui freto tantum in pietatis studio profecit, vt omnibus neophytis admirationi esset, & quoniam magnam pecuniæ summam præ manibus habet, officii sui rationes patris arbitrio permisit, atque ex eius præscripto impostum sibi munus exequitur. Huius vestigia sequuti sunt alii duo viri prænobiles, qui licet à multis annis salutaribus aquis immersi, nunquam tamen Christiana officia ad eam diem coluerant. Oborta de cælo luce, ita se rebus diuinis manciparunt, vt multi eorū exemplo ac suasionibus Christianam religionem amplectantur; & quoniam consilio, & autoritate plurimum valent, apud quendam dynastam, qui multis vrbibus imperat, eorum precibus sedem ac domicilium in eadem vrbe, in qua residet, Sacerdoti nostro se daturum promisit.

Fœmina quædam primaria nobilitate, atque opibus florens, cum mariti sui nutricis opera puellas & ancillas suas ad Christi

70 LITTERÆ ANNI M.DC.XX.SOC.IESV
fidem conuersas intelligeret, cum eadem
queri cœpit, quod sibi iter illud, quod ad
æternam salutem ducit minimè indicasset.
Ad hæc nutrix, quamuis alioqui rudis, præ-
cipua Christianæ religionis myſteria ape-
rit: quibus illa auditis adeò permota eſt, vt
ſtatim idola proiecerit, conſuetas præcan-
di formulas didicerit, pioſque libelloſ, ac
icunculoſ eiufdem nutriciſ beneficio ſibi
comparauerit. Ex eo tempore ethnicoſ ri-
tuſ ac ſuperſtitioneſ auerſari, rerum diui-
narum contemplationi vacare, feſtoſ dieſ
colere, ſanctiſſimiſ Eccleſiæ legibuſ obtem-
perare, vetitoſ inter hebdomadam ciboſ
reſpuere, Chriſtianis pauperibuſ eleëm-
ſynas mittere, & alia caritatiſ, ac religioniſ
munia obire. Sex integroſ annoſ in hac
pietatiſ palæſtra ſe exercuit, ita vt ipſiſ et-
iam ancilliſ admirationi eſſet, ſola ſacri la-
ticis aſperſio deſiderabatur, & quoniam il-
lam Sacerdoſ noſter domi ſuæ adire mini-
mè poterat, id quod ipſa ſummopere deſi-
derabat, Chriſtianam mulierem optimè e-
doctam ſubmiſit, quæ munuſ illud obiret.
Itaque baptiſmo luſtrata Diuæ Magdalenæ
nomen ſibi delegit, quam illa præcipuo
quodam

quodam animi sensu colebat; quæ sanè res Christianos omnes in admirationem rapuit.

Eo potissimum fructu lætus Sacerdos Numatam excurrit, quod oppidum est in regno Codzuque, eoque maiore studio ac beneuolentia exceptus est, quod in iis finibus hominem de Societate nunquam viderant. Hoc idem studium ac beneuolentiam in ipso digressu maximè declararunt, si quidem ea vis fuit lachrymarum, vt præ nimio dolore Christiani loqui non possent; ipsæque mulieres, quæ alioqui pedem efferre solebant minimè, è domibus egressæ magno agmine, multisque cum lachrymis abeuntem profecutæ sunt, ex quo facile apparet, quàm arctis officiis sibi illos deuinxerit. Tredecim dies ibidè substitit, quo tempore neophyti præcipites imbres è cœlo petebant; vt eius secessum remorentur. Et sanè Deus piis eorum votis, ac precibus annuisse videtur, si quidem multi eo tempore Christianæ legis mysteria edocti; sed præcipuè tres eiusdem oppidi splendidis orti natalibus, quorum duo eius loci dynastæ ephebi honorarii erant; sed prius

72 LITTERÆ ANNI M.DC.XX. SOC. IESV
eos Sacerdos noster admonuit, viderent
omninò quid agerent, quod ué onus susci-
perét, teneri ipsos ipsomet sanguine Chri-
stianam religionem asserere. Ad hæc iuue-
nes ea omnia sibi cognita iamdudum esse
respondét, fore vt nihil omnino, siue Chri-
stiano nomine, siue genere suo indignum
committant, quibus quasi præludiis rudi-
menta ponunt militiæ robustioris. Ea res
parentum etiam studium excitauit, ij pari-
ter Christianæ legis præcepta audierunt,
ac baptismi suscipiendi spem non dubiam
fecerunt.

Foccacæ regna.

INde Sacerdos recedens Ietzu præter-
gressus regnum, confirmatisq; neophy-
tis Canazauam præcipuam regni Canga
urbem contendit, quæ tribus mensibus ob
Christianorum multitudinem illum deti-
nuit; mirum quantum eo temporis spatio
profecerit, ac Christianorum animos ac-
cenderit. Sed quod omnium plurimi fa-
ciendum est, iuuenis cuiusdam nobilissima
conuersio omnibus admirationi fuit, quip-
pe qui

pe qui non modo eius regni dynastæ, sed ipsius etiam Xonguni Regis consobrinus sit. Is baptismum sæpe postulauerat, sed veriti neophyti ne fortè aliquis inde tumultus oriretur, tempus opportunius expectandum esse dicebant. Id cum rescisset Sacerdos noster confirmatis neophytis, iuuenem quidem Christianæ legis præceptis instituit, sed vt eius constantiam exploraret, satis illud sibi videri significauit, interim pietatis ac religionis studium coleret, sibi quidem eius baptismum cordi futurum. Ad hæc Iuuenis respondet: nolle se inde abire, nisi expetito baptismo, lustratum; itaq; communi omnium gratulatione baptizatus est.

Eam omnino lætitiâ cumulauit inopinata cuiusdam mulieris conuersio; Fuit hæc inter Christianos educata, sed in sua superstitione ita pertinax, vt sæpe de ea deferenda laceffita in sua semper duritia firmior hæreret, nostrumque nomen auersaretur; quin imò cæteris mulieribus, quibuscū viuebat, ad fidem conuersis, se vnam in auita religione perstitisse gloriabatur. Eadem à nostro Sacerdote de fide compellata,

74 LITTERÆ ANNI M, DC. XX. SOC. IESV
lata, ne verbum quidem vnum in animum
admisit, sed cum postea salutaria eius mo-
nita identidem occurrerent, intimis reli-
gionum stimulis agitata, eidem significa-
uit, velle se Christiana sacra suscipere; cūq;
Sacerdos noster responsum distulisset, id
adeò ægrè tulit, vt præ nimio dolore in
morbum inciderit, eā de re certior factus
Sacerdos catechistam præmisit, qui Chri-
stianæ fidei capita illam doceret, & quam-
uis valetudine nondū confirmata, Patrem
adiit, atque ab eodem non sine magna neo-
phytorum admiratione baptizata est. Ro-
gata quidnam denique illam in eam men-
tem impulisset; ob eam rem, aiebat, se ad
Christiana sacra conuersam, quod Sacer-
dotes nostros videret tanto cum labore, ac
periculo, e mentito habitu regna, ac pro-
uincias obire, vt Christianos inuiserent, ac
solarentur.

Addebat quod vnus ex iis munus quod-
dam repudiauerat, quod à neophyto mis-
sum fuerat; ac proinde venisse sibi in men-
tem Christianorum legem, quæ talia cari-
tatis officia imperat, cæteris legibus opor-
tere præstare.

Ethnica

Ethnica mulier è patrio regno, vbi nullus Christianorum erat, proscripta (quod apud Iaponios commune est) huc se contulit, vt ab ethnico homine sibi antea cognito opem, & auxilium postularet. Hunc Christianæ mulieri matrimonio iunctum reperit, quæ & illam domi accepit, & vt Christianam religionem susciperet, breui persuasit. Interim ethnica mulier in morbum incidit, ac intra octauum diem baptismo expiata, omnium ærumnarum finem inuenit.

Neque verò omittendum videtur, quod Christiano cuidam in alio tamen genere accidit. Is propter Sacerdotum penuriam decem ipsos annos pœnitentiæ Sacramento caruerat, cum varias interim prouincias obiret, vt victum sibi eâ ratione compararet. Tandem Canazauam appulit, vbi ethnicum propinquum habebat, à quo domi exceptus in lepram incidit. Quinque integros annos morbo implicitus ibidem hæsit. Tandem cum morti proximus videretur, illum propinquus adit, ac rogat, num aliquid habeat, quod in mandatis sibi relinquat, se enim cum fide omnia præstiturum;

76 LITTERÆ ANNI M.DC.XX. SOC. IESV
rum; simulq; monet quam coleret sectam
aut religionem aperiat, vt cum ipso funere
funebres etiam preces pro illius animi sa-
lute adhiberi curaret. Ad hæc æger tamen
si ad eam diem iustis de causis illum cela-
uerat, se Christianum esse declarat, nec
aliud ab eodem velle, nisi vt se Christiano
ritu sepeliri curaret. Is neophytū amicum
primarium hominem in eodem oppido
habebat, cuius domi tum fortè Sacerdos
latebat. Hunc igitur adit: ægri periculum
ac desiderium aperit: ea re cognita neophy-
tus operam suam pollicetur, ægrū inuisit:
ac rogat vtrum confiteri velit. At is nihil
aliud se optare respondet: hunc itaq; mo-
net anteaactæ vitæ crimina cogitet, seque
in proximam noctem instruat. Cumq; iam
dies abiisset Sacerdos noster eiusdem neo-
phyti famulum simulat se, ægrum inuisit,
confitentem audit, ac salutaribus ad eam
luctam monitis instruit. Postridie Ethnicus
ad amicum redit, quidnam proxima nocte
propinquo suo dixerit, interrogat. illum e-
nim tanto exinde gaudio perfusum, vt præ
lætitiâ gestire videretur; cuius lætitiæ cau-
sam cum ex eo, inquit, interrogassem; non
posse

posse me ut pote Ethnicum eius sortem, atque felicitatem agnoscere respondit: nec ita multò post æger æquissimo animo migravit è vita.

Huius regni Christianis instructis ad Notò regnum iter conuertit, & quamquam multa adiret vitæ pericula diuina tamen prouidentia factum est, ut ethnicorum semper manus effugerit. Porro Sacerdotis nostri labor fuit in ijs erudiendis; atque ad Sacramèta Ecclesiæ præsertim percipienda eorum animis comparandis. Neque verò insignem cæci cuiusdam virtutem ac religionem prætermiserim; qui cum cæteris rebus pietate prælucet, tum hortandis ad constantiam neophytis. Is domi suæ quasi pietatis scholam instituit, ac facellum domesticum exornauit, quò neophyti frequenter conueniunt, non tantum placandæ iræ numinis, sed etiam hauriendi causa monita ad pietatem & Christianæ religionis documenta. Atque is potissimum fructus est, quem è difficillima peregrinatione Sacerdos noster retulit, præter multos baptismo lustratos, & alia caritatis officia, quæ inter vsitata omittuntur.

Regnum

Regnum Oxii.

DVo è nostris in eo regno versantur; qui paucorum mensium interuallo Sacramentorum administratione adeo profecerunt, vt planè alia rerum facies in eo orbe cernatur. Labores & incommoda quæ pertulerunt, nec pauca fuere, nec leuia, sed ea tamen diuina solatia, & cœlestes dulcedines compensarunt. Præter vfitatos fructus nongenti sexaginta sex baptismo lustrati. In regno Iecingo aliquot Christiani degunt, quos P. Hieronymus de Angelis vnus è duobus, qui in regno Oxii versantur inuifit, ac inter alios ethnicum adolescentem reperit, quæ malus Dæmon frequentibus spectris agitabat. Huic varia medicamentorum genera suggerebat, quibus etiam morbos depellebat; sed in primis aurifodinas quasdam ostendit, in quibus eruendis eius propinqui oleum & operam perdiderunt. Cumque Adolefcens quotidie magis lurore ac macie conficeretur, neophytus quidam cereum ei dat agnum, quem de ceruice suspendat. Post hæc iterum

rum Satanas Iamabuxi specie (Bonziiorum genus est, qui dæmonem adorant, contracto supercilio se eidem obtulit, ac extremum valedixit, quod nimirum (vt idem aiebat) scirent illū Christiana sacra suscepturum; paulo post adolescens Sacerdotem nostrum adit, ac vnâ cum domesticis ac propinquis baptizatus est, eâque ratione fœda spectra à se repulit, atque à Diaboli tyrannide liberatus est.

Idem sibi ius in ædibus ethnicis sumpserat Dæmon, ita vt nullam quietem domestici capere possent, quidquid erat in illis magno impetu ad terram affligebatur; ad hæc lapides iaciebantur adeò ingentes, vt nemo pedem in illas inferre auderet: vocati in id ipsum Bonzii, vt consuetis deprecationibus ea spectra fugarent. Sed quò plura carmina deblaterabant, eò maiores certiore ictu etiam lapides perpluebant; quin imò vnus ex illis, talis pugnæ insolens adeo grauius est vulneratus in dorso, vt & precibus finem faceret, & fugæ initium. Cumq; ea res ad neophytorum aures peruenisset, statim accurrunt, iubent domesticos spem omnem in vno Deo collocare,
penes

80 LITTERÆ ANNI M.DC.XX.SOC.IESV
penes quem est rerum omnium potestas,
& seuerum in fœda hæc monstra impe-
rium; mox etiam domum fidenter ingressi
Christianam religionem domesticis sua-
dere cœperunt. Interim lapides quidem
mittebantur, sed multò remissius atque in
aliam domus partem, ita vt neminem læ-
derent, cumque ibidem etiam cruces ali-
quot disposuissent, iam non intus, sed circa
domum iaciebantur: Deniq; lustrali aqua
circum quaque perspersa omnis tumultus
dæmonum conquieuit, id quod multis de-
inde gratiis, sed inprimis ipsa baptismi su-
sceptione domestici omnes testati sunt.

Quotempore Sacerdos noster de mo-
re pagos obibat, mulieri Christianæ per
quietem homo quidam apparuit, qui post
tres dies Sacerdotem nostrum illuc ven-
turum significauit; is rogatus à muliere de
nomine Sacerdotis, nomen aperuit. Cum
diluxisset, viro suo somnium narrat, ridet
ille mulieris ludibrium, simulque iubet ne
Christianis ea de re verbum faciat, quan-
doquidem is Sacerdos ducentis ferè leu-
cis abesset. Inter hæc ab eodem Sacerdote
litteræ superueniunt, & fortè ad eundem
hominem

hominem datæ erant, in quibus illud vnum interrogabat num oppidani peccata per confessionem aperire vellent, se enim propediem ad eos venturum: Quocirca Sacerdotem nostrum tanquam à Deo missum exceperunt, perque eam occasionem exposuere omnes pænitiæ Sacramento quid quisque dolendum egerat in vita.

Cum huius regni dynastæ impiam illam Xonguni sententiam inaudissent, qua tot Christianos cremari iusserat, vt sibi ac regno suo consulerent, neophytos omnes, qui in sua ditione versarentur à Christiana religione reuocare decreuerunt, quod cum iis, qui in prouincia Nambu commorantur, nunciatum esset, multorum dierum itinere ad Sacerdotem venerunt, vt nimirum pænitiæ Sacramento ad futurum certamen se instruerent. Ethnicus ibidem agebat, qui Christianæ religionis desiderio tenebatur, is cum intellexisset Christianos ad Sacerdotem properare, vt explicatis confessione criminibus pro Christiana religione mortem oppeteret, eosdem sequutus est, ac baptismo munitus vnâ cum aliis eodem animi decreto domum rediit. De-

F

uexa

uexa iam ætate senex (annum agebat septuagesimum sextum) qui à duobus annis baptismum susceperat, cum ambiguo fortè rumore inaudisset Christianos proxima nocte occidendos, tenui domus suppellectili aliis pauperibus distributa in genua procumbuit, idemq; vxori suadens totam noctam in precibus exegit, mortem in singula penè momementa expectans, sed cum nulla Christianis molestia inferretur, nihil omnino, quo vitam tóleraret, eidem super fuit; ea res ad eius domini aures momentò peruenit, is igitur senem aduocat, rogat num se proxima nocte ad mortem comparauerit? cumque is affirmasset, eius fidem atque constantiam laudat, sed tamen bono animo esse iubet, nullamque domi suæ molestiam eidem inferendum pollicetur.

Alium Neophytum, qui recens è baptismo emerferat, eius dominus ad defectiorem vrgebat, cumque eam maculam suscipere in se detrectaret, filios, vxorem, ac rem familiarem eidem abstulit, quam ob rem ethnici miseratione commoti eidem suadere nitebantur, vt externa tantum specie
stata

stata ethnicorum munia obiret, intus Christi religionem animo impressam retineret. At is nuper se ad fidem conuersum esse respondet, nondum planè Christiani hominis officia sibi perspecta esse, fore ut ea super re baptismi susceptorem consulat, qui tribus inde leucis aberat: hunc igitur adit ac consulit, doctus ab eodem non licere religionem simulare, hoc ipsum ethnicis retulit, quibus etiam significauit, vxoris & filiorum iacturam & captiuitatem vehementer dolere se, sed tamen æternæ saluti omnia posthabenda. Itaque relictis omnibus in quoddam Christianorum oppidum se contulit, vbi afflictam illam fortunam non æquo tantum, sed excelsa etiam animo perfert, quin semper diuinæ maiestati gratias agit, seque ad asperiora in dies à diuina manu excipienda comparat.

Addam postremo loco admirabilem vndecennis pueri in fide constantiam. Erat hic Christiano patre natus, sed eodem postea desertore, proles utique stirpe melior; hunc igitur pater sollicitabat, ut Christianam religionem abiuraret, quādo quidem sua causa baptismum susceperat: stetit

84 LITTERÆ ANNI M.DC.XX. SOC. IESV
aduersus eos motus adolescentis animus
inuietus, ac non modò è suo loco motus
non est, sed ausus est oppugnantem ijs po-
tissimum verbis adoriri. Decet, inquit, pa-
rentes illos, qui liberis consultum volunt,
eos ad pietatem, fidem, religionem, reli-
quasque virtutes hortari, quæ & mentem
componunt, & hominem à vitiis atque
sceleribus auocant. Tu verò cum à recto
virtutis, & religionis tramite, (quod pu-
deat) turpiter excideris; cur eundem erro-
rem, eandemque ruinam filio præparas?
mallem vtique vt ipse crimen, ac dedecus
tuum agnosceres, quàm Christianæ reli-
gionis studium mihi ignosceres. Quocirca
in gyrum te coge tuum, nulla enim lex aut
religio iubet filios, vt parentum perfidiam,
ac improbitatem sequantur. Eo filij sermo-
ne indignatus parens, iubet illum vultu se-
uero confestim è sua domo faceßere, neq;
suum in conspectum venire posthac. Qua
denunciatione non modo exterritus non
est, sed etiam disertè respōdit ingenti sese
gaudio exilii pœnam, & incommoda pro
Christi nomini subiturum.

Misio

*Missio ad regna Iezo, & Deua, ac Izugaru
Prouinciam.*

EAm expeditionem suscepit P. Didacus Carualius nauus & industrius vir, solitæque in proximos caritatis. Is igitur è regno Oxu discedens Cubotam in regno Deua contendit, quæ præcipua Achytæ prouinciæ ciuitas est. Exceptus est omnium neophytorum studiis, cunctique ad explicanda confessione peccata confluxerunt. Interim cogitare cœpit quam ratione Christianos exules, qui in Prouinciam Izugaru ob Christi fidem relegati fuerunt, adire posset. cum enim nemo magistratum iniussu in eam oram traicere possit, quæ facultas paucis admodum conceditur, nulla alia spes superat, nisi in regnum Iezo, quod extra Iaponiam sitam est transmitteret, vnde facilior est in ea loca traiectus. Tandem Christiani nauigii opportunitatem nactus, inter fossores neophytos fossorem pariter simulans illuc transmisit. Multa in eo regno præclara sed præsertim nobiles argenti fodinæ, in quibus quin-

F 3

quaginta

quaginta ferè hominum millia operam ponunt, multi in iis Christiani, qui è Iaponia soluentes Matzumai oppidum appellant. Eo igitur Sacerdos noster plebeio amictu delatus communi neophytorum gatulatione exceptus est. Oppidanis omnibus per confessionem expiatis, vnius diei itinere ad Christianos fossores profectus, eisdem etiam Sacramentorum administratione muniuit. vix dici potest quantus fuerit illorum amor, quanta eius virtutis opinio. Missæ sacrificium templo è ramalibus excitato celebratum est, eò maiore gratulatione, quo longiore intervallo peractum erat.

Integram hebdomadam in eorum municipalibus commoratus est, quo tempore Christiani è proximis argenti fodinis ad illum assiduè veniebant. Sed inter alios Dogici duo, qui eodem opere distinentur: horum opera ibidem perutilis est, si quidem multos quotidie ethnicos ad Christianam religionem adducunt. Inde in Iaponiam reuectus magnum apud eos societatis desiderium reliquit. Tum demum Iacocam in prouincia Izungaru eodem fossoris

foris nomine peruenit, vbi eum Christiani exules præstolabantur, & primò quidem eos, qui Miaco, postea verò qui ozaca relegati fuerant, cœlesti pabulo refecit. Inde ad proximos pagos diuertit, ac Fococu exules eadem Sacramentorum administratione roborauit. Rebus ita constitutis Achytæ prouinciæ iter repetiit, cumque vnius diei iter cōfecisset Christianos quosdam offendit, qui è Nambu prouincia confessionis causa venerant, quòd à multis annis eius beneficio carerent. Triduum in eorum confessionibus audiendis traductū, quo tempore nonnullos etiam baptismo lustrauit, quos in id ipsum Christiani adduxerant. Et quoniam alii multi in eadem prouincia hoc ipsum optabant, Dogicum misit, qui pariter Ecclesiæ aggregaret illos. Horum igitur Christianorum animis confirmatus. Cubotam in eadem Achytæ prouincia rediit, & aulicarum mulierum confessiones excepit, quas prius audire non poterat. Hæ variis artibus arcis custodias eludentes ad eum venerunt ac peccata sua declararunt. Earum domina, quæ saraqve Vchiono Daibu secunda vxor est, officioso munus;

88 LITTERÆ ANNI M. DC. XX. SOC. IESV
munusculo Patrem salutavit, eademque
pietatis officia frequentat, quæ superiore
anno retulimus. Hæc ab ipso Tono ad in-
uifendum templum, quod Idolo cuidam
erexerat, inuitata vnà cum ancillis Chri-
stianis eò se contulit, vt templi faciem ac
structuram videret, sed cum nullum om-
nino cultum ac venerationem Idolo exhi-
beret, ira succensus Tonus ex eo tempore
ab eius usu at consuetudine prorsus absti-
nuit; quod tamen illa haud ita ægrè tulit,
imò Sacerdoti nostro renunciari iussit spe-
rare se eius coniugii diuortium, quod illa
iam diu in votis habebat, vt & baptismum
suscipere, & Christianam religionem libe-
rius colere posset. Post hæc alia septem
Christianorum oppida lustravit, sed præ-
sertim argenti fodinam eodem fossoris ha-
bitu adiit, quæ Inaye dicitur, in qua pariter
multorum Christianorum desudat indu-
stria, quibus omnibus Sacerdos noster fuit
auxilio, consilio, solatio. Itaque multis terra-
marique perfunctus laboribus atque peri-
culis trimestri perigrinationi finem impo-
suit, eundemque ego annuæ huic narra-
tioni statuam, si prius Paternæ benedictio-
nis,

E REGNO IAPONIAE. 89
nis, sanctorumque sacrificiorum, quæ tota
Societate offeruntur, opem, & auxilium
huius Ecclesiæ cultoribus exorauero. Ama-
cai 18. Kalend. Nouemb. Anno 1621.

Ex commissione P. Visitatoris.

Indignus P. V. Fil.

Io. Baptista Bonellus.

ANNVÆ

90 LITTERÆ ANNIM, DC. XXI. SOC. IESV

ANNVÆ LITTERÆ

PROVINCIAE IAPONIAE

ANNIM. DC. XXI.

Ad admodum Reuerendum in
Christo Patrem nostrum P. M V-
TIVM VITELLESIVM Socie-
tatis IESV Præpositum Generalem.

PAx Christi. Et Iaponicæ Ec-
clesiæ sollicitudo, quæ Pater-
nitatem vestram vnicè tangit,
& Europæorum Sodalium in
res nostras propensa vota fre-
quentes dare cogunt litteras. Id quod eò
præstamus libentius, quò afflictam hanc
Ecclesiam hac ratione erigi, ac recreari
confidimus magis. Aerumnarum ac Peri-
culorum, quem teximus, catalogus diuina
precum, atque hostiarum suffragia non
petit modò, sed efflagitat. Durior olim Ia-
ponici

ponici agri gleba ad sata lætissima Societatis industria subacta, ne ad ingeniū redeat, indefessam operarum exigit manum. horum verò imbecillitatem, & inopiam è cœlo per sodalium preces iuuabit deriuata benignitas. quamquam suos etiam habet, Deo dante, Fontes Iaponia. hoc etiam anno suorū cruore resperla suauissimis martyrum floribus purpurascit. Ad narrationem propius accedamus.

Status Politicus & rei Christianæ.

IAponico imperio idem qui superiore anno præest. rerum idem status. Imperatorem aggestæ à Patre opes pollentem & verendum faciunt in dies magis. eius in Christianam rem odium, quod apertè hætenus declarauit, reque testatus est ipsa, munificentia in regni dynastas fouet. hi regiis veluti oppignorati beneficiis pro se quisque in Christi sæuiunt gregem, illud vnum tum Rex tum procures pro viribus contendunt, vt Euangelii præconibus omninò aditus præcludatur: Sublatis nempe doctoribus, discipulos facile defecturos. In regno

92 LITTERÆ ANNI M.DC.XXI. SOC. IESV
regno Oxu, cui Masamune imperat, vel
maximè in Christianos hoc anno sæuitum;
crudelitatem multorum probauere exilia
& cædes. In regno Cicugen multifame,
ærumnis carcerisque pædore confecti, ne
fidem desererent, vitam amisere. Eadem
peruasit immanitas Arimam, Omuram,
Nangasachium, hîc è Dominicana familia
Sacerdotes duo, vnus è Franciscana cum
laico fratre, è Societate nostra Sacerdos
vnus indigena suo cum dogico, atque ho-
spite comprehensi in vinculis detinentur.
Alibi pacatiora omnia. Fidei rem tantula
tranquillitas auxit; eius tamen magistris
labores, ac pericula non ademit. adulatorû
numerus, qui Christo renati hoc anno ad
mille nongentos, & quadraginta tres ascē-
dit: eos hîc non ad numero, qui aliorum in-
dustria catechistarû sacra suscepere. Chri-
stianis animos addidit tum comprehenso-
rum Patrum animi robur, ac tolerantia,
tum vel maximè Sanctissimi D. N. Pauli
per Iubilæum diuulgata liberalitas. hæc in-
finitam propè multitudinem ad sacra exci-
tauit. Non pauci qui fidem periculorum
oppressi magnitudine per externam spe-
ciem

ciem deseruerant, resipuere. ad vitam pro Christo fundendam nouo concepto calore exarsere omnes. Mirum quantum eiusdem Sanctissimi Patris epistola Paternæ charitatis plenissima Iaponiorum incitarit studia. recitata sepius frequenter cœtu, lachrymisque vbertim fluentibus audita. exemplaria illicò descripta complura, quibus amantissimi Pastoris memoria se recreent identidem, mutuisque cum conuenerint, cohortationibus ad fidem strenuè profitendam inflament.

Status Societatis.

ESocietate vineam hanc excolunt septem supra triginta, quorum Sacerdotes 27. Patres duo cum tironibus quatuor recens in Societatem in ipso carcere admissi Omuræ vincti in Domino asseruantur. In summis rerum angustiis, ac laboribus, quæ Dei benignitas, vigentes animis, corporibusque perstitere omnes. Domicilia seu potius latebras, potissimum habuere Nangasachii, eiusque in finibus Arimæ, Omuræ in regnis Bungi, Ciugocu, ac
Deua,

Deua, ac denique Meaci in ipso Iaponiæ
 umbilico: ex his veluti stationibus in diuer-
 sa excursions factæ. incredibile dictu est,
 quot suscepti in Christi causa labores, quot
 adita capitis discrimina: e mentito habitu
 per noctis silentia, tenebrasque ferè ince-
 dendum: præter Sacrorum suppellectilem
 commeatus nullus: excelsorum sæpè mon-
 tium asperitates vel rigente cælo, niueque
 obsita tellure superandæ, integræ noctes
 expiandis per confessionem animis, neo-
 phytis instruendis, lapsis erigendis tradu-
 cendæ: Indè corporis qualia interim in-
 commoda fuerint, facilis coniectura est:
 cælestem eos prægustare mercedem dice-
 res, qui adeò propensi studiis vix vno supe-
 rato discrimine ad aliud accingunt sese.
 Ex iis hoc anno sanctas per artes ingenio-
 sosque conatus illuc appulere quinque.
 Et duo quidem ex ipsis cū in suspicionem
 venissent, tantum non proditi. Naclerus
 etiam Nangasachii ad ludicem delatus
 sponfionem facere coactus est primo quo-
 que tempore Manilam remigrandi. Sed
 ingeniosa Christi charitas est. ipso nauiga-
 tionis die Lusitanis publicè valere iussis,
 ipse

ipse nescio apud quem latitans in Iaponia
substitit ad ingentem Dei gloriam & ani-
morum lucrum.

Res Christiana Nangasachij.

VAriis in latibulis è Societate nostra
nouem hoc anno Nangasachii oc-
culuere sese: inde frequenter ad animo-
rum salutem procuradam prodiere. Sum-
mo res peracta cum discrimine. Nam et si
Christianis conniunte, ut tempori seruiat
magistratu, tranquille pacatèque tantisper
est; in eorum tamen magistros horumque
hospites curæ omnium euigilant. In hac
verò vrbe potissimum quæ omnium ferè
nationum huc commeantium portus est,
ne quis Patres nauigio importet, hospitio-
que excipiat seuerissimè cautū. Inde fit ut
à Christianis plerumque excludantur iis,
quibus fortunarum capitisque iactura ob-
seruatur oculis. Nunquam tamen in tanta
Christianorum multitudine benignitatis
sue oblita charitas est. Apud quosdam
quos Christi urget amor, conciones, sacri-
ficia, Sacraque hospitantur omnia; priua-
tas

96 LITTERÆ ANNI M.DC.XXI. SOC. IESV
tas domos in sacella verfas diceret. Noctu
imprimis agitari conuentus necesse est,
quos exploratorum sæpè interuentus in-
terpellat, ita vt non rarò Sacerdoti inno-
tescat hîc, illucescat alibi: sed præcaueri
haud possunt omnia. In pago quidam den-
sas inter arbores ac dumeta securi sibi vi-
debantur è Franciscanis duo: ibi confluen-
tis multitudinis fami diuinarum rerum ci-
bo fiebat quâ poterat fatis. Inter hæc im-
pius quidam à religione transfuga pieta-
tem ore referens sancto cœtui immiscere
sefe, circumspicere, notare singula. haud
multo post Patres, hospes, vicinia immis-
sis lictoribus comprehēsi. Omuram aman-
dati patres in carcerem: incendio destina-
tus hospes: è proxima sylua ligna imperan-
tur Christianis aliquot: ij iterum ac tertio
imperium detrectant, domiq; continentes
sefe in horas supplicium sibi perbeatum
opperiuntur. Denique dissimulanda iudici-
res fuit ad tempus. Post hæc in Sacerdo-
tem è Dominicanis eiusque dogicum in-
iecta vincula; hi extra urbem desertis in lo-
cis extrueto tuguriolo Christianam rem
curabant. Obuios habuere cum ducerentur

tur lachrymabundos ac supplices Christianos plurimos oscula certatim vinculis figentes, quos minis, ac fustibus arcere satelliti haud datum. Proditus item eodem ferè tempore in vrbe latitans Frater Iosephus eiusdem familiæ moderator ab hospitis famulo. Postremò è Societate nostra Pater Quimura Sebastianus Iaponius genere, suo cum dogico, hospiteque comprehensus; vnaq; cum duobus quos modò retuli, patribus Omuram amandatus. Is eius nepos est quem omnium primum huius gentis Apostolus Franciscus Xauerus Christo genuit. Serua hospitis Corea genere diuturni pertæsa seruitii domino, Patri, Christoque, Christiana & ipsa, struxit insidias. Subiit domini mentem inter bonorum proscriptionem illa cogitatio, vt Coræam quoque fæminam suis adnumeraret; sic fisci adiudicandam seruituti, quæ, vt seruitium à se excuteret, periculum familiæ toti crearat. Sed ablegauit à se vindictam sapiens cogitatum; quin in accepti beneficii gratam memoriam propinquos omnes enixè rogauit, miseræ vt fæminæ libertati fauerent, quippe quæ tantum sibi
G bonum,

bonum, licet invita attulisset, vt in Christi causa fortunas ac vitam perderet.

Qui hîc detinentur in custodia per-beati viri ad Martyrii palmam quotidie suspirât. Longis precationibus, quas identidem contenta voce fundunt, voluntaria verberatione, vbi abstinentia sanctisque id genus exercitamentis aliis, exitum præstolantur laborum. Ad se officii causa confluentes ad Dei dilectionem incensissimis verbis inflammant, ad pariaque prouocant exempla: Illi inuident sortem ter & quater beatam, se miseros deprædicant, quibus charitatem suam probare in Deum haud datum.

Christianorum sæpius prospero successu tentata constantia. Gonrocu (vrbis præfecti nomen est) eo ipso in loco vbi Misericordiæ Sodalatii ædes steterût, fanum dæmoni erigi imperauerat. Fabri aduocati complures, inter quos Christianus vnus, vbi rem rescivit, negat se superstitioni vllomodo seruiturum. Vincitur præfecti imperio ad arborem è fani regione; ibi octo integros dies soli, imbribus, cæterisque incommodis obnoxius diuina delibutus voluptate

luptate perseuerauit moriendi certus, ni Bonzii cuiusdam, ac lusitani etiam primarii deprecatione solutus esset. illum superstitio impulit, ne malè ominato, hominis scilicet cæde fanum auspicaretur; hūc Christiana commiseratio. Sed ægre passus est bonus vir vircula sibi adimi, contestatus se eundem met, qui semper, esse, eiusdemque in posterum propositi fore.

Ipsius præfecti honorarii pueri octo, quod Christiani essent, simul atque in aliquem è Patribus insidias adornari odorbantur, periculum à Patre per nuntium auertebant; ita vt non rarò insequentes ministri præda ac spe frustrati sua fuerint, nostris aliò statim commigrantibus. ad præfecti aures res tandem deuenit: exarsit repente homo in rabiem, mortisque pœnâ propositâ Christum illico vt exuant, imperat; duo metu labefactati dedêre manus; reliqui iugulum gladio paratum offerunt. Præfectus quòd eos vnice diligeret, represso tantisper furore cōstantiam exilio mulctauit.

Parem in retinenda fide constantiam Nangasachio proximi pagi seruarunt, sin-

200 LITTERÆ AN. M.DC.XXI. SOC. IESV
guli in Sodalitates partiti suas. earum igitur
primarij per litteras Sodales reliquos
monent, vt si quis bonorum proscriptio-
nem vitæque iacturam æquis animis haud
ferre posset è Sodalitio recedat: satis illi ad
salutem fore, reliquorum Christianorum
in morem vitam instituere. Ex tanta mul-
titudine inuentus est nemo, qui non con-
stantissime professus fuerit, nullam in hac
vita rem sibi chariorem posse vnquam ac-
cidere, quàm si fuso sanguine charitatem
in Christum testari daretur.

Pia scemina apostatæ coniux vbi viri de-
fectionem accepit, pago, patrique rem as-
peruit. illi suis è finibus Iudæ consilia me-
ditantem excludunt. Firandi, Caratsu,
Sangæ, Omuræ, aliisque Figensis ditionis
in locis, quò nostrorum penetrauit indu-
stria, Christiana res belle processit.

*Gesta Nangasachij coram Præfeto ab
Christianis quinque pro Christo
comprehensis.*

EX superiorum annorum litteris mul-
ta de Christianis quinque qui Nan-
gasachij

gasachii asseruabantur V. P. accepit. ij ob
impensam strenue Christianæ rei operam
quâ concionibus, quâ infantium baptis-
mis, quâ adultis ad Christum adducendis
in vincula coniecti; eadem pari feruore o-
pera exercuere semper. Præfectus liberta-
tem obtulit, si à Christo recederent: liber-
tatem illi, quæ Christo careat, repudiant.
Paulò post emissio oblata, modo Christia-
nam, quam ipsis liberè retinere liceret fi-
dem aliis non promulgarent. Ad hæc illi:
enimuerò vitæ ac libertati malè sit, quæ
Christi gloriam curare non finit. His ira
succensus Præfectus eadem dubio procul
subeundam renunciat. Exultant hic gau-
dio homines, beneficiique magnitudinem
sacro gratiarum hymno declarant: con-
fluunt repente gratulabundi Christiani,
fœlicibus cœptis bene ominantur, reli-
quiarum loco Rosaria, cilicia, flagra, libel-
los pios exposcunt; admissus & inter tur-
bam Sacerdos vnus è nostris, per quem &
sacra confessione expiati sunt, & recreati
mirifice.

Postridie adsunt à Præfecto immissi qui
ad tribunal Christi seruos vinctos perdu-

cunt. Imperant Christianis aliquot quia-
 derant, homines vt vinciant. negant illi se
 vnquam adductum iri vt in Christi Mar-
 tyres manus iniiciant. quod respōsum ca-
 rō illis stetit. nam verberibus malè multa-
 ti; quæ tamen hilari fronte, positisa humi
 genibus excepta. Post hæc vinciendi o-
 nus quibusdam impositum, hi pari con-
 stantia mortem potius se subituros, quam
 in Christi famulos quicquam commis-
 suros affirmant. hic ipsi carnifices reo-
 rumque publici tortores aduocandi fuere,
 irritum tamen conatu. nam Christiani cum
 essent bonorum proscriptionem, atque
 exilium, quod libētibus animis hodie per-
 ferunt, tanto flagitio prætulêre. Denique
 ab ethnicis iniectæ manicæ. Christiano-
 rum frequentissimo comitante cœtu per
 mediam urbem Præfecto sistuntur, elatis
 passim vocibus modò Martyres modò per-
 beati per vias deprædicati.

Chiuni Antonii, qui ætate ceteris antei-
 bat, primo loco explorata constantia. In-
 terrogatus an è Societate esset, negavit se
 tanto dignum beneficio, quod illustribus
 tantum Christi famulis concessum: se ho-
 minem

minem esse, cui sua proximique salus cordi esset, in quam totum sese impendere pro virili vel cum vitæ dispendio certum, fixumque. Ad hæc ex Iudicibus vnus, qui à Christo nuper descuerat. Feizo nomine: quin tu, inquit, in tua tantum salute curanda distineris? enimverò si concionatoris munus negligas, vitam per me licebit retinere. Antonius verò: consilia isthæc non est cur offeras mihi; id quod ago, melius ego, quàm tu, noui. Vita, quæ Christi honori non seruit nihili facienda; his peractis abire iussus, seorsimque tantisper morari. Similem exitum habuit illustris Fusai Gonsalui confessio. Post quem Sampo Petrus accersitus se Societatis dogicum professus est: suas esse partes, quæ à Patribus de æternæ salutis via accepisset, Iaponiæ toti insinuare: natali solo, qui melius beneficia accepta repēderet, quàm aperta ad æternam beatitatem via? Atqui, Iudex excipit, Iaponiæ Imperatori parendum est, qui, ne secta ista sua ditione diuulgetur, edicto cavit. Petrus ad hæc: liceat, quæso, per vos id quod sentio per comparationem exponere. Si Iaponiam pestis, aut

G 4. quælibet

204 LITTERÆ AN. M.DC.XXI. Soc. IESV
quælibet alia contagiosa infestaret lues, &
medicus item adesset, qui facili medica-
mento huiusmodi morbos abigere nosset,
quo supplicio, quæso vos, sæuitia, atque in-
humanitas mulctanda hominis, qui se fa-
miliamque suam curare contentus, in vni-
versa regni peste otiosus sederet? atqui
quotquot Christi non sectantur fidem, eos
ego non ægros dixerim aut morti proxi-
mos, sed omnino iam mortuos. Et me re-
prehensione dignum ducitis, qui Christi
doctrina proposita gentem meam ab æter-
no vindicare satagam interitu? inhumanus
ego sim, sæuitiaque ipsa crudelior, si vel
maximo meo dispendio salutarem hanc
mortalibus omnibus medicinam propina-
re negligam? huiusmodi nimirum attenta
rerum meditatio ab remotissimis regioni-
bus in Iaponiam Patres Societatis aduexit:
illa eosdem Parentibus, amicis, patrio solo,
commodis omnibus valere iussis per im-
mensa prope maria immittit, in subterra-
neas specus abdit, omnibus exponit peri-
culis, laboribus, casibus. Adhibentur qui-
dem sæpe medicamenta iis, qui mente ca-
pti sunt: adhibent & Patres saluberrima
vita

vitæ Pharmaca infanis Iaponiorum menti-
bus, à quibus pro beneficii compensatione
conuicia, insectationes, odia, necem etiam
recipiunt. Utinam & mihi magistros ac
parentes meos in Christo liceret imitari.
Annuit ad omnia Iudex, remque sic se ha-
bere testatus est. sed tempori, inquit, infer-
uias, & ore saltem tenus hic sponde, te pro
Christo concionatorem non acturum in
posterum. at vero nihil fero acerbius, in-
quit Petrus, quam tam paucos extitisse eos,
quibus veritatis lucem ostendi. Utinam
præpotenti Deo cordi esset huiusmodi mi-
hi vocem largiri. quæ tota posset exaudiri
Iaponia, altissima tunc mihi montium cul-
mina pro suggestu forent: ibi dies noctesq;
salutis iter contenta voce declarando tran-
sigerem. Petrum sequutus est Xumpo Mi-
chael, qui post Patrum exilia fassus est, se in
sylvas recepisse remotissimas suorum cri-
minum & Iaponiæ totius pænas à numinis
benignitate multo fletu deprecaturus: si-
mul vt liberius confluentem illuc multitu-
dinem cœli viam capeffendam doceret;
votis aliqua ex parte respōdisse euentum:
se propitio numine pro eiusdem gloria

206 LITTERÆ AN. M.DC.XXI. SOC. IESV
propaganda in aduersa omnia iturum. Ha-
ctenus Dogicorum nostrorum examen.
Postremo loco Mizunoya Iacobus, cuius
in fide constantia, pectusque vere Christia-
num admirationi Iudicibus fuit, examen
subiit.

Peraçto examine rogos iam, aut cruces
sancti viri auida spe deuorabāt. Idem Chri-
stianorum multitudo, quæ ad Prætorii ia-
nuam rei exitum præstolabatur, iisdem ap-
precata. Sed alia Præfecto iniecta mens, in
Omuræ custodiam homines amādat: quod
iis iniucundum primo aspectu accidit dila-
to in aliud tempus martyrio, postmodum
verò ex sancto nostrorum Patrum conui-
ctu non nisi iucundissime. Ex custodia Pa-
trem Prouincialem dogici quatuor per li-
teras enixe rogāt, se vt in Societatem coo-
ptare velit: facti voti compotes in ipso car-
cere solidarum virtutum, & religiosæ vitæ
tirocinia ponunt, ad solem & pugnam nō
nisi Martyres, vti speramus prodituri.

De Omurenſis carceris ærumnis fatis
multa superioribus litteris. Is adeò angu-
stus est, vt cruribus perpetuo decussatis de-
cumbendum sit: adeò incommodus vt fri-
goris,

goris, ventorum, niuium arcendis iniuriis
 via suppetat nulla; rerum ad vitam alen-
 dam necessariorum penuria tanta, ut præ
 fame ac siti oculorum usu destitui contin-
 gat sæpe, ut in quibusdam ad Patrem Pro-
 uincialem datis literis mense Decembri si-
 gnificauit ter fortunatus Pater Carolus
 Spinola vltimum Patri valedicens; ad ex-
 tremam enim hyemem incolumem se su-
 per victurum haud sperabat. Deniq; quod
 omnia incommoda superat lōge maxime,
 non ita multò ante sacra supellex piique
 libelli subtrahiti. Religiosi viri hic detinen-
 tur ad viginti. Ex Dominicanis nouem, Sa-
 cerdotes sex, nouitii reliqui. Ex Francisca-
 nis quinque, duo Sacerdotes, Laicus vnus,
 duo nouitii. E Societate nostra sex, Pater
 Carolus Spinola, al Quimura Sebastianus;
 tyrones quatuor, Antonius, Gonsaluus, Pe-
 trus, Michael; Præter hos non pauci dogi-
 ci, alique laici, qui ardentissimis omnes
 votis ad Martyrii palmam sese compa-
 rant.

Postquam Omuram Christi famuli
 transmissi, carnifices illi qui Christum mo-
 dò constanter professi, bonis spoliati in
 exilium

208 LITTERÆ AN. M, DC. XXI. SOC. IESV
exilium missi, quod ne à Christo exularent,
libenter amplexati sunt.

*Ciu Ioannes & Ito Ioannes martyrium
pro Christo subeunt Nangasackij.*

QVatuor iam abiere anni, ex quo totidem Omuræ Patres ceruices pro Christo dedere. Comprehenſi tunc non modò Patrum hospites, sed etiam vicini, pro vt Iaponiæ legibus cautum. Inter hos Ciu Ioannes & Ito Ioannes, qui quo tempore beati Martyres capti non solum domo, sed etiam è regno longe aberant: hi cum primum reuersi Gubernatori sistuntur, atque ad fidei defectionem capitis obiecta pœna sollicitantur. Verum cum frustra labefactari posse Christiani pectoris robur videretur, primùm in custodiam dati, mox ad suos redire permissi. Interim de re tota monitus Imperator. hoc anno à Gubernatore iterum accersiti, tentatique; in eodem tamen proposito firmiores. Sed viros optimos & de publica re bene meritos perdere haud equum Præfecto videbatur. Ciu Ioannem igitur interrogat; quisnam

nam superioribus annis, cum ipse abesset, pro familiæ capite subscripsisset: famulum subscripsisse coniugis iussu reperit. tum, conquiratur, inquit, diligenter famulus, & in crucem agatur. hac nimirum ratione famuli cæde hero consultum volebat. qui contra: at verò quæ famulo noxa impingitur, si qua est, mea est: en caput hoc supplicio paratum. Ne mihi, quæso te, martyrii palmam, quod singulare donum Dei existimo, ereptam velis. Eodem modo Ito Ioannes martyrio prope ereptus; nam in coniugem, quæ absentis viri nomine subscripserat Gubernatoris conuersæ minæ. Ito coniux ubi martyrii spes affulsit, præ gaudio gestire. Eandem verò in spem Ciu Ioannis vxor venit; sibi, cui par esset causa, parem subeundam pœnam. Accurrere Christiani cum plures gratulabundi. integra nox sanctis precibus, mutuisque cohortationibus extracta: exortæ inter coniuges piæ rixæ de martyrii primatu; viri suum, suum vxores proferre ius. Prima luce ne tantum perderent viri decus quod imprimis timebant, litteras ad Gubernatorem dant, supplicium sibi non vxoribus deberi

210 LITTERÆ AN. M.DC.XXI. SOC. IESV
deberi probant. Annuit Prætor, capitisque
sententiam in sanctos viros profert. Trium-
phare hîc Christi serui, vndatibusq; præ læ-
litia lachrymis coniuges, filios, propin-
quos, vicinos salutant in osculo S^{to}. obte-
stari omnes per Deum suæ vt salutis me-
mores, quam semel accepissent fidem, ad
finem vsque constantissime retineant. Post
hæc Societatis Patrum, à quibus in Chri-
sto geniti, preces per internuncios poscunt.
Adfuit statim è Patribus vnus, qui confi-
tentes audiuit, mirificeque solatus est. Mox
Sodalitatum induti vestibus, & ad Præto-
rium, vt moris est, vinculis constricti & in-
de ad supplicii locum properant. Interim
contenta voce clamare per compita, se vo-
ti compotes nunc tandem factos: alacres,
volentesque pro Christo vitam profunde-
re: obtestari omnes qui sibi per eandem fi-
dem coniuncti, vt ad mortem vsque preci-
bus se iuarent. Incedebat agmen bene
longum piorum virorum silentio ac pieta-
te tanta, vt supplicationem dixisses religio-
sæ familiæ. Vbi ad destinatum ventum est lo-
cū, in genua procubuerunt omnes. Gloriosi
martyres robur & constantiam à Deo pre-
cati

cati ceruices læti obtulere. Sanctissima Iesu ac Mariæ nomina magna cum pietate inuocantibus primo ictu abscissa capita, Christianis interim eadem nomina ac pia monita inclamantibus. Quorum vnus vbi Ito Ioannis præcisum caput ter aperire oculos, labiaque adhuc mouere notasset, accurrit, genu, manibusque, humiante venerandum caput positus, beatoque cruore resperfis: perge, inquit, beatum os, perge, adhuc, dulcissimum Iesu, pro cuius fide obiisti, inuocare nomen. Hic è ministris vnus arreptam lanceam in adstantes minitabundus vibrat, ne quis sanctorum corporum reliquias asportare audeat: eas stramineis saccis inclusas in mare proiiciunt. Sed Christianorum sedula pietas noctu sacra pignora extraxit, summaque religione Nanganfachii veneratur, vbi Martyrium obiere iussu Faxegaua Gonrocu Gubernatoris secunda feria die 22. Februa. 1621.

Mar.

*Martyrio coronantur Fampei Franciscus
& Fansusque Ludouicus Omura.*

OMura Ficoyemon, qui Omurensem
ditionem pro infantulo Dynasta gu-
bernat, homo à Christo transfuga, vt in
administrāda prouincia pedem firmitus po-
neret, in Christianum nomen acerrime
sæuere orsus est. Primo igitur aduersus duos
adolescentes, Christum vt exuant, machi-
nas admouet. Ex iis vnus Fampei Francis-
cus illustris genere fide tamen illustrior.
Operam perdi, vt vidit, vrget, vt per Camis
& Fotoques infanti satrapæ obsequium ac
fidem adiuret. Ad iusiurandum haud diffi-
cilem se ostendit Franciscus æternum mo-
do numen, non ridicula Orci portenta in
testimonium liceat assumere. Indignatio-
nem hic premens suam ac meliora sperans
tempora Gubernator, dimittit hominem.
Quem post paucos dies iterum ad sese vo-
cat necem iam ac Martyrium probe præ-
sentientem: in arcem vix ingressum Dei
famulum armati milites vndique circum-
stant, brachiaque in crucis effigiem con-
for-

formantem multis conficiunt vulneribus.

Alter Fansuque Ludouicus fuit, is cum Societatis nostræ fratrem domi suæ hospitio excepisset, ut cælestis verbi pabula vnà cum frequenti Christianorum cœtu per noctem degustaret, ab exploratoribus proditus est. Adsunt ante lucem apparitores, sed Deo volente noster iam alio auolarat. Comprehenditur Ludouicus cum vxore; & quæ per tormenta extorqueri ab heris veritas nō potuit, illam famulus pœnarum victus acerbitate fassus est. Mittitur qui sūma celeritate nostrum insequatur; cumque incassum omnia, in Ludouicum tempestas ingruit; breuique sponte sua vitam pro Christo offerentem hominem, summisque laudibus Dei in se munus deprædicantem obtruncant. Plura de duobus hisce Christi Martyribus cognoscere hoc anno non licuit.

*Nonda Risiōye Leo pro Christo gloriosè
occumbit Isafay.*

Isafay vrbs est vnius ex duodecim Pro-
uinciis regni Figenfis primaria. In ea
H Leo

Leo gloriosum pro Christo testimonium
 sua cæde exhibuit, cædis ansa illa fuit. Ado-
 lescentem quendam Yagrum à Christi fi-
 de aberrantem totis viribus ad ouile redu-
 cere bonus Leo contenderat. Nec ante
 destiterat ab incepto, quam postquam teri
 frustra tempus ac verba sensit. Inique fe-
 rens amici iacturam, Apostata, Leonem
 conuenit, iramque vultu præ se ferens alie-
 nati animi causam sciscitatur. Placide trā-
 quillèque ab Christiano responsum cum
 accepisset, exaggerare iram, conviciis &
 clamoribus viciniam complere. Interuen-
 tu vicinorum tantisper deferbuere rixæ.
 Sed Satana rursus extimulante præcordia,
 ad Leonem iterum conuitiabundus deser-
 tor Christi: ille locum iræ dandum ratus
 domo secedit: Insequitur homo furiosus
 ignominiosis verbis abeuntem: adeò vt in-
 dignum facinus haud æque ferens Leonis
 frater arrepto fuste in impudentis homi-
 nis terga sæuierit. Tonum adit contusis la-
 teribus adolescens, Leonemque confictis
 criminibus multorum malorum insimulat,
 Christianum esse, Christum aliis prædica-
 re, lapsos erigere, se, quòd Imperatori pa-
 reret,

reret, male verbis, peius verberibus excep-
pisse. Sed Tonus discussa causa, Leonisque
perspecta innocentia iuuenis impuden-
tiam arguit, seueréque mandat, ut menda-
cia à se in Leonem conficta fuisse scripto
testetur. Verum quia Christi fidem suade-
re in Iaponia capitale est, tres nobiles ado-
lescentes ad Leonis tentandam constan-
tiam ab Tono immissi. blande illi primo:
Sed generosum pectus blāditix quid mol-
liant? adduriora ventum: Vinciunt homi-
nem, vxorem, filiosque domo pellunt, su-
pellectilem fisco addicunt, cum Christia-
nis colloquia prohibent, vigiles adhibent.
Inter hæc falso coniugis nomine perlatus
nuncius: flecterent illum vxoris paruulo-
rumque filiorum lachrymæ: miserix tan-
gerent, quas chara pignora iam nunc orsa
subire, subitura dum viuerent: haud gra-
uem videri noxam, si tempori sese accom-
modet: nec illum primum, nec postremum
in Iaponia fore, qui externa tantum specie
lapsus se fingeret. Ad hæc Leo: referant
vxori, se suorum orbitatem, ac misérias a-
cerbissime ferre; verum quia vitæ huius
ærumnæ temporaneæ, quæ verò speramus

H 2

bona,

bona, æterna sunt, patienter aduersa hæc
 tolerant; haud defuturam diuinam beni-
 gnitatem suis. Hoc responso haud delecta-
 tus Tonus iterum, ac tertio per magnæ au-
 thoritatis viros opes honoresque homini
 pollicetur ingentes. Gratiam ille se Tono
 habere renunciat: magna quidem esse pro-
 missa: æterna tamen meditantī momen-
 tanea apparere; ac vilia: monitum hoc in
 beneficii compensationem remittere: la-
 ponios omnes qui Xacam, Amidam, cæte-
 rosque Camis & Fotoques superstitiose co-
 lerent, in æternum exitiū præcipites ruere,
 eosdem quos colerent sequi. Qui fieret, ut
 salutem largirentur ij, qui sese perdiderint?
 porro in Christiana tantum lege, quæ vni
 defert honorem Deo, salutis fitam esse
 summam: eam ipse legem confestim am-
 plectatur, neque diutius rem tanti momenti
 in lubrico sinat esse. Se vitam, & si quid
 charius vita est, à quo accepisset, liberalissi-
 me redonare Deo, certissimamque verita-
 tem sanguine obsignari suo percupere. Ex-
 canduit ad tam pia monita barbarus, in-
 stantemque homini minatur cædem. Ac-
 cepto mortis nuncio, in lætitiā effusus
 Christi

Christi seruus post actas Numini gratias nihil habuit antiquius, quam Yagirum al-
loqui accepti per eum beneficii memor. Sed eius loco propinquos hominis duos amplexatus est, verbisque suauissimis ad fidem complectendam hortatus. Post hæc candidatus elata voce Christianæ veritatem, ac necessitatem Legis inculcare; ore sereno, ac fronte renidenti preces effundere, ethnicis in admirationem versis. Veriti carnifices Christianorum ad fores adstantium concursum intempestæ noctis silentio per posticum extractum Christi seruum in nauigium imponunt. Eidem in terram exposito, cum in genua positus multa de salute verba fecisset, suaque sponte mucroni ceruicem parasset, inter sanctissima Iesu & Mariæ nomina caput abscissum est. Proiectum in mare corpus, caput stipiti præfixum in publico expositum cū istiusmodi inscriptione: Homo iste, cūq; palam constaret non modo Christianum esse, sed eandem fidem aliis suadere, cum sæpius monitus ab incepto desistere nollet, capite plexus est. Gloriosus Christi Martyr loco nobili natus, patria Cangouara in Prouin-

218 LITTERÆ AN. M.DC.XXI. SOC. IESV
cia Sanga regni Figensis. Adolescens ab
Nabexima Xinanonocami regni dynasta
multis affectus honoribus, quibus propin-
quo suo relictis ad salutis iter conquiren-
dum Nangalachium venit. Ibi nostrorum
opera Christum induit, Christianarum vir-
tutum exemplar effectus. Inde Isafay con-
tendit diuque vixit. Sacellum in interiore
domo construxerat, Patribusq; hospitium.
Salutis animorum, precandi studii, corpo-
ris afflicti, liberalitatisque in pauperes,
ac vinctos in Domino studiosus imprimis,
Martyrii lauream obtinuit annum agens
42. 6. FERIA 25. Iunii 1621. Præside Canda
Matabioyo Isafay.

*De Christianis Tacacu, insulisque
adiacentibus.*

ARimæ Christiana res belle procedit.
Quinque è nostris Sacerdotes hic
detinentur. Oratoria priuatis in ædibus
constituta sunt complura, quò semel per
hebdomadam Christiani se recipiunt ad
sacra suscipienda, concionem, piosque li-
bellos audiendos, ad carnem insuper fla-
gris

gris edomandam Martyrum sanguini, quo tellus hæc abunde respersa, si qua fidei seges est, profecto debetur. Baptismum hoc anno adulti susceperunt centum. Ingens ad Iubileum lucrandum concursus; triginta & amplius persæpe ab aliquot superata milliaria ut illuc se conferrent. Integræ in confessionibus audiendis extrahendæ noctes prorsus insomnes. Mitto reliqua quæ vulgaria sunt. Ad insigniora venio.

In insulis Amacula è regione Arimæ puella erat Ethnica, Christiano nupta; huic per noctem euigilanti venerandus senex pulla veste candidæ super iniecta indutus apparet; comes huic adolescens candidatus. Feminam monent, uti intra trimestre spatium Christiana sacra suscipiat. Idem altera nocte contigit. Mensis iam à visu abierat, cum ecce tibi horrenda tonitrua personant, ignisq; domo tota populabundus aures oculosque mulieris perstringit. Gravem illa morbum ex metu contrahit. Decumbenti nigerrimus Æthiops visendum se præbet. Statura illi breuior, corpus obesum, facies mire fæda, oculi prægrandes, os ingens flammam identidem emit-

H 4

tens.

220 LITTERÆ AN. M. DC. XXI. SOC. IESV
tens. Huiusmodi spectrum super affere
confidens, quod ad ægræ spectabat cubile,
manibus miseræ pectus, pedibus totum
corpus adeo premebat, ut respirandi sæpe
facultatem eriperet. Septem integri dies
in his angustiis sine cibo traducti: E fami-
lia inueniebatur nemo, qui ad iacentem
prope accederet: socer vix calida in cubi-
culo relictæ fugiebat. Tandem speciosissi-
mæ aspectu mulieris trimulum sinu gestan-
tis puerum angustiis liberata: Damascena
illam candida, purpurea hunc vestis tege-
bat. Contrahere sese, tremere, in fugamq;
se proripere ad Matronæ aduentum mon-
strum horrendo fremitu Orcum repetens.
Admonita puella nō nisi salutari baptismi
lauacro Tartari eludi præstigias: quamprimum
porro preces memoriam mandet, catechismum audiat, baptizetur. Abiit
sanctissima, ut credere par est, virgo, per-
quam pristina valetudini confestim reddi-
ta mulier, mirificos in pietate adhuc cate-
chumena progressus fecit: nec ita multo
post baptismi facta compos Virgini vivit
addictissima, cuius beneficio totam se de-
bere fatetur.

Sexa-

Sexagenarius quidam morti proximus, per confessionem iam expiatus, duas ferme horas pulsus palpitatione, ac respirandi munere destitutus iacuerat. omnium opinione mortuus oculos aperuit, mox Iesum & Mariam ingeminans in alterum versus latus subirato similis: Nō ne, inquit, truculentæ illius bestię fœdum os aspicitis? tu ne animorum hostis tuis me fraudibus irretias? in Deo, eiusque filii Iesu Christi meritis ac sanguine spem habeo firmatam. Elata hic voce qui aderant, Orationem Dominicam recitant: vix eam secundò absoluerant, cum bonus senex placidissime expirauit.

Quadrimus puer ethnici hominis filius non longe erat ab interitu; cum omnes domi per noctem quiescerent, Christianus quidam egrotantem baptismo lustrat. Mira res, conualescit illico puer: accepta re pater quamuis initio mire iratus, mitior tandem effectus Christianis fauere cœpit, Christum aliquando, vti speramus, amplexurus.

Ethnicus Dynasta in aliud profecturus regnum popularium interim fidem iura-

H 5

mento

222 LITTERÆ AN. M, DC. XXI. SOC. IESV
mento sibi obligari voluit. Christiani inter
eos decem iuramento se obstricturos ne-
gant, quod per inania Camis & Fotoques
numina exhibendum erat. Vrgentibus se-
mel & iterum Toni ministris, ex eo nume-
ro sex nō aliter se consensuros aiunt, quam
si in subscriptorum catalogo ad efforma-
tum crucis signum, per quod iurarent, sua
subscriberent nomina. Verum reliqui qua-
tuor, ne hoc quidem probantes consilium:
Iurabimus, inquit, vt Christianos decet,
per Deū: hæcque, dicens vnus ex iis, gladiū
quo præcinctus erat, ante ministri pedes
collocans: si responsum, inquit, non arri-
det, en gladius, en ceruices. Denique con-
stantes viri in exilium ab Tono pulsi.

Inuisere nostri Christianos Amacusa-
nos, regna Cicungo, ac Cicugen. hic Chri-
stiani in arctissimam custodiam dati de-
cem. Ex quorum numero quinque fame
enecti gloriose occubuerunt. Nomina
hactenus, & minutiora alia ignoramus.
Quamquam Arimæ, vt supra dictum, mi-
tiora omnia in Christianos: tamen 28 Au-
gusti ab Tono seuerum edictum in Eccle-
siam. Patrumque fautores promulgatum.
Quare

Quare cautius, non tamen frigidius tum
Patres, tum Christiani procedunt.

Missio ad regnum Fingo.

AD Christianos Fingenses lustrandos
Pater Gaspar de Craſto Arima pro-
fectus est. Ingreſſum tenuit facillimum in
tanta vigilum diligentia pæne diuinitus.
Toni cuiusdam vxor Christiana vigefimū
iam & quintum annum confessione carue-
rat: vbi de Patris cognouit aduentu, viro
per id tempus absente, ad se per confessio-
nem audiendam, quod summopere sem-
per optauerat, per internunciam Christia-
nam eum Patrem inuitat. Medico quodam
Christiano consulto, eodemque comite,
famulis plerisque aliis alio amandatis, con-
fidenti aures dedit, tanta vtriusque cum
consolatione, vt explicari vix possit.

Medico autem beneficium rependit sta-
tim Deus. Is vxorem habebat Ethnicam,
quicum quindecim iam annos vixerat.
Totidem fere annos feminam rogando, vt
saluti consuleret sue, bonus vir traduxerat.
Fruſtra iactis verbis, ad Virginem Deipa-
ram

224 LITTERÆ AN. M.DC.XXI. SOC. IESV
ram quinquennales preces vouet pro
coniugis bono. Non longe à meta quintus
iam erat annus, cum Pater aduenit. Apud
quem infelicitatem suam deplorante ho-
mine, & meliora ab eodem per Virginem
sperare iussu: ecce tibi ab vxore nuncius,
aduenisse iam horam, qua Christum in-
duceret: daret sedulo operam, vt à Nostro
institueretur. Nec ita multò post effusis in
gratias & admirationem quorquot durum
mulieris ingenium nouerāt, baptizata est.

In Ethnicorum pago Christiana multæ
virtutis femina vicinam suam ethnicam
liberorum multitudine oppressam eius,
qui sibi nasceretur, filii mortem meditari
persenserat. Ad partum adest, paruulum
subfuratur; sed quia baptismi ignorabat
formam mire excruciat. Post aliquot
dies schedulæ meminit à Christiano sibi
relictæ, in qua baptismi exarata verba.
Schedulam inuenit, infantulum baptizat,
qui paulò post in cælum abiit.

Ethnica ancilla Christianæ heræ pia ad
salutem consilia furda iam diu aure respu-
erat: sed morti proxima baptismum instan-
ter petit. Hera nec baptismum conferre
norat,

norat, nec in pago Christianum aliquem baptizandi peritum inuenit. Ad Deum igitur conuersa famulæ remedium precatur: adest confestim ignotus homo, qui sollicitam dominam diu esse non finit: ægram instituit, baptizatque à baptismo statim tum ægra, tum hospes abiire: illa ut credere par est, in cælum; hic fortasse eodem se recepit.

Multa Patri subeunda incommoda fuisse per infesta Christianis loca eunti. Semel ad Idololatrarum pagum properantem nox cepit. quid faceret? tempestas erat perfrigida, cælumque imbribus graue. In pago Christianus fere nullus: inde noctis incommoda, hinc vincula & mors timebantur. Sed quæ Dei prouidentia, Bungenis in oppido degebat pro Christo extorris, ac bonis spoliatus: Is Patrem humanissime excepit, septoque statim confecto arundineo in interiore domo collocauit. Postridie oppidi Tonus Christianum inuisit Patre interim, ne proderetur, spiritum prope reprimente. Hic familia tota per confessionem expiata. Inde digressus in complures incidit, quos & Sacramentis & monitis ad
perfe-

226 LITTERÆ AN. M. DC. XXI. SOC. IESV
perseuerantiam hortatus. Denique triginta
in vniuersum Christo aggregatis adul-
tis, non nisi vberes referens manipulos A-
rimam se recepit.

Christiani Bungenfes.

BVngi regnum adeo olim famosum ac
celebre cōplures hodie inter Regu-
los, ac satrapas pene dissectum est: hi ne sua
sede pellantur, laponiæ Regi obsequen-
tissimi sunt: quare in Christi legem, eiusq;
ministros hic vel maxime sæuitur; nostri
tamen vnus industriâ triginta, & eo am-
plius oppida hoc anno lustrata, opportu-
nisque auxiliis, ad fidei constantiam adiuta,
maximis superatis incommodis. Centum
& viginti idololatriam exuere. Iubileum
& hic sementem messuit vberimam.

Adolescens quidam Idolorum cultui
addictus cum graui morbo premeretur,
parentes, qui Christiani erant, rogat, Bo-
zum aliquem ad se aduocent: non modo
sine fructu superstitiolæ preces adhibitæ,
sed magno cum valetudinis incommodo.
Mater errati pænitens per noctem dome-
stico

stico inclusa hortulo arrepto flagello in se-
se animadvertere, veniamque à Deo flagi-
tare. Inter verberandū, qui è regione erat,
montem luce vidit mira circumfusus, &
in medio monte cubitis aliquot è terra su-
spensam in aëre crucem: ingeminare tunc
iētus, misericordiāq; diuinam fufis lachry-
mis implorare: mox accito viro, deplora-
tumque filium sinu complexa ad spectacu-
lum redit. Crucis aspectus adolescenti bo-
norum omnium origo fuit, nam paulo post
per baptismum & animi & corporis vires
obtinet.

In Idolorum templum Christiana mu-
lier visendi studio allecta semel ingressa, si-
ue per incuriam, siue verecundia stimulan-
te, ne ab adstantibus notaretur, veneratio-
nem Idolo cum cæteris exhibuit; vix exc-
crando operi consenserat, cum acutis do-
loribus mire torqueri cœpta est: morbo vi-
res per intervalla sumente, domum se re-
cipit: in summis angustiis matronam aspi-
cit illustrem curiositatis se & incuriæ ar-
guentem: lueret nunc culpæ pœnas, ve-
niamque à Deo supplex peteret. Implo-
rata ex intimis visceribus Dei misericor-
dia,

228 LITTERÆ AN. M.DC.XXI. SOC. IESV
dia, dolor illico abcessit.

Mulieri post diuinissimam sumptam Eucharistiam duos integros dies sacra hæserat in gutture hostia: rei nouitate perculsa in animi statum cœpit diligenter inquire: post longum examen cum propinquo, nescio quo, rixarum igniculos nondum omnino sopitos, atque extinctos inuenit. hîc dilectionis in Deum ac proximum actus feruenter exercere orsa est: eodemq; tempore sacram particulam ad pectus descendisse sensit, in eo tamē etiamnum hæ-rere. Denique Sacerdotem nostrum tremefacta conuenit, confessioneque rursus expurgata, omnibus odii reliquiis abster-sit, suauissimus cibus nulli in posterū molestiæ fuit, qua re diuulgata, in diuinissimum epulum mire aucta pietas.

*Christiani, qui pertinent ad Cingocn
& Xicocn.*

COMplures in tredecim ex his regnis
Christiani, multis tamē obnoxii molestus, Christi quippe hostibus permixti.
Inuisit omnes hoc anno eius Ecclesiæ cultor

tor Pater Ioannes Baptista Porrus. Præter eos, qui ad Ecclesiam rediere, illam hoc anno ingressi centum & quadraginta.

Christianam mulierem genere illustrem Satrapa quidam; cui illa seruiebat, variis artibus à Christi obsequio conatus auellere. Ad postremum eruditum in Iaponiæ sectis Bonzium idem in opus adhibet. Descenditur in certamen: rationum momenta penduntur, quid multa? implicatur ad interrogata magister: hæret: pallet: consilii inops quo se vertat, ignorat; disputationis exitus mulieris exilium fuit, quo lætissima successu Christiani animi robur longe lateque vulgavit.

Perfimile Christiano adolescenti contigit. Is ex vnius regni Farimæ Toni imperio ad Christiani cuiusdam labefactandam constantiam missus: egone, inquit, à Christo mortales auertam, cuius sanctissimam profiteor legem? his cum multa addidisset ad Iaponiæ sectarum falsitatem aperendam, purissimæq; Christi disciplinæ commendationem, qui modo in Ecclesiam efferati leonis in morem sæuiebat, in ouiculam repente conuersus tantum non Christianus

230 LITTERÆ AN. M.DC.XXI.SOC. IESV
stianus effectus : sanctitatem Christianæ
scholæ probavit, libereque permisit Chri-
stiane ut viueret.

Idolatrarum pagus quidam pusillum
Christianorum gregem ad fidei defectio-
nem non sollicitauit modo, sed duro anni
tempore lare oppidoque facessere coëgit.
Perstiteri illi sub dio ventis imbribusque
expositi, tellure iam niue cooperta æqua-
nimitate tanta, ut remittere tandem cœ-
perint infacutores.

Adolescens ad Christum hac ratione
adductus. Regni Bigensis incolæ supersti-
tionibus supra quam credi potest addicti
sunt. Magnus inter eos sagarum, ac venefi-
carum numerus, magnus Bonziorum, qui
dæmonem certis carminibus vocant, ad-
iurantque: illas micos, hos Yamabuxis ap-
pellant. Solemne his omnibus est, quoties
à dæmone fiscitari aliquid volunt, certis
verborum formulis illum aduocare, qui in
adstātium aliquem ingressus responsa dat:
scitum etiam inter eos, hanc veneficis po-
testatem ademptam, quoties Christianus
aliquis adest, aut non longe ab domo distat.
Accidit igitur, ut eo, quem dixi, adolescen-
te præ-

te præfente quodam in loco, à quo Sacerdos noster non procul aberat, per tres integras noctes ne quidquam adiuratus dæmon: indignati sacrificuli Christiano male precari, qui in vicinia illa lateret: admirari adolescens, quod tantæ Christiano homini vires: dubio procul veram eam religionem videri, quam Iaponicorum sacrorum magistri perhorrescerent. Rem tantam experimento probare suo vltius statuit. semel ad execrandas cantiones cum adesset: submissa ipse voce Iesum & Mariam subinde inuocat: tota abiit nox Satanæ ministris frustra sudatibus: cessat diuina vsurpare nomina adolescens, simulque domo excedit. Vix ille domo pedem extulerat, cum adest repente dæmon. Ea res vt Baptismum peteret, & voti compos fieret, causa fuit.

Puellæ illustris viri filiæ, matrona quædam in purpurea veste per quietem visa, à quâ libro, rosarioque sacro donata, monita vt Christiana fieret. A quiete præ baptismi desiderio lachrymas tenere non poterat: Mariæ nomen in sacro fonte adæpta Virginem vnice colit.

Firoximæ, quæ Regni Aquæ caput est, Christiana vires capit religio. Adolefcons nobilis Christo renatus hominis cuiusdam opulenti filius atque heres. E mente pæne dimouit rei nouitas parentem: post multas adhibitas artes captum filium Gubernatoribus regni sistit, suo vt arbitrato in Iaponiæ regis contemptorem animaduertant: iracundiam rati Prætores, in causa conniuent: at non conniuet impius parens hæreditatis iure adempto filium domo pellit: ille in summa rerum egestate vitam ducit, probatissimis Christianis imitandam.

Ex Aquensi regno ad Christianos regnorum Suuo & Nagato profectus Pater, cui etsi nondum recuperatis post diuturnum morbum viribus, temporeque per incommodo, quo per niues, ac montium culmina incedendum, res futura asperior; tamen Christi Domini verborum memor, quibus Beatæ Virgini Terefiæ animos addens, verum se calorum ait, tempestatumque dominum esse, itineri se dedit, quod Christo iuuante perfecit incolumis.

Yamagucii urbem de itinere inuifit regni Suuo primariam, magni illius orientis
Apostoli

Apostoli Beati Francisci Xauerii præsentia ac miraculis nobilem. ibi diuinitus prope inter tot Bellorum tumultus rerumque vices ad hæc vsque tempora domus illa extat, in qua Sanctus Pater sacrificauit, & aliquandiu vixit: in eamque Christiani sextis feriis ad verberationem, Dominicis ac festis diebus ad preces, & sacra colloquia conueniunt. Singularis in Ecclesia hac ad res sacras propensio cernitur, tenerrimusque nescio quis ad pietatem sensus: non sine lachrymis ad sacra accedunt mysteria, à patrumque consuetudine vix auelli se sinunt, vt non parum hic desudandum Patri fuerit in discessu.

Ab vrbe Fangui, quæ Regni Nagato metropolis est, aduocatus Pater rem Christianam bellè florentem reperit, sæuiente vel maxime hoc tempore in Christi gregem regni dynasta. Sacri martyrum cineres, qui tertio abhinc anno viui combusti constantiam, ac nervos animis addidere: eos magna veneratione colunt, & sextis quibusque feriis sub noctem ad locum martyrii supplices adeunt, flagellisque se cædunt. Inter magnæ virtutis viros Leo quidam hic Patrem

I 3

trem cōuenit, qui Satrapæ quondam charissimus, ac prædiues, post oblatas sæpius ferro ceruies, exul demum pro Christo in montis culmine pauperrime se, familiamque sustentat. cædendis è monte lignis ad urbemq; diuehendis, pluris æstimans crucis Christi oprobrium, quam thesauros Ægyptiorum.

Fanguensibus omnibus rite Sacramentis, verbisque piis communitis ad Mimasacæ regnum progressus Pater: inde confirmatis in pietate Christianis ad Foqui contendit, in cuius regni caput superiore anno sibi pedem inferre nunquam licuerat, nunc verò aditus facillime patuit: quæ res ob id etiam accidit iucundius, quod omnium ipse primus ex Euangelii præconibus urbem illam inviserat. Oblatæ Christo regni huius primitiæ aliquot per baptismum, eo profecto gratiores, quo alieniore collecto tempore. Concurfus huc Christianorum ex vicinis regnis non exiguus: nonnulli triginta, & eo amplius emensis leucis ad cœlestia properare pabula. Multa in regnis Inaba, Sanuqui, quod ad Xicocu pertinet, multa in Iyo collecta messis. In
huius

huius postremi regni vrbe Matzuyama senex Idololatra, qui totis viribus in Christiani filii exitium intenderat, cum non longe ab obitu esset, sancti Spiritus luce perfusus baptismum votis omnibus petiit, in vnica Christi lege salutem sitam esse testatus: postero à baptismo die lætus concessit. Noster inde ad urbem Itagima 24. diffitam leucis profectus est. Itinere hoc habet Iaponia vniuersa nullum difficilius. Octo superandæ leucæ sunt tot inaccesse saltibus, tot salebris asperæ, tot præruptæ præcipitiis, vt fidem omnino superet. Per sacram hebdomadam incedendum hac, aut potius reptandum manibus Patri fuit, crucem per eos dies baiulante, necemque indignissimam ferente Domino, mitius. Peracto itinere biduum sine voce, ac sensu traduxit. Receptis viribus Christianum manipulum mirifice consolatus est, cui novos etiam commilitones adiunxit. Mox Ozu Ecclesiæ recreati missionem clausit.

*Christiana res Meaci, Fuxumi, Oraca,
Sakai & proximis in regnis.*

Q Vatuor è nostris Sacerdotes, & Frater vnus huius vineæ partem excolunt. Meaci remissus in Christianos itur, vrbis Præfecto rebus nostris non infensissimo; Ethnici vero capitale in Ecclesiam odium exercent. Quare nec Christianis, nec Patribus, quo se recipiant angulus in vrbe permissus. Specus & in terra abditas visceribus cryptas ferarum in morem incolant necesse est: Camporum sæpe ad eundæ vastitates, vt maiore cum libertate famelicæ turbæ diuina distribuantur pabula. Centum quinquaginta quinque sacro fonte lustrati ad aduersa omnia paratissimi: superiorum annorum Martyres suo adhuc exemplo prælucent, flaminæque illæ, quibus extincti, non moriturum incendium in laponiorem pectoribus excitarunt.

Matrona Christiana Ethnico homini nobili opolentoque nupta, cum deuecta iam ætate esset, ne suæ saluti pestilens viri
commer-

commercium officeret, bona eiusdem venia seorsim in domuncula viuit summam ferens rerum inopiam, in precibus, corporisque pœnis assidua.

Adolescens Virgini addictissimus castimonix imprimis laude commendatus in vitæ discrimen adductus ad Virginem pro se orandam certos homines mittit. Interim somno capitur. Secundum quietem à Virgine bene sperare iussus. absolutis precibus cum valetudine euigilauit.

In oppido quodam, in quo Christiani hominis familia vna, cum casu ignis applicitus, & iam populabundæ passim flammæ vis glisceret, admonitus Christianus, sibi vt supellectilique consuleret: ille propitio, quem coleret, Deo nihil sibi timendum asserit: in genua cum familia positus Numinis implorat opem. Mira res. Domibus vniuersis ad vnam exustis, Christiani tantum ædes steterere prorsus innoxia, ethnicis rei nouitate perculsis.

Complures in hac vrbe Christiani medici sunt, quorum industria corporibus vna animisque præsto est. Cum ethnicorum infantes apertum adeunt vitæ periculum,

I s

per

238 LITTERÆ AN. M.DC.XXI. SOC. IESV
per corporeæ medicinæ adhibendæ spe-
ciem, æternum vitæ remedium per baptis-
mum applicant.

*Missio ad Regna Omi, Mino, atque
his finitima.*

EXcurrit Pater Yuqui Iacobus Iapo-
nius ex nostra Societate ad Christia-
nos iuuandos in regnis Omi, Mino, Oari,
Ixe, Quinocuni & Aua. Iubileum mire fe-
rax extitit, segesque collecta pro votis.

Puellulam duos vix annos exceden-
tem in regno Mino reperit supra ætatem
Christiana callentem mysteria : ad marty-
rium votis omnibus inhiantem, molestias
omnes summa tolerantia Dei causa feren-
tem: cum à Deiparæ imaginis aspectu ab-
strahitur, lachrymis vix temperantem, ta-
lia denique supra captum agentem, vt om-
nium in se oculos, expectationemque con-
uertat.

Idololatram mira inceserat cupido
Christo nomen dandi, sed ære alieno ob-
strictus, cum soluendo non esset, muneri
cuidam superstitioso præerat, quo pecu-
niolam

niolam ad soluenda nomina comparabat. Is cum sese daret occasio, ornatissime de Christo, de Camis & Fotoques despiciatissime loqui. Impetitusæpe ab suis constanter egit. Tandem comparata per Patrem pecunia, dissolutisque nominibus ad baptismum alacer venit.

Sodalitate passim institutæ cum fructu. In regno Aua viginti Christo aggregati adulti iacta Euangelii semente in lætorem prouentum. Etiam complures baptismum expetunt, quod videant dæmones passim in ethnicos, non item in Christianos debacchari.

*Missio ad regiam Yendo, Surungæ, Fococū
& alia ad loca.*

Christiani, qui in regia Yendo, vbi Xogum Iaponiæ vniuersæ clauum tenet, quique Surungæ versantur, & qui in Fococū ad Aquilonem spectant, Patris Xiquimii Martini Iaponii ex nostra Societate aduentu recreati: In vrbe Yendo & Numata sexaginta sex adulti, in Fococū. 27, sacris aquis renati certi susceptam legem coram

240 LITTERÆ AN. M. DC. XXI. SOC. IESV
coram ipso rege ad necem vsque propu-
gnandi. Inter eos magni nominis medicus,
qui nostrorum perlecto tractatu, quo Iapo-
niorum refelluntur dogmata, Christi fidei
amplectendæ studio cum vniuersa familia
captus est.

Feminæ duæ quæ decimo abhinc anno
catechismum audierant, cum dynastæ cui-
dam ancillarentur, & perpetuo ob id clau-
sæ essent, baptismi compotes fieri non po-
terant, hæ tandem hoc anno post decen-
nales susceptas afflictiones, & ieiunia, ad
quæ voto se obstrinxerant diuinitus plane
baptizatæ.

Puellæ duæ coniugio nondum maturæ
à baptismo castitatis amore in tantum ca-
pi cœpere, vt per dies singulos ter Deum ac
purissimam Parētem pro virginitate tuen-
da enixe precarentur, breui vnà ad Virgi-
num æternas nuptias euolauit, altera in
eandem spem ingressa.

Cum Surungæ Patre suadente illustriū
Martyrum Dogiu Ioannis, & Cacusūque
Petri corpora post septennium exhuma-
rentur, vt honestiorem in locum translata
religiosius haberi possent; Ioannis in arca
exsic-

exsiccata, censumptaque omnia; Petri verò
 loculum aquis ad summum innatantem
 non sine admiratione animaduertūt, cum
 eodem in loco vtraque sita arcula: exhau-
 sta aqua candidam ex calce massam tota
 diffusam arca reperiunt: qua sublata, ecce
 tibi Petri corpus cum vestimentis integrū,
 ac recens veluti modò conditum, & hu-
 matum nulla tabe tactum, nulla læsum ex
 parte, cum septimum iam annum vacas-
 set animo. Ingentibus gratiis Deo actis,
 quod sacrum corpus contingere non au-
 derent, clauditur iterum loculus, cuius in
 superficie ferrea reperta crux affabre ela-
 borata. Ea res ad fidei res magis magisque
 in pretio habendas incitamento fuit.

*Christiani in Regno Oxu &
 Deua.*

MAsamune regni Oxu dynasta prima-
 rio, Christi gregem per angulos quos
 libet insequente, quatuor tamen è Socie-
 tate Patribus, & Fratri vni locus haud de-
 fuit ad operam suam in vasta hac vineæ
 parte collocandam. In regno Deua ingens
 Chri-

342 LITTERÆ AN. M.DC.XXI. SOC. IESV
Christianorum numerus, quorum in gra-
tiam, & ad eos etiam iuuandos, qui Matzu-
maye in regno Yezo versantur, instituta
hic Patribus sedes est. Hoc anno mille cen-
tum octoginta tres adulti Christum susce-
pere: iure ut affirmare quis posset Regum
leges, atque edicta in Christi disciplinam
pro eodem capeffenda præcones, atque
hortatores videri.

Septuagenarius Idolorum cultor Iapo-
nia tota Sanctitatis fama notissimus, vnus
ex tribus, qui præ cæteris habebantur in
pretio, Christi iugo ceruicem hoc anno
supposuit, lacrymis haud valens tempera-
re, quod ætatem totam Diabolo consecras-
set. Magni viri exemplum plurimis incita-
mento futurum speramus. In oppido ditio-
nis Oxu coloni fere centum suis cum fa-
miliis baptismo lustrati. Ad defectionem à
magistratu incitati exilium, ac necem salu-
ti se posthabere affirmant. Post multa, ne
colonis destituta cuncta syluesceret, Chri-
stiano ritu viuere permitti.

Homini cuiusdam, quod domo sibi ex-
ulandum in Christi causa rei familiaris an-
gustias formidans, secum ipse versare iam
cœperat,

cœperat: num Christo ad tempus renunciat: ab vxore, cui per quietem viri inconstantia patefacta, in melius versa consilia.

Christianum senem nobilem, & bellica olim florentem laude, cum in extremis ageret, ad Christo renunciandum Ethnici propinqui incitabant, ne solenni funeris pompa careret; quibus bonus senex: neminem vestrum, inquit, latet, quid pro temporario gesserim honore cum vires suppetent: quæ verò tandem, quælo vos, dementia est, æterni honoris iter ingredientem ad temporalem respicere? quid pro solida gloria, quam in extrema ætate Christo auspice reperi, gloriolæ inanis umbras, aurasque sectari? hoc vnum certum, fixumque habetote, me à concepto proposito nec mei, nec meorum omnium exitio reuocatum iri. Christianis, amabo vos, corpus hoc reddite, suo ut ritu sancte sepeliâr. Paulò post Sacramentis munitus obiit, Christianoque more humatus, multis colucentibus per triduum super tumulum flammis. Quæ res, quod miraculi instar habita, ad Christum propinquos adduxit.

NOVA

Nova in Ecclesiam tempestas ab Date Masamune Regni Oxu dynasta excitata.

OXu regnum, quod Iaponiorum regnorum amplissimum est, quinque obtinent dynastæ. In iis Masamune genere, ac bellica virtute illustris primas ferè possidet. Hic ille Princeps est, qui ante aliquot annos religiosi cuiusdam viri suasu ad novam Hispaniam nauigium cum Legato misit; cuius rei series Europæ nota satis est. Hanc ipsam legationem Daifusama Iaponiæ tum Imperator, Princeps, qui hodie regnat, & reliqui procures sinistre interpretati. Legatus in Hispaniam, & Christianorum numerus bene magnus rem in suspicionem trahebat: cum Hispano Rege foedus putabatur ictum, breuique externa fultum ope dynastam euasurum in Regem. Hanc suspicionem ut omnino deleret Masamune Christianos omnes ad vnum ditione tota delere statuit. Ad Legati aduentum conceptam continuit iram: illum simul ac Nangasachium attigisse accepit, in Chri-

Christianos debacchari orsus est acriter. Tria promulgauit edicta. Primo illa continebantur: grauitè in regiam maiestatem peccasse eos, qui Rege perinuito Christiana sacra hæcenus suscepissent: proinde ad ea abiuranda præsto essent: si secus fecerint, diuitibus fortunæ ac patria; vita pauperibus deferenda. 2. Honores atque opes offerebantur illi, qui Christianum quemlibet proderet. 3. Euāgelii ministri omnes sua ditione facerent: sin minus Christum abigerent. [His promulgatis in legatum primò hastam intorsit: an ille pectus obiecerit, incertum. Fama in vulgus emanauit, molliter hominem, turpiterque se gessisse; fortasse ne à gratia dynastæ excideret ambigua oratione vsus. Quidquid tandem egerit in diuino iam discussum est tribunali, ad quod paulò post accersitus.]

Christianorum aliqui malorum oppressi metu dedere manus: alii voluntarium exilium elegere: generosè alii fuso sanguine pugnarunt. Aderat hac tempestate in Curia Pater Hieronymus de Angelis è nostra Societate, qui luporum, haud ferens in Christi gregem carnificinam, in publi-

K

cum

246 LITTERÆ AN. M. DC. XXI. SOC. IESV
cum prodire statuit ad suos in fide reti-
nenda iuuandos: sed Christianorum victus
precibus, ac lacrymis, qui parente orbat,
lanienæ mox tradendi, ad opportunius
tempus se reseruauit, magno interim cum
Christianæ rei lucro vires, animosque suf-
ficiens pugnaturis.

Goto Ioannem Christianorum veluti
parentem, ac fidei columen, quod sibi gra-
tissimus, perdere nolebat Princeps. Ho-
mini igitur potestas facta in Christi lege
persistendi, modò ad tria illa iureiurando
se obligaret: quorum primum: se ne ad ho-
ram quidem Euangelii ministros hospitio
excepturum; alterum: Christi legem sua-
surum nemini, nec eiusdem retinendæ au-
ctorem fore; tertium: silentio pressurum
datam sibi Christiano ritu viuendi facul-
tatem. Nostro consulto Ioannes respon-
det, in huiusmodi iuramenta salua religio-
ne se ire non posse; si iuramenti onere so-
luto haud viuere permissum, valeat Dyna-
stæ gratia, fortunæ, vita ipsa. Subiratus ini-
tio ad hæc Princeps, postmodum placatior factus, in hominis causa conuiet.

Christianus quidam Satrapæ propin-
quus,

quus, satanæ administris, ut Christo valediceret, valide urgentibus, non prostratus modò, sed filium etiam duodennem rei prorsus ignarum eandem in sententiam ire testatus. Domum reuersus præclarum facinus coniugi, matri, filio narrat. Dici vix potest, quanta aduersus hominis ignauiam ira familia tota æstuarit: vilem, ignobilem, imbecillum, hominis nomine indignum appellant, qui adeò turpiter manus dedisset. Ille ad hæc in furorem versus arrepto fuste, non in conuiciantes modò, sed in sacras quoq; imagines animaduertere orsus. Filius patris detestatus amentiam lacrymis, ac singultibus sese discrucians Gubernatores adit; Christianum se esse, si quis aliter pronunciaffet de se, mentitum: in fidei suæ testimonium vitam offerre. Victi pueri lachrymis Præsides de solo iacentem attollunt, domumque bonæ spei plenum remittunt. Haud æquis animis ab filio irrogatam iniuriam tulit pater: ad tribunal sistit innoxium, vrgetque imperiosius, ut è pectore, velit, nolit ipse, Christum extorqueant. Iubetur puer paternæ hæreditati renunciare, ni Christo renunciaret. Ille:

K 2

non

248 LITTERÆ AN. M.DC.XXI, SOC. IESV
non exigua modò hæreditas; sed quæcunq;
terrarum ambitu continentur bona, & vita
demum ipsa salutis ergò perdatur æternæ.
Hic pater districto pugione in filii guttur
irruerat, irruisset in adstantium manibus
prohibitus. Interim eodem in gradu confi-
stens puer, mucronique fortiter se aptans
egregiè verò, inquit in paruū, ac inermem
filium meus fortis est parens. Illud ipse
ostendisset robur in Dei sui lege propu-
gnanda. Denique non ita multo pòst fa-
milix preces, ac lachrymæ perditum ho-
minem reuocarunt ad mentem. Suimet
igitur pertæsus, supplex veniam à Deo pos-
cere, Gubernatores adire, testari, se paulò
antè vix sui compotem fuisse, cum rem ra-
tioni adeò repugnantem aggressus: Chri-
stianum se esse, ac fore in posterum: ad
commissum piaculum suo expiandum san-
guine paratum. Post hæc confessionis ergò
Patrem adit: sed, quod publicum crimen
publica pœna refarciendum: non prius ad
confessionem admissus, quam postquam
inter diuerberandum sese crimen coram
Christianis detestatus esset. Effusus in la-
chrymas, gemitusque ex imo ductos inter
flagro-

flagrorum ictus vocem illam iterabat: ego, fratres, nihil sum, & si quid nihilo deterius est, hominis loco, ac nomine indignum me habetote; rogo vos per Deū vt tali me loco habeatis, si quidem in Creatorem, ac Redemptorem meum ingratiſſimus extiti. Eadem nunc cum Christiano alicui fit obuius, gemibundus vſurpat.

Confectæ ætatis homini, qui olim Bonzius, ad defectionem à Christo admotæ machinæ. iis in irritum cadentibus, oppidò faceſſere coactus eſt, vt iuſtitia adminiſtris aduentantibus ſe Christianum continere neminem reſponderent. Diſceſſit ſenex, & aliquandiu latuit: ad Gubernatoris autem aduentum è latebris prodiit, ſequē neci obtulit: ſed dimiſſus eſt, quod non niſi amens reputari poſſet iſ, qui nullo in precio vitam haberet.

Septuagenarium item militiae olim laude celeberrimum familiares aliquot beneficiorum ab Date acceptorum memoria à Christo diuellere conati: ſed aſperis verbis impii oratores accepti; intelligerent ſe in poſterum huiusmodi homines amicorum loco non habiturum: quæ ea tandem

K 3

ratio

250 LITTERÆ AN. M.DC.XXI. SOC. IESV
ratio dictaret, vt qui toties pro temporariis
bonis, terreniq; Principis dignitate tuen-
da vitam in discrimen obieciſſet, pro æter-
ni Regis gloria mori recuſaret? ſi beneficia
ab Date accepiſſet, meruiſſe ſe etiam lon-
ge maiora: præpotenti verò Deo bonorum
omnium debitorem ſe adhuc exiſtere: quid
ni æternum ſeruitium æterno benefactori
offerret? his verbis falſorum amicorum re-
preſſi conatus Nobilis adoleſcentis ſatra-
pæ in aula verſantis nequicquam tentata
conſtantia. Tentatur à Bonzio mater, vt
filium è ſententia maternis precibus dimo-
ueat. Illa: ego ne, inquit, tantum malum na-
to ſuadeam? ergò ne pro caducis æterna
deſerenda? Bonzious ad hæc: quid multis eſt
opus? ni ille obtemperet, vitam amittet: tu
filio orbata ſenectutis incommoda quæ fe-
res? bona fœmina ſic excipit: ſeptuaginta
& tres annos vixi, vitæ quota pars ſuper-
eſt? paucis contenta vita eſt. Quid ſi ſuper-
ſtorea in fluminis ponte aſſidens prætere-
untium miſericordia vixerim? deniq; cum
induſtria nulla profuerit, qualis tandem
fœlicitas fame pro Chriſto cōfectam æter-
næ gloriæ ſatietatem adire? Bonzious re-
ſponſum

sponsum admiratus, operam ne perderet, ab incepto destitit.

Oppidi cuiusdam dominus oppidanum hominem candidum ac syncerum, quòd Christum abiurare nollit, ex procera arbore capite in terram obuerso suspendi iubet: ille aliquot horis exactis, fune diffracto præceps ruit: ingens sanguinis vis ex ore egesta alliso ad terram capite, membrisque contusis omnibus. Nondum exsaturata crudelitas. Iubetur omnino nudari, & sub dio vinctus cæli iniuriis hyeme tunc maximè rigente exponi. Insuper vxor ad viri conspectum item alligata constituitur cibo seuerè interdicto, quod si vel bolum gustasset vnum, id defectionis fore signum, addictus ad pœnā paruulus, natu bienniū nondum excedens, qui matrem prospicere posset, accessu tamen prohibito. Tres integros dies bona fœmina piaculum metuens cibo prorsus abstinuit, prolatura longiùs ieiunium, ni Christiano hortatore comedendi religionem deponere suasa, cibum ad vitam sustentandam nō ad sectam aliquam profitendam à Deo subministrari intelligens, tunc & infantulo datum acce-

K 4

dere,

252 LITTERÆ AN. M.DC.XXI. SOC. IESV
dere, qui tres eos dies in matrem identi-
dem coniectans oculos virili prorsus ani-
mo perstitit, gemitu, lachrymisque ad mi-
raculum suppressis, id quod parentibus
non exiguo fuit leuamini. Tyrannum tan-
ta non emolliit constantia, atrociora me-
ditantem hoc anno relinquimus: rogan-
dus interim Deus, vt seruis suis præsto esse
pergat.

Trecenti, & eò amplius Christiani è
Virginis Deiparæ sodalities vno contenti
pago ad fortiter Tyranno resistendum cõ-
spirauerant; sed ne integrum deleteretur op-
pidum, in eos animaduertere Tonus veri-
tus est.

Filiam Ethnicus pater è prima nobilita-
te conatus adducere ad Satanæ cultum:
cum frustra sudasset: ego verò in posterũ,
inquit, filia loco te non habebo, si quidem
in illas me coniecis angustias, vt fortunis
aliquando spolier omnibus. Cui filia: quid
ego te Patrem appellem, qui mihi è corde
fidem, æternæ nimirum salutis fundamen-
tum, coneris abripere? Parem fortitudinis
laudẽ primaria fæmina meruit miris modis
à viro per filios semel, & iterum sollicitata.

Ioachimo

*Ioachimo & Anna coniugibus, pro Christo
in regno Oxu illata cades.*

IN oppido Mizusaua in ea regni Oxu parte, quæ Masamune paret, Christiani duo versabantur coniuges Ioachimus & Anna. Cum in Christianorum capita tempestas maxime sæuaret, Daigendoni oppidi domini iussu Tagimadonus cum imperio missus ad Christi legem pro viribus ditione tota ablegandam. In sanctos coniuges admotæ machinæ, qui verba minasque risere. In urbem Xendai, vbi Daigendoni sedes, tridui Mizusaua diffitam mittitur Ioachimus: ibi ab Tono sollicitatus cruciatuū ac necis acerbitate obiecta, eodem quo suprâ animi robore ludibrio se habere omnia vno præ Christo testatus est. Hic nouem dies in ediam tolerare iussus; quamquam Christianæ charitati aditus non defuit ad sancti Martyris famem subinde leuandam. Tres ac viginti dies inter militum ac vigilum scommata, hortationesque impias in carcere exegit: demum Mizusauam repetere iussus, vbi vnâ cum Anna, si pro-

K 5

positum

254 LITTERÆ AN. M.DC.XXI. SOC. IESV
positum non mutasset, capite plectendus.
Ioto Ioannis, de quo suprà mentio facta,
industria Pater Hieronymus de Angelis ac-
cerfitus, qui præ lætitia gestientem homi-
nem confitentem audiuit, & ad præclara
omnia incitavit, Interim Annæ viri aduen-
tus, ac iudicis sententia per nuncium in-
notescit; miro illa delibuta gaudio, vestes
ad martyrium honestè subeundum induit,
& in genua procumbens, flagris sese cædit:
mox flagella ipsa nuncio dono dat, qui præ-
clara in luce visam à se crucem testatur,
dum viri absentiam, martyriique se exper-
tem fore nuper doleret. Confecto itinere
bonus Ioachimus in Christi vulnerum, &
cruciatuum consideratione defixus à pia
coniuge exceptus & ad sacrificium orna-
tus. Interim apparitores tres ad Annæ cō-
stantiam labefactandam accedunt irritō
successu, triumphare hic Ioachimus cōiu-
gisque commendare pietatem: Christia-
nos, qui confluxerant per Deum obtestari,
Christi cruciatuum memores essent, illos
robur ac vires ad aspera quæque subeunda
sufficere. Inter loquendum ferrea collaria,
manicæque afferuntur; quorum aspectu re-
creatus

creatus Ioachimus genibus humi positus, caputque inclinans pœnarum instrumenta veneratus est: mox manus attollens Deo gratias agit, quod se instrumentis cruciari vellet, ea referētibus, quibus Christus Dominus tortus esset. Integra nox qua precibus, qua piis cohortationibus extracta. Erat Dei seruis filia, quæ hoc tempore ex oppido, ubi versabatur, aduenit, lacrymis ac gemitibus præ charissimorum parentum desiderio aërem feriens. Flere vetuit mater, verita, ne sibi tanto fletu emollescerent viscera; at pater: lacrymis, inquit, filia non est cur temperes: nec si centum mihi natæ collacrymantes adessent, à proposito me dimouere possent meo, tantum mihi viriū à diuina bonitate sperarem. Sed lacrymas tibi, non nobis, fundas. tuæ deplorandæ miseriæ sunt, quæ superstes adhuc es, nobis inuidenda beata fors, qua cælum petimus. Hæc loquutus, filiam Christiano, qui aderat, impentē commendauit. Post hæc cum hora instaret, qua vincendi erant, admoniti Dei serui se vt multa prece compararent: id ipsis feruentius agentibus manica iniectæ retortis post terga brachiis, ferreaque

256 LITTERÆ AN. M. D. C. XXI. SOC. IESV
reaque ceruicibus imposita catena domo
educuntur, ad spectandum innumerabili
confluente multitudine, quod nondum
visa res iis pro religione tuenda mortem
oppetere. Ioachimus elata voce ad circū-
fusam turbam conuersus: gratias, inquit,
ingentes immortalī Deo ago, qui meis
tandem votis respondit: Christi fidem am-
plecti, eamq; meo testari sanguine arden-
ter iam pridem Deo ipso dante cōcupiui:
nunc ad votorum metam propero alacer.
Incedebant ad destinatum locū Christiani
ethnicis permixti admirabundis. Mirabile
prorsus, ac pium erat spectaculum, quin-
gentos fere Christianos aspicerē sericis in-
dutos vestibis, gladio ac pugione deposi-
to non aliis armis, quā Rosariis manus,
reliquiarum thecis pectus instructos pre-
ces effundentes bene ordinatæ supplica-
tionis instar. Ethnicorum numerum bene
magnum vt vidit Ioachimus, eos ad salutis
iter ingrediendum, quod Christiana tan-
tum religio aperit, contenta voce, zeliq̃ue
pleno pectore hortatus est. Serenitas oris,
frontisq̃ue tranquillitas in homine ad cæ-
dem properante omnium ad se conuerte-
rat

rat oculos, animosque. Inter duas honestas media matronas Anna ingedebat, cælestibus colloquiis toto itinere distenta, magnitudinem beneficii quibus poterat verbis extollens. Vbi ad supplicii ventum est locum, Tagimadonus expectandus fuit. Motam iniquè tulit Ioachimus, tātum bonum longius differri dolens: interim alta voce Dominicam precationem, salutationem Angeli, ac fidei symbolum vnà cum Anna pronunciauit, quibus expletis cælum spectare iubet vxorem, eiusque recreari aspectu, vbi mox in omnem æternitatem fruturi Deo. Hic adest Tagimadonus. storeas humi binas extendunt: depositis calceis suam quisque stoream ingreditur, genua ponunt, oculos ad cælum attollunt ad orientem, Christianis item supplicibus eandem in partem precātib. Ioachimus necis percupidus, moræque impatiēs precari latellitem suo vt munere fungatur: mox Pater noster inchoat, Christianis vnà atque Ethnicis contentissimis clamoribus Iesum & Mariam implorantibus, ita vt longissimè voces exaudirentur. Interim carnifex Dei famulum petit, sed clamoribus per-

perterritus primo ictu mediam aufert ab
 humeris ceruicem, quam etiamnum pen-
 dulam, Iesum tamen semel, & iterum in-
 uocantem alter planè præcidit. Annæ, quæ
 immota cælum suspiciebat, ab viriq; cruo-
 re aspergi se in ore non senserat, primo
 ictu amputata ceruix, quam adhuc subsi-
 lientem in aëre Christianus apprehensam
 properè currens nescio quo asportauit.
 Paulò pòst Tagimadoni iussu restitutum
 Annæ caput vnà cum Ioachimi ceruice
 pro foro præfixum tabella apposita iis ver-
 „ bis: Hi duo Coniuges quod à Christi fide
 „ discedere noluerint, hac cæde mulctati:
 „ Duodecima die decimæ lunæ. Sacra cor-
 „ pora à Christianis humata ingenti venera-
 „ tionis sunt.

Erat Dei seruis patria Yurinoxonai op-
 pidum regni Deua. Biennium antè saluta-
 ribus lustrati aquis à Patre Hieronymo de
 Angelis. Ingenio simplices & candidi, ad
 misericordiam sponte propensi: sacrarum
 rerum studiosi imprimis, vitæq; pro Chri-
 sto fundendæ. Voti compotes effecti sexta
 feria. 6 Nouembris 1620. Misuzauæ in Re-
 gno Oxu iussu Daigendoni Masamune vi-
 ces

ces implētis, cum Ioachimus 66. Anna 60.
ætatis annum agerent.

Quatuor etiam pro Christo illatam ne-
cem ibidem accipimus, sed fusiorem nar-
rationem insequentis anni litteræ dabunt.

Hæ sunt quas hoc anno Iaponicus ager
protulit, fruges. Illas filiorum tuorum su-
doribus, ac sanguine irrigatas, Paternitati
vestræ offerimus. Lætiorē segetem re-
cens fusus cruor pollicetur in posterum. è
P. V. & Societate vniuersa tanquam ex su-
periore irriguo in irriguum hoc inferius
precum & sacrificiorum aquas deriuari
poscimus. Ita fiet vt in vberriam Dei glo-
riam vineæ cultores incumbant, & lætissi-
mo cum fænore tot annis subactus ager re-
spondeat. Ex Amacaensi Portu. 6. Octo-
bris 1622.

Ex commissione Patris Visitatoris.

V. P. t. s.

Indignus in Christo filius

Hieronymus Mayoricæ.

*Supra centum octodecim Illustrissimi
Martyres, atrocissimis supplicijs ex-
cruciati, An. M.DC.XXII. pro fide
Christi per ignem & gladium & a-
quam coronam gloriæ reportauerunt.*

BARBARAE crudelitatis
& exquisitæ lanienæ atque
in Ethnico Christiano Iap-
oniæ regno ab omni re-
trò memoria, etiam dum
persecutio in Christianos
maximè flagraret, hætenus inauditæ, cau-
sam narrant eiusmodi.

Cùm per superiores annos, per omnes
regni sui Prouincias Iaponiæ Imperator
publico edicto vetuisset appositis capitali-
bus pœnis; ne quis Nauclerus Religiosum
vllum adueheret in Iaponiam, quod pro-
cliue erat ob viciniam ciuitatis Manilæ in
qua commerciis frequentandis magna e-
rat inter Hispanos & Iapones consuetudo;
Nihilominus Naucleri Iapones Christiani
& fidei propagandæ zelo ardentis, spretis
minis pœnisque legum, passim Religiosos
dissimulato habitu ad excolendam nouel-
læ Chri-

læ Christianitatis vineam à Manilensibus
ad Iapones deportabant.

Hos inter eminet Naclerus

IOACHIM,

qui cùm ex Manila in Iaponiam vela face-
ret, vectores duos habuit R.P.F.

PETRV M DE ZVNNIGA,

Sancti Augustini, & Reuer. P.F.

LVDOVICVM FLORES,

S. Dominici, religiosissimos Patres, qui ta-
men non ita clam ac rectè vehi potuerunt
quin proderentur, ideoque Hollandi ad
litora Iaponica Ioachimi nauem, per cau-
sam religiosorum quos vehibat, inuaserunt,
spoliauerunt, & ad Iaponiæ Imperatorem
criminando detulerunt.

Hanc ob causam Firandi cum duobus
Religiosis & nauticis suis ministris omni-
bus Christianâ quoque fide imbutis, Nau-
clerus Ioachim in vincula coniectus est.

Erat in ea vrbe quidam S. Dominici re-
ligiosus, qui collegam suum è custodia edu-
cere aggressus est, non irritò conatu. nam
& ipsum & alios non sanè paucos Christia-
nos vnà cum ipso eduxit quidem, verùm
quia ad perfringendos carceres Firanden-

L

les

ses sine magno strepitu, quod moliebatur, peragere non potuit, neque insidias cum silentio ad optatum exitum deducere: ideo detecta deprehensaque est machinatio & captiui omnes denuò in carcerem retrusi.

Accepit hoc barbarus Imperator, & tam acerbo animo accepit, & tam indignabundo furore in Christianos, tum ob religiosos fidei prædicandæ gratiâ in regnum ingressos, tum ob violatos perfractosque Maiestatis suæ carceres, exarsit, ut è vestigio Gubernatori Nangasakuano in mandatis dederit, venire & extremo ignis supplicio afficere Naclerum imprimis Ioachimû, deinde duos illos religiosos suâ naui aduectos, omnes etiam Christianos illos & carceri inclusos nauticos ministros; præterea religiosos alios omnes siue Europæi illi essent, siue Iaponenses, qui variis in carceribus detinebantur: quinetiam viduas omnes pupillosque illos quorum mariti, patresque, præteritis annis pœnas pro Christi fide capitales persoluerant, vniuersos denique illos, qui quacumque demum via ac modo, in hac fidei IESV CHRISTI causâ impliciti essent.

Venit

Venit igitur hoc imperio Firandum euocatus Nangasquanus Gubernator; & ex captiuis cognoscere voluit istas quaestiones; An Christiani essent; vnde: quando per baptismum abluti. Subinde etiam ad fidem abiurandam adhortabatur, non sine promissis fore, vt si fidem desererent vitâ donarentur: quam in rem, iubente Imperatoria Maiestate, potestatem sese, ita spondendi, accepisse assererat.

Verùm inter hæc vna omnium cōstantiæ plena vox fuit: Nullius se rei gratiâ fidem IESV CHRISTO datam negaturos. Ob hanc rem quod in firma volūtate persisterent, prolatâ publicè sententiâ, Nauclerum Ioachimū, R. P. F. Petrum de Zuniga Augustinianum, R. P. F. Ludouicum Flores Dominicanum ad rogam, nauticos ministros numero duodecim ad gladium damnauit, & capitali supplicio addixit.

Hac audita sententia sancti IESV CHRISTI Confessores, ad augendam animi voluptatem & firmandam certitudinem, qua pro CHRISTO IESV mortem subituri essent ex Præsīde ac Iudice suo percontati sunt, quâ de causâ mortis supplicio ipsos

L 2

puniri

264 LITTERÆ AN. M. DC. XXII. SOC. IESV
puniri iuberet. Ad quam interrogationem
disertis verbis hoc responsi retulerunt; Eâ
de causâ moriendum esse, quod Iaponiam
intraissent contra Imperatoris edictum ad
promulgandam legem IESV CHRISTI;
aut sanè quod illorum plerique violassent
Imperatoris edictum viros eiusmodi in Ia-
poniam inuehendo.

Hac igitur auditâ causâ, incredibili hinc,
& inde lætitia perfusi sunt, quòd sese ad
moriendum pro IESV CHRISTO damna-
tos viderent.

Locus supplicio destinatus extra Nan-
gasaquum erat: in eo loco area permagna
velut Amphitheatralis arena sudibus in
ambitum præfixis discludebatur, caueam
vocabo. Huc ex vrbe Confessores magnâ
comitante cateruâ producti & in illam ca-
ueam inducti sunt, ad suas deinde colum-
nas Trigemini illi Confessores supplicio
ignis iam addiæti, magnâ in orbem ligno-
rum strue digestâ collocantur. Antequam
verò ignis subderetur intra ipsam illam ca-
ueam in oculis stantium ad ligna Confes-
sorum duodecim illis nauticis ministris ca-
pita à ceruice abscissa sunt, ynde lætum au-
spicium

spicium cruoris fundendi profluxit.

Hic Christianæ eloquentiæ palmam, vel ipsis duobus religiosis Patribus, cum ob breuem in Iaponia commorationem vernaculam linguam non satis ad manum haberent, ita volentibus & iubentibus, Nauclerus Ioachimus præripuit. De quo testes auriti, oculatiq; affirmant; Apostoli instar in illius linguâ fuisse, adeo feruidè, adeo intrepidè IESVM CHRISTVM in ipso etiam fumo, & flamma prædicabat: quem cum Barbari Gentiles inter loquendum disturbare conarentur, & silentium etiam cum minis imperarent, Apostolicâ voce Ioachimus; Magis, inquit, oportet obedire me Deo, quàm hominibus. Nec est, quod minæ vestræ terreant, quod enim grauius aut atrocius à vobis mihi supplicium irrogari potest, quàm illud quod nunc perfero viuicomburium? Inter hæc ardentibus in orbem lignis, velut è flammæ suggestu igneas voces iaculari ardens amore IESV CHRISTI præco Ioachimus non destitit: donec ipse cum duobus beatissimis comilitonibus mirâ constantiâ, tam placidè, ac si immobiles essent, mortem cum

L 3

vitâ

266 LITTERÆ AN. M.DC.XXI. SOC. IESV
vitâ commutauit.

Editum est istud spectaculum die Augusti vndeicesimo anni Saluatoris vicesimi secundi supra millesimum sexcentessimum coram innumeris Christianis spectatoribus, qui per acclamationes, obtestationesq; per multas etiam ad Deum fusas obsecrationes animos addere sanctis martyribus ad perferendam inuictâ patientiâ pro CHRISTO IESV mortem conabantur.

Exemplò vbi Tortores animaduertebant sanctos Martyres expirasse, duodecim illa capita, quæ in supplicii exordio amputauerant, in præaltâ tabulâ publicè ad terrorem aliis incutiendum exposuerunt; Corpora verò vniuersa tum eorum, qui capite minuti, tum qui igne combusti occubuerant, vnum in cumulum intra caueam illam ligneis cancellis munitam congefferunt.

Huc ergo magno impetu & numero noctes, atque dies venerabundi accurrebant Christiani, quos barbaræ excubiæ, & fustibus & plagis impositis malè mulcabant, cùm imperatum sibi esse dicerent, prohibere ne quis Christianus sacra vlla
reli-

reliquiarum pignora colligeret , aufer-
rétur.

Vetari tamen non potuit, quin Chri-
stiani è primoribus nonnulli, tum ob indu-
striam suam, tum ob illam qua apud satelli-
tes pollebant gratiam, dolo bono corpora
quædam legerint & asportarint. Inter quæ
cum primis corpus integrum sacri sancti-
que Martyris R. P. F. Petri de Zuñiga , ex
supplicii loco ablatum dicunt eâ pietatis
mente, vt urbem Manilam primùm & inde
in Hispaniam deportaretur, vbi reportatæ
victoriæ, honores & sacrosancti triumphi
insignia non virtutis tantùm, sed & sangui-
nis meritis debita, cum & ab illustribus re-
trò maioribus, & à Parente nuper suo Mar-
chione excellentissimo de Villamanrique
& nouæ Hispaniæ quondam Prorege stir-
pem deducat, solemni pompâ, plausuque
decernenda sperantur.

Post has coronas in mortis metâ dona-
tas Gubernator Nangasaguanus Omuram
satellites ablegauit, qui adducerent capti-
uos illos, qui votis omnibus ad illam fortu-
natissimam mortis horam anhelabant.

Adeste , Spectatores , videte certamen

L 4

Mar-

Martyrum quale nullum vñquam in vniuersa visum est Iaponiâ. Quinque & quinquaginta IESV CHRISTI Pugiles laurum vno eodemque die retulerunt.

Exiuerunt è carcere Omurano beati Pugiles, in quo alii aliis quidem plures per annos fœdè habiti, omnes verò vniuersim in miserabiles compacti angustias velut in domesticâ Palæstrâ tirones futuri martyrii rudimenta posuerunt.

Informis erat descensu sub terram specus vix duodecim ex iunco textilium storearum humi capax; Ibi iam triginta, iam plures triginta incarcerati, terni vnam ad cubandum stoream possidebant octo palmis longam, latam tribus; in eâ pernoctabant, in eâ dies transigebant non concesso, vel ad vnum passum obambulandi spatio: & quod caput est, quodque vnicum ad mactandum vniuersos breui sufficeret, ibidem naturæ seruiendum erat. Dementum verò diurnæ annonæ hoc erat; scutella orizæ nigræ cum haleculis tostis obsonii loco, vel etiam subinde cum sorbitiunculâ aquæ ex lactucis herbariis raphanorum decoctæ.

Interea

Interea temporis dum sancti isti Athle-
tæ ex sua Omurani carceris vmbra & tiro-
cinio in solem & puluerem adducēdi sunt,
præses ad se euocauit è custodia Nangasa-
quana triginta viros mulieresq; quos vnà
cum Omuranis supplicio afficere decre-
uerat, quos cū capite plecti in sequentem
diem, latâ sententiâ, iussisset, mox in carce-
rem reduci voluit. Qui cū è tribunali
præsidis magna hilaritate, exultabundi &
veluti Rei ob malefacta capitali supplicio
digni combinati procederent, singuli, quā-
tum licebat, aut Crucifixos aut Cruces sal-
tem manibus in altum attollebant.

Vna inter illas mulieres fortissimas co-
ryphæa, velut si familiam turmâmue duce-
ret, anteibat omnes vexillum sanctissimi
LESU Crucifixi manu præferens, efferens-
que: hanc vnâ omnes aliæ ritu supplica-
tionis sequebantur, Dei laudem magnifi-
cē, idolorum ignominiam probrosē cantil-
lantes: quarum nonnullæ suos puerulos,
quasi victimas eidem secum martyrii sacri-
ficio destinatas, vlnis in cœlum materna-
rum deliciarum more iactabant.

Post famineum agmen suam quoq; viri

L s

ador-

270 LITTERÆ AN. M.DC.XXI. SOC. IESV
adornabant processionem Dei oculis, &
Christianorum spectabilem atque iucun-
dam: quam Christiani spectatores sanctâ
inuidiâ inflammati non otiosè tantum spe-
ctabant; sed magno etiam numero vestigia
venerabundè sequebantur.

Ecce tibi iam adducuntur Omurani
Pugiles è suo diuturno & squalido carce-
re hilares in arenam certaminis, inter hos
prodeunt vnus & viginti variorum Ordini-
um Religiosi.

Conuolauerunt ad videndum, ad salu-
tandum, ad gratulandum propè innumeri.
Omnes magnâ comploratione excepti
sunt, quis dicat quot lachrymis, quot suspi-
riis suos singuli Patres, à quibus se in Chri-
sto genitos proclamabant, appellarent,
prehensarent, complecterentur? Illud ante
omnia magno gemitu deplorabant, quod
illi Patres, illi tutores, illi Pædagogi spiri-
tuales è vita raperentur, per quos vitam
animæ sese hausisse prædicabant. Non ces-
sabant interim læti Patres mœstos solari
filios, quos bene de bono Deo sperare iu-
bebant, non defore Patres alios atque alios
qui sancta eorum desideria alerent, atque foue-

fouerent, hortabantur ad extremum atq;
obtestabantur vt in sincerâ fide Christi ad
mortem vsque constanter perdurarent.

Iam ventum est in feralem caueam, Car-
nifices suam singulis columnam, ad quam
igne conflagrandum sit, assignant: suam
singuli columnam, priusquam alligaren-
tur, sancti Sacerdotes in genua abiecti, ar-
ctè complectuntur, brachiis stringunt, sex-
centis osculis dissuauiantur.

Ad hoc exemplum Sacerdotum æmuli
Fratres suas etiam columnas ingeniculan-
do & complexi & osculati sunt. Quæ res
spectatorum omnium pietatem excitauit,
admirationem commouit, lacrymas ex-
torfit.

Inter hæc dum triginta illi quos diximûs
in Nangasacquanum carcerem post acce-
ptam decapitationis sententiam reductos,
ad eandem caueam producendi euocan-
tur, Carnifices occupati fuerunt collocan-
do, aptando, columnis alligando quinque
illos & viginti qui supplicio ignis plecten-
di stabant. Illos hoc ordine laxis licèt vin-
culis ad columnas adstrinxerunt.

Quatuor primis in columnis quatuor
alli

272 LITTERÆ AN. M. DC. XXII. SOC. IESV
alligati erant ob nullum facinus, nisi quod
ad suam domum diuercentes Religiosos
Patres hospitali charitate aliquando ex-
cepissent, hospitii mercedem martyrium
accepturi.

Hos proximo ordine sequebantur vnus
& viginti Religiosi tum Europæi tum Ia-
pones. Principem inter Religiosos locum
tenebat Reuerendus Pater

CAROLVS SPINOLA

Italus, Societatis Iesu Sacerdos, domo Ge-
nuensis ex Illustrissimo illo Spinolarum
sanguine originem ducens, propter nata-
lium quidem splendorem apud omnes cla-
rus, sed Illustrissima virtute, raris animi cor-
porisq; dotibus, & diuturnis ac difficili-
bus in excolenda Iaponiæ Christianâ vi-
neâ laboribus multò clarior. Post hunc,

R. P. F. ANGELVS FERRERIVS, ex reli-
gione S. Dominici.

R. P. F. IOSEPH DE S. HYACINTHO, ex
eadem Religione.

R. P. F. IACYNTHVS, ex eadem.

R. P. SEBASTIANVS QVIMVRA,
Societatis Iesu, Firandensis ciuis in ipsâ Ia-
poniâ natus, qui triginta annos in Socie-
tate

tate Iesu traduxerat. qui primus inter omnes Iapones iam inde à viginti ipsis annis Sacerdotio initiatus est, operarius in patriæ suæ vineâ laude dignus, eximiâ virtute præditus, & singularis facundiæ in maternâ linguâ orator.

R. P. F. PETRVS DE AVILA, ex ordine Sancti Francisci.

R. P. F. RICHARDVS DE S. ANNA, ex eodem Ordine.

R. P. F. ALFONSVS DE MENA, Ordinis Sancti Dominici.

R. P. F. FRANCISCVS DE MORALES, eiusdem Ordinis.

Non Sacerdotes hoc ordine ad suas collocati columnas.

VINCENTIVS Frater Religiosus Frâciscanus Europæus.

ANTONIVS FVGIA, ex Societate Iesu Iaponensis.

GONSALVVS FVSAY, ex eadem Iesu Societate Iaponensis.

PETRVS ZAMPO, ex eadem Societate Iaponensis.

MICHAEL IAPONENSIS, ex eadem Societate.

Hos

Hos subsequiebantur tres è Dominica-
nâ familiâ. Extremum agmen claudebant
tres è Societate Iesu in Iaponiâ nati, vide-
licet,

THOMAS ACASGIN & LVDOVI-
CVS CAVARATO.

Tertius denique IOANNES CHA-
COCO, inter quinque & viginti Marty-
res incendio consumptos, cùm columna ad
quam cremaretur deesset, non igne, sed
gladio martyrii palmam adeptus est.

Hos omnes Sanctissimos iuxtâ ac Reli-
giosissimos viros si ad calculum reuoce-
mus, subductis rationibus ponamus qua-
tuor hospites Religiosorum Patrum, no-
uem Religionis S. Dominici, tres S. Fran-
cisci, novem Societatis Iesu, numerum
quinque & viginti coronatorum marty-
rum inueniemus.

Illos vigintiquinque Martyres vix ad
columnas suas igne cremandos crudeles
ministri composuerant, quando ecce tibi
in conspectum venit novum illud triginta
candidatorum agmen, quod ceruices fe-
riendas securi submittere iussum erat. Vix
in conspectum venerant sanctissimis Reli-
giosis

giosis noui illi & desideratissimi Pugiles capite minuendi, cū derepentē in amplexus, in salutationes, in suspiria, in lachrymas, in amplexus effusi, & in hos illosque ad rogum paratos martyres diffusi sunt.

Hos inter ad columnam R. P. CAROLI SPINOLÆ matrona aduolauit Patri suo extremum vale dictura ISABELLA FERNANDEZ, quæ nunc ad gladium damnata, vidua erat nobilissimi quondam martyris qui ob R. P. CAROLVM hospitio domus suæ aliquando receptum gloriosam mortem subiuerat, & pupillū puerulum IGNATII nomine donatum vix quinquennem in delitiis habebat, quæ cū ad salutandum irrueret & columnam cum ipso R. P. CAROLO prope teneret; exclamauit Pater, Isabella ô Isabella vbi est tuus IGNATIO LVs? vbi est? vbi est, inquam, filiulus tuus? Hic ardens animi Isabella & factis non minùs, quàm verbis generosè respondens, è turbâ puerulum eduxit, brachiis suis imposuit, in cælum extulit; Ecce, inquit, Pater mi, ecce filiolum meum, ecce tibi, ecce filiolum meum adfero, filiolum meum offero, vt Deo immoletur, &

vna

vna cum matre martyr esse possit. Hæc ex ore matris de puerulo quinquenni P. CAROLVS SPINOLA auribus audiens hæc in vlnis matris oculis videns, tantâ quantâ dici non potest, perfusus est animi voluptate.

Ante verò quàm lignis ad columnas dispositis ignem Tortores iniicerent, inmani crudelitate securi percusserūt ceruices triginta illorum tum virorum tum mulierū, tum puerulorum duodecim, quorum natum maximus decimum ætatis annum nō compleuerat. Rogantibus autem quam obrem prius Martyribus istis capita truncarent, quam sanctos illos Euangelii Christiani ministros flammis traderent, imò verò capita ista recēns truncata, & adhuc tepido sanguine manantia ante oculos illorum obuoluerent; respondebant Tortores; velle se Christi Confessores hoc pacto perterrefacere & animos omnes, in subeundo ignium tormento, adimere.

Tandem aliquando rogos accenditur, ligna, quæ in omnem partem quinque & viginti Deo sacratas hostias ambiunt, flammis ardent. Fuerunt qui peculiari cura ac studio

studio obseruauerunt magnam inter accensa ligna, & religiosos martyres interuallum, fuit nonnemo qui metiendo deprehēdit ad tres bicubitos flammās à martyribus distare; nempe vt lento ac longo igne torrerentur: quocirca flammās etiam, si velocius quàm vellent ligna corriperēt, tortores ipsi, quā poterant restinguebant.

Huc spectabant, & hoc sperabant, vt qui ex medio incendio fugere vellet, fugere posset. Quocirca manus flaccidē ad columnas adstrinxere libero nodo, & non ægrē solubili, vt qui pœnas ignis sentiret, nec ferre vellet, integrum sibi esse videret vincula dissoluere, & fugā è cauea euadere ac vitæ consulere. Eadem de causa portam feralis caueæ aperiebant per quam cui liberet abiectā martyrii coronā, & ignem, & mortem effugere liceret. Attamen nemo martyrum fuit, qui ardente iam vndiq; pyrâ, non exultaret in Domino, non oculos cælo infingeret, non ignem ferret tranquillo ac sereno animo, & immoto corpore, ac si dura silex vel stet Marpesia cautes.

Nec breue tempus fuit quo miranda illa

M

con-

278 LITTERÆ AN. M. DC. XXII. SOC. IESV
constantia inter flammæ illæsa, atque in-
uicta stetit. Non defuerunt qui laudabili
diligentiâ allatis vnâ secum arenariis horo-
logiis atrocissimi supplicii spatia computa-
rent; Affirmant quosdam ex sacratissimis
illis sacerdotibus per sesquihoram, alios et-
iam per duas horas inter medios flamma-
rû globos, vitâ superstitè, incredibili ma-
gnanimitate perstitisse. Sanè verò de bea-
tissimo Societatis IESV martyre R. P. SE-
BASTIANO QVIMVRA affirmare au-
dent, qui ad suas clepsydras horarum inter-
ualla mensi sunt, vidisse se, per tres inte-
gras horas viuum in mediis ignibus torreri
magnâ prorsus barbarorum admiratione
cùm per dies plurimos nil nisi de illo non
sine ingenti stupore loquerentur.

Animauit imprimis generosos pugiles
ad tantam animi constantiam, magnus &
insolitus concursus Christianorum, qui
spectaculo interfuerunt, euocati videlicet
publico edicto quo dies & locus supplicii
multò ante tempore promulgatus fuit: fe-
cit etiam ad frequentiam spectatorum au-
gendam, quod in gloriosum martyrii thea-
trum

ttum producendi essent tot illustres tam ex Europa, quàm ex Iaponiâ religiosi viri, tot & tam venerandi sacerdotes, Iaponicæ vineæ antiqui & indefessi cultores, quorû aliqui viginti, alii quinque & viginti, quidam etiam triginta ipsos annos in Christianæ culturæ laboribus numerabant. Vt verò aliquid vel ex solâ coniecturâ de numero spectatorum colligere liceat, in memoriam reuocandum est quod R. P. IOANNES BAPTISTA DE BAEZA Societatis Iesv Rector Nangasacquæ qui ab anno Domini nonagesimo supra sesquimillesimum in Iaponiâ commoratus est, literis scriptis testatur in vnâ vrbe pomœrioque Nangasacquano, quamuis à prisca sua fortuna & frequentia procul excidit, Christianos numerum transcendere milium quinquaginta. Videbant igitur & plaudebant innumero prope numero spectatores Christiani, in quorum oculis sancti martyres placidè inter flammæ subsistebant, plurimi etiam in genua submissi, inter amplexus & oscula ambustarum columnarum acerbissimè tosti, suauissimè

M 2

280 LITTERÆ AN. M. DC. XXII, SOC. IES
simè moriebantur.

Post incendium ad busta, cineres & fauillas sanctorum corporum magno impetu irruerunt Christiani in caueam ad venerandum colligendumue beatas illas reliquias. Opponebant se quidem excubiae barbarorum, & fustibus etiam impactis Christianos arcebant. cumque hoc modo nil agerent & Christianos, ne rem suam agerent prohibere non possent, ad alia sibi consilia decurrendum putauerunt; ut & victores ipsi à sanctis corporibus abire viderentur & nec hilum nec vestigium sacrarum exuviarum ad venerationem, memoriamque superesset. Mandauit ergo Prætes effossâ humo foueam longè capacissimam aperiri; & in ea lignis iniectis maximum rogam accendi. deinde in flammam ambustas cum sacris corporibus columnas coniici, & in cinerem verti: cinerem denique multis plenisque faccis iniectum nauibus imponi, & procul ab urbis conspectu in altum mare spargi ac disseminari.

Alterâ luce à celeberrimo hocce martyrio,

tyrio, qui dies erat vndecimus Septembris capite truncatus est Dominus GASPAR COTENGANDOXICO qui R. P. CAMILLI CONSTANTII Societatis IESU per Iaponiam Apostoli lateri adhærere solet, & passim varia loca obeundo auxiliares in Gentilium conuersione operas conferre: cum illo duo etiam pueri & martyrum filii, quorum vnus septimum, alter decimum annum ingressus erat, gladio collum submiserunt. Alium etiam qui per noctem qua sacra martyrum combustorum corpora in cauea asseruabantur deprehensus fuerat, dum reliquias coleret colligeretque, ad Præsidem detulerunt. Præsides eo quod ciuem Omuranum dicerent, ad Omuranæ Reipublicæ Gubernatorem remisit, quò mox vt appulit, cum familia integra, martyrii palmam est consecutus.

Die Septembris duodecimo insigne Martyrium apud Omuranos fuit R. P. F. THOMÆ DE SVMMAREGA seu DE SPIRITV SANCTO ex antiquissimis è Dominicano Ordine Iaponensis agri cultoribus, & R. P. F. APOLLINARIS

M 3

FRAN:

282 LITTERÆ AN. M. DC. XXII. SOC. IESV
FRANCI non de postremis ex Ordine S.
Francisci Apostolis, & aliorum Iaponen-
sium qui flammis pro Iesu amore consum-
ti sunt.

Inter quos emicat laudandæ pietatis
mulier, quæ cum inter busta & ambustas
Martyrum illorum exuias deprehensa es-
set à satellitibus, & iam satis tum orando,
tum sese sanctis Martyribus commendan-
do quid vellet ostendisset, rogata, quid re-
rum ageret, & an Christiana esset, respon-
dit animosè, facilè ex eo, quod ageret vide-
ri Christianam se esse; Numquid vellent
aliud, Ob hoc responsum caput à ceruice
absciderunt & corpus truncum in cumu-
lum reliquorum coniecerunt, qui vniuer-
sim martyres quindecim numerantur.

Yquinotima decem alios computat
Martyres cum AVGVSTINO ONDA
ex Societate IESV, qui omnes R. P. CA-
MILLO CONSTANTIO Societatis
eiusdem associati fuerunt. Incidit R. P.
CAMILLI beata mors in decimum quin-
tū Septembris diem qui Firandi celebra-
rimo ignis supplicio lauream gloriæ com-
parauit.

parauit. Erant tunc in anchoris apud Firandenses naues Hollandorum & Anglorum onustæ mercibus omnino tredecim; vectorum igitur, nautarum, militum, institutorum ingens copia. Erat R. P. CAMILLVS ex Romanâ prouinciâ natione Italus, variarum linguarum etiam Flandricæ peritus: Ad varias gentes magnâ eloquentiæ laude, nec minore animorum motu verba faciebat Apostolico spiritu plenus. Hoc in amphitheatro ignibus tradendus, ex strue lignorum velut ex rostris aut orchestra dixit ad omnes spectatores. Ad Iaponios verò, quorum literis, ac mysteriis non tenuiter imbutus erat, orationis Epilogum conuertit, in quo fortissimè simul ac suauissimè deduxit, fidem IESV Christi veram esse, & esse securam. quæ cùm diceret, ita delinificâ suâ suadâ rapuit Iaponensium animos, vt ignem citò admoueri nolent, ne citò dulcissimo orationis fructu priuarentur. Pòst accenso rogo inter ipsas flammæ ardentissimâ voce omnes allocutus est, nec ante finem dicendi fecit, quàm viuendi.

Octobris secundo die Nangasacquam
nouem Martyres illustrauerunt, quorum
tres pueruli viriliter pro Iesu Christo oc-
cubuerunt. Vnus ē nouem per dies septem
quæstionibus in equuleo subiectus, vt Re-
ligiosos proderet, à quo nullum verbum
aliud extorqueri potuit, quam I E S V S,
M A R I A, Ô I E S V S M A R I A, Ô quanto
desiderio ardeo intrandi in gloriam Dei:
& his affines exclamationes, donec carni-
fices torquendo fessi, fractique, cū vinci
se fateri pueret: humeros ei diffindendo
aperuerunt, & in vulnus huius plumbum
liquatum effuderunt. Nihilominus Christi
pugil tortoribus fortior perstabat inuictus,
proinde, cum vniuersa familia in flammam
coniectus, combustus, & cinectus fuit:
cineres sacri in mare disiecti sunt. Sex e-
gregii Agricola die Septembris tertio &
vicesimo vitam Deo consecrauerunt. Cau-
sa mortis fuit quod in latebris domus apud
illos repertus est sanctus Martyr H Y A-
C I N T H V S Dominicanus. Tres, quorum
domus erat, flammis exusti, maritus nem-
pe & vxor & filiulus; Tribus aliis capita
ampu-

amputata fuerunt.

Quatuor ab vrbe Firando passuum mil-
libus septimo & vicesimo die Maij duo
Christiani pro Christo mortem obiuerunt:
vnus, quia hospes fuerat R. P. CAMILLI;
alter, quia in varias oras eundem illum Pa-
trem prædicandi Iesu Christi Euangelii
gratiâ nauigio suo deuehere solebat. Ac-
cessit ad geminos illos geminâ causâ Mar-
tyres decrepitus quidam octogintaquinq;
annos natus, quem in mare præcipitem
dederunt alligatis ad pedes duobus tam
immani mole saxi, vt illorum alteri qua-
tuor iunctim lacertosissimi Milones feren-
do non essent. Iam ibat præceps à iactu,
iam aquis hauriebatur, iam in fundum vs-
que depressus erat, cum ecce tibi, velut im-
mersibile suber emergit ab imo in sum-
mum, & in aquarum labro innatans sua-
uissimâ voce cycneus senex tribus vici-
bus insonnit IESVS MARIA, IESVS MA-
RIA, IESVS MARIA. Dixit & cum dicto
denuo saxi quibus alligatus erat deorsum
raptus in fundum rediit, nec deinceps ap-
paruit. Hoc marinæ decursionis spectacu-
lum.

M

lum.

286 LITTERÆ AN. M. DC. XXII. SOC. IESV
lum incidit in diem Iunii secundum & è
Christianis innumerabiles ad plausum ha-
buit spectatores.

Erat tertius dies Iunii quando alium co-
mitem sacre & Evangelicæ Peregrinatio-
nis R. P. CAMILLI CONSTANTII So-
cietatis IESV mortis pœnas dare coëge-
runt, ob eam causam quod in Ecclesiasti-
cis ministeriis, mysteriisque auxiliare obse-
quium attulisset. Post hunc alium octauo
Iunii die ob eandem causam morte mul-
tauerunt.

Iulii die vicesimo sexto noua & inaudi-
ta de causa tres ideo mori iusserunt, quòd
equos suos vehendis Martyribus præstare
nollent; iam enim inter Christianos pius
& constans rumor percrebuerat, grande
peccatum fore, si quis equos suos ad tam
iniquam barbaræ crudelitatis carnifici-
nam adiuuandam traderet.

Alii duo verè gemini etiam capitali sup-
plicio mulctati sunt quòd Martyribus
cum morte luctantibus sicut in duello fie-
ri solet, ipsi Patrini (quod aiunt) id est, au-
xiliando animandoque velut Commili-
tones

tones adstitissent.

Alibi alius, ob non traditum equum (ut alii nuper tres) ad vehendos Martyres, martyrio coronatus est. Non est ille prætereundus silentio, de cuius nomine & mortis causa siletur, qui in quadam appendice vnius pagi, vbi pauculae erant agricolarum casae, morte pro Christo occubuit. Illustrissimum illud sanctissimorum Martyrum sanguine suo purpuratorum agmen claudit, & coronidem imponit, cum beneuolâ & honorificâ Iaponensium memoriâ nominandus gloriosus ille Christi Apostolus R.P. PETRVS PAVL. NAVARRVS ex Societate Iesu, qui sex & triginta ipsos annos, ouibus Christi in ouili Iaponensi tot inter lupos pastor & custos fuit, donec Calendis Nouembris illo ipso die qui Sanctis omnibus festus & sacer est, animam suam posuit pro ouibus suis.

Damnatus enim est ad rogam, præclaram illam & omnibus Iaponicæ vineæ cultoribus inuidendam ob causam, quòd ab Europâ in Iaponiam ad promulgandam

288 LITTERÆ AN. M. DC. XXII. SOC. IESV
dam IESV CHRISTI legem, spretis Imperatoriae maiestatis legibus aduenisset, quod in Iaponia tot retro annis fidem IESV CHRISTI, ad pessumdandum idolorum cultum disseminasset. Ab hac sententia latus ad columnam ducitur, ligatur, comburitur. inter ipsos ignes ad extremum usque halitum Apostolicis vocibus IESVM CHRISTVM prædicando spiritum Deo dedit, & coronam accepit.

Nec solus coronam accepit, sed duos habuit commilitones & eiusdem coronæ socios fratres ex Societate Iesu DIONYSIVM & PETRVM SANDAYVM. Ad quos etiam adnumerandus est ille qui solet R. P. Camillo viarum comes esse, & index, nunc in morte socius viam, quam R. P. CAMILLVS monstravit, iisdem vestigiis secutus est.

F I N I S.

Soc. Iesv
eris Impe-
ffer, quod
m Iesv
idolorum
sententia
ur, com-
mum vi.
Iesvum
m Deo

ad daos
coronz
ONY.
M. Ad
quiso-
s. & in-
am R.
vestit

